


Narodna in univerzitetna knjižnica
v Ljubljani


12269

12269. v. E. g.

✓

12269





PRACTICUM
CHRISTIANÆ
PERFECTIONIS
COMPENDIUM

In Strenam oblatum

D. D.

SODALIBUS

Congregatis sub Titulo

B. MARIÆ
VIRGINIS

In Cœlos

ASSUMPTÆ

In

Archi-Ducali Soc. JESU
Collegio Labacensi.

Anno M. DCC. XLI.

LABACI,

Typis Adami Frid. Reichhardt,
Inclyt. Prov. Carn. Typ.



44803030



PRÆFATIO
 AD LECTOREM
 PERFECTIIONIS
 CHRISTIANÆ
 STUDIOSUM.

A Scetarum solemne & verum est placitum: *Vive ut pauci*: perfecta enim vita, *Vita paucorum* est. Fallitur, qui hanc vitæ laudabilem & perfectam singularitatem ex admirandis & vulgò exoticis metiri solùm rovit actionibus.

Communia, ordinaria, quotidiana bene, ordinatè, & singulari
 A 2 cum

cum industria peragere, hoc tandem est *perfectè vivere*: ejusmodi practicas industrias tibi *Christiana perfectionis* Studiose Lector brevissimè proponimus; addere, vel demere facilè hinc licebit, si quid minus, vel si aliud placuerit. Fusiùs & exactiùs id tibi suppeditabit Christianus Mayer in Enchiridio Industriadum; cujus ordinem, ut plurimùm secuti sumus, dum primò quotidianas, dein hebdomadarias, & menstruas actiones potiores, ac tandem extemporaneas, adumbramus; plerisque industriis suas praxes subnectimus. *Hoc fac, & vives.* Luc. 10.





INDUSTRIA I.

*Pro quovis opere perfectè
peragendo.*

DE omnibus & singulis actio-
nibus id tibi Eccl. 33. dictum
existima; *in omnibus operibus tuis
præcellens esto.*

Hoc ut obtineas, ad tria in quo-
vis opere perfectè conficiendo col-
limandum.

1. Ut opus ipsum ex sua natura
& objecto bonum sit, vel certè non
malum, qualia potissimùm sunt,
quæ professioni, instituto, officio,
&c. conformia sunt.

2. Ut bono fine fiat, & per bo-
nam intentionem potissimùm co-
heræstetur; cujusmodi est DEI
gloria, honor, beneplacitum, vir-
tutis ipsius honestas, proximi ædi-
ficatio, &c.

3. Ut quoad modum & requisitas circumstantias suam quoque integritatem habeat : dum ex parte intellectus adhibetur debita attentio, & circumspectio ; ex parte voluntatis continuata vel certe non interrupta bona intentio, ac prompta devotio, immixtis quandoque piis affectibus & desideriiis ; ex parte reliquarum facultatum animæ & corporis seriosa applicatio ac conatus, ut omnem tam externam, quam internam perfectionem opus illud sortiatur.

Excita igitur ante quamvis actionem desiderium perfecte eam adimplendi, proposita simul idæ aliquâ, prout fieri optares. Forma dein tibi bonam intentionem, unam vel alteram, quæ sit scopus actionis, qui potissimum esse debet DEI gloria & propria actionis illius honestas. Demum brevi saltem, pro ad DEUM affectu imploranda & Divina Gratiâ, ut rectè fiat.

In ipso opere cavebis, ne ad aliam mens evagetur, sed dictum tibi crede, *age, quod agis*. Curabis, ut suum cuique tempus tribuatur integrè, non differendo, non deproperando, nec satis habe ad externam tantùm superficiem & ad humanos oculos fallendos id solùm peragere: sed ita coram DEO perage, ut exterius, interiùsque dignum sit, quod DEO offerre audeas.

Post opus brevem aliquam reflexionem & examen instituere licebit, ut, si bene peractum, DEO totius boni unico fonti adscribas, & gratias agas; si malè, doleas cum proposito aliàs emendandi. Demum omnem conatum æterno Patri offer in unionem meritorum Filij sui, & ejusdem S. Matris ac aliorum Sanctorum.

INDUSTRIA II.

De Modo manè surgendi.

UT in aliis, ita vel maximè pro totius diei sequentibus actionibus tritum id habere locum, die bene cepto tibi persuadeas: *Dimidium facti, qui bene cepit, habet.* Certè Propheta David passim nil frequentius verbo & exemplo inculcat, quàm ut diluculo, manè, in matutinis veniamus, vigilemus, revertamur, &c. ad Dominum; sicut econtra dæmon nil ferè potiùs habet, quàm ut servos DEI manè evigilantes statim importunis occupet curis & phantasiis. Ut igitur primitias cogitationum & desideriorum tuorum DEO ritè offeras, & hanc primam diei actionem perfectè ordiaris, hic ferè modus esse potest.

I. Tempore rectè præstituto sine mora surgendum, juxta id Eccl. 2.
Horà surgendi ne te trices.

2. Ex-

2. Excitabis in te desiderium hunc diem singularis beneficij loco à DEO tibi indultum religiosè impendendi, ab omni peccato, maximè eo, de quo facis examen particulare, declinandi, & virtutem contrariam toties exercendi; omnes actiones præsertim eas, quæ ad DEI cultum, & bonum animæ pertinent, ritè ac devotè obeundi.

3. Facto S. Crucis signo mentem per varios affectus & actus maximè Fidei, Spei, Charitatis, gratiarum actionis & oblationis ad DEUM elevabis, nam *qui vigilaverint ad illum, invenient benedictionem*: Eccl. 32 fieri id potest, dum decenter & verecundè vestiris.

4. Vestitus vel in Oratorio tuo, vel si occasio est, coram Venerab. Sacramento preces matutinas ad DEUM, B. V. S. Angelum Custodem, & alios Patronos recitabis.

.. Facies generalem Intentionem & oblationem pro omnibus

totius diei actionibus, electo pro singulis hebdomadæ diebus certo Patrono, & designatâ certâ gratiâ, pro qua tibi impetranda actiones omnes ejus diei oblatas cupias: designatis itidem certis Personarum generibus, pro quibus speciatim eadem applicare velis, ut infrâ in praxi 2. ostendetur.

6. Quod reliquum est temporis, præparationi ad meditationem impendes.

INDUSTRIA III.

De Meditatione.

Cùm Christiana pietas sine consideratione Divinorum, & rerum humanarum agendarum diu subsistere nequeat, quin potius vix solidiori & efficaciori medio incalcescat, juxta id Psalm. 36. *Concaluit cor meum intra me, & in meditatione mea exardescet ignis*: rectissime omnino hora vel certè dimidia (p.

ratione statûs & occupationum)
impenditur ejusmodi piarum re-
rum meditationi, & quidem mox
manè, tum quòd tempus hoc per
se aptius est, utpote minùs aliis
occupationibus impeditum: tum
quòd homo ibi serenior adhuc
& ab aliis curis vacuum mentem
habeat: tum quòd sibi vigorem pro
omnibus reliquis actionibus à DEO
impetrare mox poterit. Ad hanc
rectè instituendam sequentia juva-
bunt.

1. Pridie antequam cubitum eas,
materiam ex libro aliquo vel aliun-
de tibi præparabis, eam in certa
puncta bene & ordinatè digerendo.
Hanc tam cum cubitum ivisti, quàm
cum manè surgis cum pio & con-
gruo affectu, desiderioque in me-
moriam revocabis; & si opus fue-
rit, manè rursus puncta releges.

2. Antequam meditationem ag-
grediaris, uno vel altero passu di-
tans ab orationis loco præsentem,

& quid modò acturus sis, inspe-
ctantem DEUM imaginaberis.

3. Auditâ orationis horâ cum
reverentia tam exteriori, quàm in-
teriore auspicaberis ab oratiuncula
quadam, qua te tuâque omnia in
DEI beneplacitum offeras.

4. Unum, duo, vel tria præludia
brevissimè tamen facies; quorum
1. est summaria quædam repetitio
punctorum considerandorum. 2.
Imaginatio loci vel alia similitudo
congruens materiæ meditationis.
3. Petitio gratiæ, ut ex hac medita-
tione competentem fructum hau-
rias.

5. Unum post alterum punctum
attentè leges, vel in memoriam re-
vocabis, eique morosius (dum
omninò satisfiat, licèt alia puncta
omninò non attingerentur) inhæ-
rens, varias exinde ratiocinationes
formabis, per considerationem cir-
cumstantiarum maximè; & exinde
varias veritates circa res agendas,

vel

vel fugiendas elicies, quibus ulterius insistendo, & potissimum quomodo se alij, & præsertim Sancti, Sancto úmque Dominus Christus in hoc vel illo gesserint, cum bonis affectibus admirationis, gratitudinis, amoris, &c. discuties, ac tandem te, tuáque gesta hoc in genere in examen vocabis cum variis denò affectibus, doloris, humilitatis, propositi, petitionis gratiæ, &c.

6. Meditationi varia colloquia ad DEUM & Sanctos inferentur, maximè autem sub finem, prout affectus dictaverit.

7. Erit perutile, si de veritate fidei, quam in meditatione expendis, sequentia ex te ipso quæras.

1. Quid, & cur, de ejusmodi Veritate credere debeas? 2. Quid ex ea discas? 3. Propter quas causas & motiva similem doctrinam suscipere debeas? 4. Quomodo hanc usque ad hoc tempus observaveris?

5. Quomodo in futurum eandem ob-

observabis in determinatis circumstantiis personæ, loci, temporis, negotij, præsertim hodie, ante & post meridiem? 6. Quæ te ab observatione impediverint; & quæ media ad eandem deinceps juvare possint? In singulis his quæsitis miscebis congruos affectus, subinde firma, & maximè particularia proposita facies.

8. Post meditationem te nonnihil reflectes de successu, & quæ lumina, quos affectus, quæ proposita inde conceperis, annotabis etiam quandoque scripto, breviter tamen, & si singularia fuerint.

INDUSTRIA IV.

De Sacrificio Missæ.

SI eam, quam meretur, æstimationem haberes de hoc sacrificio, primam & præcipuam curam utique impenderes, ut quotidie & dignè eidem assisteres. Est enim

tale hoc Sacrificium, ad quod reliqua antiquæ legis non aliter se habent, quàm ut umbra ad corpus, ut facula ad solem, ut rivulus ad fontem, ut typus ad prototypon. Continet quoque in se eminenter omnes aliorum sacrificiorum prærogativas. Est 1. namque sacrificium Latreuticum, quo solo summus & dignus DEO cultus exhibetur. Est 2. rememorativum Passionis & mortis Domini, illiusque cruenti Sacrificij multò meliori modo, quàm ullum aliud. 3. Est sacrificium Eucharisticum, quo dignas DEO gratiarum actiones referimus pro collatis beneficiis. 4. Est sacrificium propitiatorium, quo venia peccatorum obtinetur, & debitæ pro iis pœnæ, & quidem ex opere operato dimittuntur. 5. Est denique sacrificium pacificum, seu impetratorium omnium donorum, ac beneficiorum naturæ & gratiæ.

Tam offerens principalis, quàm ipsa hostia sunt omninò valoris infiniti, cùm sint ipse Christus Dominus, unde non potest non esse DEO Patri semper acceptissimum, per quemcunq; Sacerdotem offeratur. Ut porrò etiam tibi sit semper fructuosissimum, hæc observabis.

1. Ante celebrationem vel auditionem Missæ recolantur illi quinque fines instituti sacrificij hujus, ut postea in praxi 4. ostendatur.

2. Dum sacræ vestes induuntur à Sacerdote, convenientes affectus elicere convenit, quod etiam toto Missæ decursu optimè fieret. Cùm enim hæc sit repræsentatio totius Vitæ & Passionis Domini, nil meliùs & accomodatiùs assumetur, quàm ejusmodi Mysteriorum affectuosa consideratio. Possunt tamen nihilominus aliæ etiam orationes vocales consuetæ sub audiendo sacro persolvi. Explicatio
par-

partium Missæ & Cæremoniarum intelligentia in aliis libris passim habetur.

3. Sub utroque Memento, vel etiam circa Elevationem orabis pro omnis statûs & conditionis hominibus, includens quasi omnes & singulos sub SS. Christi Vulneribus. Sub dextræ vulnere Ecclesiam & omnes Ecclesiasticos: sub sinistræ, Imperatorem, Principes Christianos, & omnes status ac magistratus sæculares: Sub dextri pedis S. Vulnere, tuæ Congregationis homines; sub sinistri, Parentes tuos, Consanguineos, Benefactores, amicos, ac tuæ curæ specialiter commissos; sub Lateris Christi te, ac tuas necessitates Christo commendare licebit. Similis modus erga varios defunctos observari poterit in Memento post Elevationem.

4. Communicabis semper Spirituallyter per elicitos actus, maxime

mè Fidei, Spei, & Charitatis, &c. juxta formulam praxi 4. indicandam.

INDUSTRIA V.

De Oratione Vocali.

Sub hanc veniunt Horæ Canonica, recitatio Rosarij, Litanæ, Officium B. V. vel aliæ preces debitæ vel spontaneæ, quas cùm *psallere sapienter* jubearis Psal. 66. ne annumereris populo illi, qui *labiis solis DEUM honorat*, corde longè ab eo diffito, omninò curandum, ut attentè, devotè que fiant,

1. Igitur ante quamvis orationem vocalem animum tuum non nihil colliges, & Præsentiæ Divinæ memoriâ ad DEUM levabis, formando tum bonam intentionem DEI colendi, & tibi vel aliis hæc vel illa dona impetrandi; tum gratiam breviter petendo.

2. Tempus & locus opportunus.

religatur orationi, & fiat cum decentia non tantum interiori, sed etiam exteriori corporis, qualis est genuflexio, elevatio manuum, aspectus piæ imaginis, coram qua oretur.

3. Non deproperabis orationem, sed integrè & graviter verba sunt pronuncianda, absque tamen molesta apud alios mussitatione.

4. Procurare omnibus modis ex parte intellectûs satages attentionem vel ad ipsa orationis verba, vel ad aliud pium & congruens mysterium: ex parte verò voluntatis devotionem per varios pios affectus.

5. Post peractam longiorem præsertim orationem sequatur brevis reflexio, & petitio veniæ ob defectus.

INDUSTRIA VI.*De Lectione Spirituali.*

Qui juxta S. Ambros. l. i. Of-
fic. c. 20. **DEUM** alloquimur,
cùm oramus; illum verò audimus,
cùm legimus Divina Oracula : &
verò non minor sæpè fructus ex le-
ctiōe, quàm ex ipsa oratione se-
quitur ; idcirco huic quoque exer-
citiō quotidie aliquid temporis im-
pendes saltem quadrantem vel me-
diam horam. Ut verò utiliter fiat :

1. Mentem collectam & ad **DE-
UM** elevatam afferes, dum lege-
re incipis, implorato auxilio Divi-
no brevi aliquâ jaculatoriâ prece.

2. Lectiō librorum sit cum sele-
ctu : dirigi enim debet ad propriam
suæ perfectionis utilitatem ; & si
legi ceptus est liber utilis, non ad
aliū est transeundum, priusquam
hic abso'utus sit.

3. Non est deproperanda lectiō

ex

ex curiositate multa simul sciendi, sed ei tardè ac morosè insistendum, præsertim si ad praxim aliquid occurrit.

4. Immiscendi sunt lectioni varij affectus pij, & universim non tam scientia, quàm utilitas spiritualis propria semper exinde est procuranda.

5. Concludatur brevi oratione ad DEUM, ut lecta serves, & adimpleas, pro quo juverit quædam, pauca tamen & cum selectu quandoque annotare.

INDUSTRIA VII.

De Studiis, vel aliis Occupationibus.

PRæter allata hætenus exercitia, quæ ex objecto suo sunt per se pia, sunt & alia, quæ vocantur adiaphora, necessariò tamen quandoque exercenda tam à secularibus, quàm à Religiosis: quales sunt

labores ingenij in litterarum aut etiam causarum dicendarum studio, & aliæ occupationes tum privatæ, tum publicæ, quæ si ritè fiant, non minùs cum ingenti proprio merito, & proximi emolumento instituantur.

1. Omnibus igitur laboribus, studiis, & occupationibus tuis tum privatis tum publicis, præter bonam intentionem, & orationem (qualis est, vel *Actiones nostras, quæsumus*; vel *Veni Creator Spiritus*, vel alia infrà praxi septima assignanda) conducit præmeditari, quomodo bene, decentérque peragi possint, ac debeant.

2. Impendi debet tempus diligenter, & integrè, cum seria animi & corporis applicatione, posthabito omni fastidio & difficultate ad quoscunque labores, & alias debitas, ratione statûs vel officij, occupatione.

3. Elevanda mens quæcûque ad

ad DEUM, maximè cum difficultas oritur, vel labor caret successu, petendo Divinum auxilium, vel invocando Angelum proprium, aut ejus, cum quo agitur.

4. Post successum aliquem cujuscunque operis agantur DEO gratiæ, cum aliqua reflexione, an nihil sit prætermissum.

INDUSTRIA VIII.

De Examine particulari.

Licet examen generale à multis, præsertim Religiosis, bis interdum fieri laudabiliter soleat, hinc tamen solum examinis particularis ratio præscribetur, examinis generalis faciendi declaratione reservatâ ad industriam II. unde peti potest. Cæterum examen particulare meritò efficacissimis mediis ad extirpandum quodvis vitium, vel implantaendam virtutem adnumerandum, & aliud est, quàm specialis

que-

quædam diligentia circa unam aliquam rem: uti enim pluribus intentus minor est ad singula sensus; ita sollicita unius cura solet esse perquam efficax & certa.

Pro materia hujus examinis sumetur vel vitium & defectus eradicandus, vel virtus introducenda, cum selectu tamen, ita ut ea prius sumantur, quæ magis negotium faciunt ex speciali quadam necessitate vel inclinatione, ex qua tamen plurimum pendeat ad profectum, vel defectum in perfectione.

Selectâ tali materiâ i. propositum manè faciendum cum petitione gratiæ ad evitandum hunc defectum, vel exercendam toties hanc virtutem.

2. Hoc propositum interdum quandoque renovandum, & si quis lapsus contigit, tunc sione pectoris vel alio signo, quod alij tamen præfentes non notent, dolere restelicendos.

3. Examen instituendum ante vel post prandium petito prius Divino Lumine, quoties lapsus sit: & numerum cum dolore & proposito novo annotabit.

4. Idem examen fiet noctu ante somnum, collato simul defectuum numero cum primis temporis antemeridiani lapsibus. Talis collatio etiam fiet die sequenti cum priore, & sic deinceps, ut appareat profectus vel defectus.

5. De singulis lapsibus præter dolorem etiam pœnitentiam aliquam spontaneam superaddere, perquam conducit.

INDUSTRIA IX.

De Refectione Corporis.

AD hanc S. Bernardus tanquam ad tormentum, S. Augustinus tanquam medicamenta sumpturus accessit non sine timore; *quis enim scit Domini*, inquit l. 10. Confes-

c. 3. qui non rapiatur extra metas necessitatis? quisquis est, magnificet nomen tuum, ego autem non sum: quia homo peccator sum. Non immeritò proin hæc actio pluribus cautelis opus habet, ut honestè peragatur.

1. Plurimum juvat bonam intentionem præmittere, protestando, quòd non voluptatis, sed decentis necessitatis rationem habere velis, & reficere corpus, ut anima DEO alacriùs servire deinceps possit.

2. Devota oratio seu benedictio præcedat, & gratiarum actio subsequatur.

3. Caveatur intemperantia, quæ vel in quantitate, vel qualitate, vel modò seu nimia in cibos effusione & aviditate committi potest.

4. Nulla refectio abeat sine aliqua appetitùs sensualis mortificatione.

5. Sevetur decentia non tantum interior, sed & exterior sen-

rum,

suum, & maximè in modo comedendi.

6. Animus quoque reficiatur piâ vel lectione, vel colloquio honesto, vel piis etiam quandoque cogitationibus, affectibusque.

INDUSTRIA X.

De Recreatione, seu Relaxatione Corporis.

UTi arcus semper intentus frangitur, sic & animus, nisi quandoque à seriis nonnihil ferietur. Ne tamen simul, quod facilè fit maximè post cibum omninò per nimiam effusionem defrænetur, periculum est. Hoc ne fiat;

1. Collectâ post gratiarum actionem mente fines instituendæ relaxationis nonnihil utiliter ruminabuntur, qui sunt quoad Corpus & Animam per relaxationem aliquam hæc restam vires integras resumere ad alacrius dein denuò

DEO serviendum; charitatem & amicitiam mutuam per amica ejusmodi colloquia conservare & perficere; ex mutuo plurium colloquio variarum rerum haurire eruditionem; demum practicè doceri modum rectè conversandi etiam cum extraneis. Conandum proin, ut hos fructus ex recreatione capiam, pro quo factâ bonâ intentione petenda à DEO gratia.

2. Cum indifferentia ad socios relaxatio & colloquium instituentum.

3. Cavenda nimia effusio & quævis inconsideratio loquendi, & universim omnia linguæ vitia, maximè detractio, jactantia, contentio, clamoritas, interpellatio alterius sermonis & similia.

4. Apparere debet tam in verbis, quàm actionibus, ac ipso modo loquendi in vultu, gestu, incessu modesti, humilitas, affabilitas, ac prudens maturitas, ut non tantum

ipsa materia, sed & modus collo-
quij ædificet.

5. Elapso relaxationis tempo-
re mox conticescendum, animus-
que denuò ad seria colligendus, ac
visitatione Ven. Sacramenti (quod
quidem pro occasione loci & tem-
poris utilissimè aliquot per diem
vicibus fieret) intentio matutina
pro reliquis diei actionibus reno-
vanda; elicitis simul variis piis af-
fectibus, maximè Fidei, Adoratio-
nis, Spei, Charitatis, vel recitatis
ibidem aliis consuetis orationibus
vocalibus.

INDUSTRIA XI.

*De Examine nocturno, &
precibus nocturnis.*

Cùm in actionibus pomeridianis
vix distinctæ ab hætenus re-
censitis occurrant, ultima diei actio
supereft examen scilicet noctur-
num, quod ob singularem utilita-

tem nunquam omittendum: continet enim plurimarum virtutum actus, præsertim gratitudinis, humilitatis, & cognitionis sui, Contritionis, Spei, Amoris DEI, boni propositi, quæ hominem cum DEO reconciliant, si fortè per diem gratia Divina amissa per peccatum gravè fuisset.

Facto examine generali & particulari juxta formam infra praxi-
II. declarandam, sequuntur preces nocturnæ ad DEUM, B. V. S. Angelum Custodem, & Sanctos Patronos.

Fit honesta, & decens ad quietem compositio, & ante somnum mens piis, & affectuosis se occupat cogitationibus, revocatâ in memoriam subsequenti diei materiâ meditationis, vel facta brevi ad bonam mortem præparatione.

INDUSTRIA XII.

De Distributione totius diurni temporis.

NIl ad evitandum otium, nil ad impendendum rectè integrè-que tempus, quo nil pretiosius, nil ad constantem propositorum executionem efficacius inter humana ferè est, quàm bona singularum diei horarum & occupationum digestio, distributióque, à qua sine urgenti causa non recedatur. Expedit proin à quovis talem ordinem haberi, & quoad fieri potest observari. Pro varietate personarum & occupationũ unus esse non potest, & non rarò ab uno etiam est immutandus. Referam hìc Paradigmati locò ordinem illum, quem magnorum munerũ, & sanguinis, multóque majoris pietatis Vir sibi constituit rat indies sanctè observandũ, qui facillè variari poterit à quo-

vis pro libitu, habita semper statûs & conditionis suæ debita ratione.

1. Manè horâ constitutâ excitatus surge, ac mente statim in DEUM elevata inter pias cogitationes, & sanctas animi aspirationes induete. Inde genuflexus ante Oratoriû persolve consuetas matutinas preces, & prostratus corde tuo ante crucifixum DEUM pete ab eo benedictionem, qua munitus quodammodo, & armatus contra omnes insidias visibilium & invisibilium inimicorum tuorum, eò constantiùs persistere possis in vera via salutis. Si fortè jam datum fuisset signum matutinæ salutationis Angelicæ, saluta Beatam Virginem triplici Ave Maria.

2. Relege, aut mente revolve materiam, quam tibi pro meditatione jam vespere antecedenti præparâst, & in certa puncta distribuisti

2. Accede loco à domesticorum

rum turbatione semoto ad meditationem semihoræ minimum, magnô in te prius desiderio excitatô optatum ex ea, pro bono animæ tuæ, fructum referendi.

4. Peracta meditatione inquire de successu, & quid in ea pro tuo in spiritu profectu cognoveris. Si bene cessere omnia, refer DEO laudes; si minus, vide, an culpâ tuâ? & deprecare: si nullâ culpâ, offer te humillimè DEO tuo cum proposito eidem etiam in ariditate Spiritûs, & desolationibus animi quàm constantissimè serviendi.

5. Quæ tibi DEUS pro sui gloria & Spiritûs tui bono cognoscenda dedit, & quæ ipse tibi in hunc finem exequenda proposuisti, refer brevissimè in libellum aliquem, ne fortè memoriâ hæc sancta lumina & proposita elabantur, atque etiam de iis conferre possis cum tuo Patre spiritali, ab eoque in usu tam sancti exercitij, si opus sit, dirigere.

verò simul etiam, ea interdum re-
legendo crescere in amore DEI tui,
qui tantas cælestium luminum, &
veritatum gratias in te iñmerentem
tam copiosè dignatus est effundere.

6. Vocales deinde, quas in mo-
re habes, preces persolve ; his per-
solutis cura, ut, antequam te ad alia
agenda conferas, modico saltem
tempore, consideratè tamen, spi-
rituale quid legas, aut ex Thoma
de Kempis, aut alio libello sancto.

7. Post hæc quæ privata sunt
Domûs tuæ, dispone breviter, ab
his ad publica te confer, semper in
omnibus spectando Divinam glo-
riam, commune bonum, & consci-
entiæ tuæ securitatem.

8. Singulis diebus ante, vel post
publica negotia, Sancto Missæ Sa-
crificio devotè audiendo intersis,
summæque duc tibi gratiæ, & feli-
citati, quò DEUM tuum, Domi-
num, ac Salvatorem præsentem pos-
sis quæ die venerari, & adorare.

9. Antequam locô sacri auditi discedas, exquire parumper, quæ, & quomodo te à manè ad illud tempus gesseris : si bene, DEUM lauda ; si malè, deprecare. Comendando te singulariter precibus eorum Sanctorum, quorum imagines, Reliquiæ, & altaria eô locô habentur in veneratione.

10. Sume prandium debita moderatione, nec ita totus in cibos abripiaris, ut non interdum bonæ alicui cogitationi, aut colloquio locum des, & occasionem capias exercendæ temperantiæ, aut etiam mortificationis à magis sapidis subinde abstinendo, memor in refectioe corporis non tam voluptatis, quàm necessitatis habendam rationem.

11. Sumptô prandiô, vel colloquiô, vel alia animi honesta relaxatione te recrea aliquanto tempore.

12. Iursum ad curan'la, quæ Domûs tuæ sunt, te converte, at-

que ab his deinde ad publica: à quibus si vaces, occupa te lectione alicujus libri, vel de Vitis Sanctorū, vel alterius, qui magis conveniat statui, conditioni, ac muneribus tuis.

13. Si quæ tibi obeunda sunt charitatis aut humanitatis officia, obi, invocatō prius Divinō auxiliō, ut in similibus, quæ ratio statūs tui, aut muneris postulat, ita semper te geras, ne vel in minimo aut per te, aut per alios DEUS vel proximus tuus offendatur.

13. Signō horæ interdiu auditō invoca brevi oratione, aut aspiratione DEUM, & Angelū tuum Tutelarem, petendo gratiā, ut omnia, & singula momenta vitæ tuæ possis ad honorem, & servitium Divinæ Majestatis, juxta sanctissimum illius beneplacitū impendere.

15. Ita etiam cura, ut brevissimis aspirationibus, & precibus jaculatois mentem frequentius de die,

die, etiam inter negotia, ad superna eleves, quæ plarimum faciunt ad procurandam Divinam in se benignitatem, & conservandam internam animi in Deum devotionem.

16. In universon denique cura, ut initio cujuscunque non solum boni, ac sancti operis, sed etiam negotij quantumvis sæcularis intentionem tuam ad DEum dirigas, eique singula offerendo petas, ut per te in omnibus sanctissima ejus voluntas, & beneplacitum, compleatur.

17. Sub Vesperum si quæ tibi vel ex obligatione aliqua, vel ex devotione oranda supersunt adhuc? ora: deinde si supersit tempus, spirituale quid legas, uti manè.

18. Cænam fume, & post eam te recrea, uti dictum supra de prandio. Postmodum si quæ tibi circa domestica tua, aut etiam alia gravior, seu publica, seu privata, vel à te, vel à tuis agendo occur-

rent in sequentem diem , dispone.

19. Antequam concedas cubitum , præpara tibi primò materiam , & in sua puncta distribue pro meditatione sequentis diei. Secundò recita, vel solus , vel convocatâ totâ familiâ tuâ devotè Litanias B. Virginis, & alias preces. Tertiò institue tecum examen generale juxta consueta quinque puncta, reflectendo te singulariter simul ad particulare. Quartò persolutis solitis ad DEum, & Cælites nocturnis tuis commendationibus , venerare magna devotione, & humilitate pedes crucifixi tui JESU, & prostratò in abyssum indignitatis tuæ animò, pete tibi pro futura nocte benedici.

20. Dum exuis te , repete memoriâ, aut materiam meditationis futuræ, aut ea, quæ ex libro spirituali didicisti, ut mens tunc sanctis cogitationibus occupata , cum isdem, & adormiat, & evigilet.

Potuisſent hæc puncta pauciori-
bùs proponi, ſed fideliter ex au-
thore ipſo relata, dabunt fidem,
nullum hominum ſtatum excludi
à Spiritu DEI, qui, ubi vult, ſpirat,
& Beatus, qui ejus vocem audit.



INDUSTRIÆ

HEBDOMADARIÆ,
VEL MENSTRUÆ.

*Sub his veniunt actiones, quarum
ſi non quotidianus, certè hebdoma-
darius, vel menſtruus uſus eſſe ſolet.*

*Ejuſmodi ſunt Confefſio, recollectio,
& inſpectio ſui, Cõmunio, auditio
Verbi DEI, Cultus feſtorum & S.S.
& uſus Indulgentiarum. Pro his pro-
cedunt ſequentes Industriae.*

INDUSTRIA XIII.

*Pro Confefſione Sacramen-
tali.*

SI Medicus toties acceritur, nec
medicina recuſatur, quæ ſies vel

modicè afflicta valetudo corporis id exigit : malè profectò cum anima nobiliore hominis parte agitur, quando toties facilè, & frequenter etiam lethiferè faucia absque Chirurgo, absque Medico, absque pharmaco in teterrimo peccatorum pedore jacere finitur, cùm tamen, & opportunus Medicus, & medicina salutaris Sacramenti pœnitentiæ semper sint in promptu. Sanè qui hinc quotidiana animæ suæ vulnera, inde verò Sacramenti hujus efficaciam suis momentis libraret, nunquam ultra mensem, imò nec hebdomadem differre pharmaci hujus spiritualis usum sustineret. Tu satage, ut inter eos sis, qui hoc Sacramentum non tantùm recipiunt sæpè, sed etiam bene. Quod ut fiat :

Curabis i. vigilem cordis custodiam, & profundam tui discussionem & cognitionem habere per quotidianum saltem examen, nec
non

non conscientia: teneritudinem in te excitare: hæc enim sunt remota ad Confessionem bonam dispositio.

2. Excitatio desiderio ad hoc Sacramentum cum fructu recipiendum, ante Confessionem per aliquod tempus præmissa oratione, in qua petitur lumen, conscientiam discuties, & peccata breviter, integrè, clarè, & ordinatè annotabis mente, vel scriptò.

3. Contritionis actum unà cum proposito emendationis Confessionem præmittes ardentè, & seriò.

4. Confessarium, qui sine urgenti causa mutandus non est, non ut hominem, sed ut judicem, DEI Judicis vices agentem, agnosces, veneraberis, & ei te quoad omnia submittes.

5. Petitâ benedictione, versa facie ad imaginem, Confiteor usque ad verba, *mea culpa, &c.* recitabis, tum peccata cum interno dolore expones, & pœnitentiâ acceptâ sub

absolutione denuò actum contritionis repetes.

6. Post Confessionem agenda DEO gratiæ, tum pœnitentiâ, quo ad fieri potest, adimpletâ, novum emendationis propositum formabis, recolens id Joan. 5. *Ecce sanus factus es, jam noli peccare, ne deteriorius tibi aliquid contingat.*

INDUSTRIA XIV.

Pro Recollectione & Inspectione sui statûs.

UTi prudens œconomus, præter quotidianas dati, & acceptationes, etiam hebdomodarias, & menstruas sapienter instituit, considerans sollicitè, & conferens impensas cum redditibus, ita sanè ad negotiationem spiritualem (qualis esse debet tota vita nostra juxta Christi: Luc. 19. *Negotiamini, dum venio*) quantum conducatur ejusmodi generalior per hebdomadam vel
cer

certè mensẽm sui profectũs, vel defectũs consideratio, explicari satis vix potest. Expertus sentiet, quantum hoc medium ad perfectam sui cognitionem, ad gratam beneficiorum à DEO acceptorum memoriam, & conservationem, ad spiritũs intepescentis resuscitandum fervorem conferat. Hęc recollectio sic fieri potest.

1. Post Confessionem, vel S. Communionem dimidia circiter hora ab aliis occupationibus vacua seligatur. 2. Præmittatur gratiarum actio de acceptis ea hebdomade, vel mense beneficiis, & petitio gratiæ cognoscendi statum animæ suæ. 3. Fiat examen secundum quædam puncta, & quæ sita, juxta praxim 14. infra ponendam. 4. Excitetur dolor & contritio, vel gratiarum actio, prout se malè vel bene in hoc vel illo reperit; considerentur simul, & ex cogitentur apta, & efficacia media,

ut neglecta refarciantur, & quæ salubriter facta, conserventur, ac perficiantur. 5. Fiat propositum, & oblatio sui coram DEO unà cum petitione gratiæ pro sequenti hebdomade, vel mense.

Ad considerandas hoc vel simili modo semitas domûs tuæ, imitare quoad fieri potest, eos, qui non satis habent dimidiam horam quot hebdomadis impendere, sed integrum, vel certè dimidium diem unoquoque mense, triduum quolibet semestri, justum octiduum quovis anno dant huic negotio: serviet eo tempore longius & accuratius examen de rebus, quæ infrà in Industriis extemporaneis ponentur.

INDUSTRIA XV.

Pro Communione Sacramentali.

Appositè S. Hieronymi de Sanctis & ad Beatissimam Virginem
com-

comparatis inquit: *Cæteris per partes præstatur, Maria verò se simul tota infudit plenitudo gratiæ: Ita nunc ego dixerim, cæteris actionibus bonis gratiam per partes dari, animæ verò ad Sacram Divinissimi Sacramenti mensam dignè accumbenti totam se gratiæ plenitudinem infundere, quando se manducanti & bibenti ipse fons, & Auctor gratiæ communicat. Ut igitur tu quoque salientes aquas in vitam æternam haurias de fontibus Salvatoris, non tantùm ut sæpè bibas, sed longè magis ut Corpus & Sanguinem Domini dignè sumas, omnem operam dabis: eaque de causa ante, sub, & post SS. Eucharistiæ perceptionem utilissimè servabis, quæ sequuntur, vel etiam meliora.*

I. Ante S. Communionem procuranda potissimùm puritas conscientiæ, non solùm ab omni peccato etiam veniali, sed & quocumque inordinato affectu.

2. Excitandum desiderium recipiendi dignè, & fructuosè tantum hospitem; pro quo juverit pridie, & ipso die S. Communionis aliquid legere, v. g. ex lib. 4. de Imit. Christi, aut simili libello, vel etiam de hoc Sacramento meditari. Præmittitur etiam perquam congruè pridie S. Communionis mortificatio aliqua, v. g. jejunium, vel abstinencia, item exactior custodia sensuum, & linguæ, vel aliæ devotiones.

3. Sub sacro, quò communicandum, diligentius observetur modus audiendi sacrum juxta Industr. 4. Et post Elevationem orationi mentali incumbendum, insistendo variis piis affectibus erga hoc SS. Sacramentum; ut fidei, reverentiæ, humilitatis, spei, amoris, & vehementis desiderij uniendi se arctissimi ac cum Christo Domino: qui affectus ex considerationibus, & motibus variis excitabuntur, ut

ex dignitate, & majestase tanti hospitis, ex vilitate sui, ex fructibus, & donis, quæ ex hoc Sacramento hauriri solent. Cum varietate hi affectibus elicientur; Si jam ut filius prodigus erga amantissimum Patrem, jam ut æger ad Medicum, jam ut servus ad Dominum, ut captivus ad Redemptorem, ut mendicus ad opulentissimum, & liberalissimum Regem, jam ut discipulus ad Præceptorem, ut sponsa ad sponsum, eosdem excitaveris.

4. Sub ipsa Communionem procuranda tum exterior decens compositio, tum magis interior per ardentem affectum, & aspirationes denuò te huic Hospiti præsentando & uniendo.

5. Post S. Communionem saltem per quadrantem denuò novo fervore, tum supradictis, tum aliis affectibus immorandum, ut endumque liberaliter opportunissimâ occasione ad quidvis hoc tempo-

(quo

(quo olim vidit in Oratione P. Balth. Alvarez , adesse Dominum magnâ donorum sarcinâ onustum , & cupientem exonerare se in animas sibi devotas) impetrandum. Speciatim autem hæc conducent.

1. Excitandus actus Fidei, credendo, à te verè receptum illum eundem, qui pro salute tua Incarnatus, natus, passus, mortuus est, &c. possunt hic & alia mysteria pro ratione temporis recoli.

2. Exercendus actus reverentiæ, adorationis & humilitatis ex consideratione præsentis Divinæ Majestatis, SS. Christi Humanitatis apud te, & in te misero, vili homuncione, quin & peccatore.

3. Exercendus actus gratitudinis tum pro omnibus, tum maximè hoc beneficio, quo dignatus est ad te venire; & in gratiarum actionem offerenda omnia tua, maximè verò SS. omnium & Dei præsequia, quin & ipsius præ-

sen-

P fentis Redemptoris tui merita vitæ, pannonis, & mortis.

4. Eliciendus actus amoris super omnia erga liberalissimum Dominum ; gaudendo de infinita ejus perfectione , optando eum ab omnibus agnosci , amari, glorificari, præsertim verò à te ejus SS. voluntatem , & beneplacitum perfectè impleri.

5. Actus oblationis sui ipsius , renovando sua proposita, & vota , quæ quis habet.

6. Actus contritionis ex puro amore DEI offensi, optando nunquam à te vel alia creatura offensus, & , ut nunquam deinceps offendatur, omnibus viribus proponendo.

7. Actus Spei, quandoquidem hic accepisti pignus & arrham æternæ salutis, item Medicum, qui iuvat, potest, & vult sanare omnes tuas infirmitates, uti & Dominum munificenrissimum exhibere po-

tentem, & volentem omnia gratiæ dona tibi utilia.

8. Actus orationis, & petitionis, proponendo Redemptori tuo tuas misérias, & necessitates, tuam item indigentiam, & paupertatem, rogando, ut ab iis te sublevet, & transeant, ac maneant in te ejus gratiosissimæ virtutes, humilitas, mansuetudo, castitas, patientia, obedientia, &c.

9. Actus charitatis erga proximum, rogando pro omni statu, ut suprâ habetur *indust. 4. n. 3.* item optando, ut ab omnibus DEUS colatur, & ametur, ut ab iisdem omnia hujus, & alterius vitæ mala avertantur, communia, & privata &c.

10. Elevanda mens ad B. V. deinde ad SS. Angelos, & Electos omnes, rogando ut pro te DEO tam benefico grates agant ob exhibita beneficia, & deinceps ea tibi impertrent, quæ ab ipsorum, & tuo Domino hactenus petieras. Denique

ad gratiarum laudes invitandæ omnes creaturæ, recitando Canticum, *Benedicite omnia opera Domini Domino &c. vel Te DEUM laudamus.*

Reliquus porrò dies singulari cum devotione, & sensuum custodia transigatur, ut nil à se committatur, quòd meritò tanti Hospitis præsentiam offendere possit.

INDUSTRIA XVI.

Pro audiendo Verbo Dei.

INter tot salutis pericula quid est, quod solari magis possit, quàm signis etiam quibusdam contestatam sperare suam beatitudinem? Ecce prædestinationis signum ex ipso Christi ore acceptum: *Qui ex DEO est, verba DEI audit.* Joan. 8. neque aliud reprobationis Judæorum ibidem subjunxit signum, quàm Verbi DEI neglecti: *Propterea vos non auditis, quia ex Deo non estis.*

1. Diebus igitur Fests & Do-
minicis, vel aliis juxta Ecclesie vel
tui Instituti consuetudinem, aut
præscriptum nihil ferè tibi potiùs
sit, quàm ut Concioni aut Exhorta-
tioni, quoad fieri potest, inter-
sis, ex eaque fructum capere stu-
deas.

2. Excitabis in te desiderium,
& bonam intentionem DEI, præ-
sertim voluntatem hinc tibi decla-
randã cognoscendi & adimplendi.

3. Non tantùm ante Concio-
nem petenda à DEO gratia, tum
ut Minister Verbi DEI id rectè &
utiliter proponat, tum ut Audito-
res cum fructu audiant; sed & sub
eadem ejusmodi piarum aspiratio-
num usum familiarem tibi reddas.

4. In Concione non tam ad Per-
sonæ proponentis conditionem &
modum attendes, quàm ad ipsius
rei propositæ substantiam, quæ sem-
per animam pascet, à quocunque
tander, & quomodocunque propo-
natur.

5. Finitâ concione DEO gratias
ages, & ut jacto bono semini det
incrementum, humiliter rogabis:
simúlque super fructû exinde hau-
stum & praxim te reflectes; nam
*beati qui audiunt Verbum Dei, & cu-
stodiunt illud.* Luc. II.

6. Eodem modo te habebis, si à
Superiore tuo privatim instructus,
monitus, vel etiam reprehensus
fueris: si enim & hîc DEUM in-
struentem, monentem, corripien-
tem consideraveris, nihil sinistrè
accipies.

INDUSTRIA XVII.

*Pro Cultu Festorum, & San-
ctorum.*

QUOD corpori, ad vires liberali-
ùs reficiendas, sunt prolixio-
res & largiores refocillationes,
quandoque institui solitæ; hoc
animæ DEO devotæ videntur esse
dies Dominici festique, quibus cor-

pore à laboribus quiescente, ipsa nunquam minùs otiosa impinguetur, annonam sibi spirituales pro subsequenti integra hebdomode salubriter providens. Unde plurimum abest ab iis, qui dies festos vix aliter sacros habent, quàm longiori somno & marcido otio indulgendo. Inter hos ne tu sis, refert valdè institutorum festorum causas sub id tempus recolere, & juxta harum amussim aetiones dirigere.

I. Igitur causa institutorum festorum est, ut recolatur grata Beneficiorum DEI hoc die, vel si Sancti memoria agitur, eidem Sancto, aut aliis, per ejus merita, collatorum memoria; unde tali die rectè considerantur omnia Dona ac Virtutes talis Sancti, ob quorum collationem DEUM, & ipsum Sanctum laudamus, vel alios pios affectus elicimus; quod ipsum fieri potest diebus Dominicis, recolendo be-

beneficium Creacionis mundi, & ejusdem reparationis per Christi Domini resurrectionem, & missionem Spiritûs S.

2. Causa, ut tali die cultum singularem Dulixæ, vel Hyperdulixæ, prout scilicet festum est, exhibeamus ipsi Sancto ob præclara ejus Dona & merita ac gloriam: in eoque ultimatè ipsum DEUM honoremus, cui Sancti illius gloriosa merita, & obsequia (quandoquidem nostra tam sunt tenuia) offerre licebit, uniendo ea cum iisdem longè pluribus, & majoribus. Ejusmodi quoque cultus DEO diebus Dominicis exhiberi poterit, dum vel ipsâ cessatione à labore manuali testamur DEUM absque nostro labore omnia creâsse, & etiamnum per se potissimùm conservare.

3. Causa, ut eorundem SS. præclara inspicientes exempla, deinceps imitari non pigeat, quod celebrare delectat. Quem in finem

optimè tum pridie, tum ipso die, tum in solemniore festo per totam Octavam aliqui imitationis actus in iis maximè virtutibus, in quibus ille Sanctus claruit, eliciuntur: sicut & die Dominicâ cum Christo resurgente anima se convenienter denuò erigit, abjecto veteris hominis tepore, & Spiritûs S. gratiam sollicitè implorat.

4. *Causa*, ut tali præcipuè die cum magna fiducia instanter, tum ab ipso DEO, tum Sancto illo, per ejusdem merita obsecremus, vel ea, in quibus ille cum primis excelluit, vel quorum majori necessitate premimur, vel quæ maximè impetrandæ in votis habemus, ut est, v. g. reformatio vitæ, abolitio hujus vel illius peccati; item hujus vel illius virtutis consecutio. Neque enim putandum est, optimum Deum, qui unice Sanctos suos glorificare vult, tali die quidquam negaturum Sanctorum suorum intercessionibus, quas

quas illi ad Clientum suorum æ-
quas & pias preces faciunt.

Summatim igitur in his actibus
religiosa festorum transactio sita est.

1. In gratiarum actione DEO
exhibenda, & Sancto pro collatis
ipsi, & nobis per eum beneficiis.

2. In Cultu Sancti, & cum primis
ipsius DEI.

3. In imitatione.

4. In oratione ac petitione cum
magna spe & fiducia.

INDUSTRIA XVIII.

Pro Usu Indulgentiarum.

TRiplicem potissimum quod-
que bonum opus fructum in
operantem transmittit : meri-
tum, satisfactionem, & impetra-
tionem. Sed uti benignissimus
DEUS infirmitati & tenuitati
nostræ providere dignatus est ta-
les actiones instituendo, quæ ex o-
pere operato, ut vocant, meritum au-

gerent, scilicet Sacramenta ; uti & Sanctorum patrocinia, Ecclesiæque preces, &c. quæ nobis etiam nil operantibus vim impetrandi haberent ; ita & pro uberiori, & celeriore promeritarum pœnarum satisfactione nobis thesaurum aperuit Indulgentiarum, quæ efficerent pœnæ temporalis in hac, vel altera vita exsolvendæ remissionem extra Sacramentum per applicationem satisfactionis Christi, & SS. Ex quo thesauro tu tua quoque debita multa & magna exsolvas.

1. Communium & particularium Indulgentiarum, quas lucrari commodè possis, & velis, summam tibi collige ; ac statis temporibus uti propone.

2. Indulgentiarum cum primis, quæ certis personis, & locis, & temporibus dari solent : dein stationum, ut vocant, in templo privilegiato (qualia ferè sunt Ordinum mendicantium) demum quas habes,

bes certis numismatis, &c. affixas; participem te facere statues: unde necessarium est scire modum, & tempora, quibus illæ conceduntur.

3. Ea, quæ ad lucrandas Indulgentias requiruntur, studiosè adimplere satages.

4. Expedit manè generalem intentionem facere, lucrandi omnes, quas potes, Indulgentias.

5. Cùm status gratiæ prærequiratur, imò ad plenariam remissionem omnium peccatorum, etiam venialium, supponatur, omninò actus saltem contritionis præmittendus est, priusquàm opera ad Indulgentias requisita exequaris.



INDUSTRIÆ EXTEMPORANÆ.

Allatas hæctenus actiones utcunque in certum ordinem redigere, & ad fixa tempora alligare licuit. Su-

persunt aliæ, quas extemporaneas vocamus, quia certis horarum, imò & actionum limitibus vix circumscribi possunt, sed pro varia vel necessitate, vel occasione, jam ad hanc, jam ad aliam adhibentur actionem, & tempori aliàs huic, aliàs alij deserviunt. Nihilominus ad suas saltem classes revocasse juverit; dum 1. de iis, quæ DEUM, 2. quæ superos, 3. quæ piacularibus flammis addictas animas, & 4. quæ superiores, 5. quæ quemvis proximum, & 6. demum, quæ ipsum operantem concernunt, totidem Industrias dabimus.

INDUSTRIA XIX.

Actionem erga DEUM.

Licet omnis actio nostra, ut bona sit, DEUM suo modo necessario respiciat, sunt tamen aliquæ, quæ speciali quadam ratione eum magis quodammodo attingunt.

Has

Has inter cumprimis est *Fides* exercenda statis temporibus, ut cum recitatur symbolum, cum urget contraria tentatio &c. Hac assentimur myster. revelato propter *Authoritatem DEI.*

2. *Spes*, quâ ad consecutionem æternæ beatitudinis, & quæ ad eam spectant, anima erigitur propter *DEI* omnipotentis promissum misericorditer auxilium. Hujus usus præcipuè est tempore *Orationis*, & in adversis.

3. *Charitas*, quâ *DEUM* propter se, & bonitatem suam diligimus. Exercere licet in omni opere, si purè ob ejus beneplacitum inchoetur, & perficiatur.

4. *Religio*, quâ *DEO* tanquam Creatori, & Domino cultum debitum exhibemus. Exhibetur autem 1. per altam de *DEO* æstimationem, ac profundam sui subjectionem. 2. Per devotionem, seu promptitudinem mentis in omni-

bus ad DEI cultum spectantibus. 3. Per ipsa particularia devotionis exercitia religiosè obita, qualia sunt oratio, obsecratio, laus, gratiarum actio, sacrificium, Sacramentorum usus. 4. Per alios religionis actus, quales sunt adoratio, oblationes, votorum, & juramentorum religiosa editio, & solutio.

5. *Præsentia Divinae memoria*, uti & *Timor DEI* non tam servilis, quàm filialis, & reverentialis, quo cum reverentia DEum præsentem agnoscimus, cum eoque tractamus, & ejus offensam fugimus. Exercitij hujus optima est occasio tempore tentationis, vel cum peccati illecebra stimulat.

6. *Conformitas*, & *Resignatio* ad quævis DEI decreta, permissiones, & omnem quantumvis adversum casum, eventumque sive nos, sive alios concernentem.

7. *Zelus*, quo unice promovere cupimus DEI honorem, & ad DEI

offensam sancto mærore conficimur, studiosè eam etiam in aliis amoliri fatagentes. Ejus frequens occasio est in ministeriis ad proximi salutem spectantibus.

In his, ubi te strenuè magis stas, aut oblatis occasionibus exercueris, eò rectiùs ad DEUM te, tuasque actiones ordinatas crede, & gaude.

INDUSTRIA XX.

Actionum erga B. V. Mariam, & Sanctos.

PRæter Patriæ cultum DEO soli competentem, alius isque inferior est Dulix, & hõc rursus superior Hiperdulix: ille Sanctis, hic DEI paræ Virgini ob singularem inter puras creaturas eminentiam congruit. ex multis in DEI param, & SS. devotionibus has, vel similes non tam selige, quàm rectè ordina.

I Eas, quas quotidie persolvere soles, ad B, V. preces, non ex-

ari-

arida consuetudine, sed cum devotionis affectu, & eo quidem majore, quo breviores sunt, perficies: uti sunt commendatio matutina, & vespertina, item illæ ad triplicem salutationis uti & ad cujusvis horæ pulsus, &c.

2. Inter longiores quotidianas preces, quibus DEI param coles, sit cum primis quotidianum Rosariū, vel certè hebdomadarium Psalterium. Dein Litaniam Lauretanam pro felici morte. Tertiò Officium parvum Immaculatæ Conceptionis pro dono castitatis, juxta tui statūs exigentiam.

3. Sabbathi dies peculiari cultu DEI paræ sacra sit, tum ordinaria opera ad ejus honorem offerendo, tum peculiaria eo die præstando, v. g. jejunium, vel aliud mortificationis genus.

4. Majori adhuc cultu festos DEI paræ dies prosequêris, tum meditatione consuetas iis applicando,

do, tum per usum Sacramento-
rum, tum per alia pia opera.

5. Tenerum, & filialem affe-
ctum erga B. V. sæpiùs in te reno-
vabis: uti est singularis erga ipsam
fiduciæ, amoris, simul & reveren-
tiæ, quam & ejus nomini, ac ima-
ginibus exhibere, tum interiori
cultu memineris, tum exteriori.

*Sanctos porrò reliquos devotè ut-
cunque colueris.*

1. Si Litanias de omnibus SS.
recitare soleas, eâ, quâ par est, atten-
tione, & devotione.

2. Si infrâ ponendam divisio-
nem praxi 2. circa electionem, &
cultum Patronorum, constanter
observaveris.

3. Si S. Menstruo non tantùm
certum in hebdomade diem, sed
maximè illum, qui ei sacer est, pe-
culiaribus devotionis, & virtutum
exercitiis consecraveris.

4. Si peculiarem Patronorum
tuorum tam communium statui,

Ordinis, &c. quàm particularium tuorum rationem habueris, quos inter cumprimis esto tuus S. Angelus Custos.

5. Si Festos SS. dies juxta eum, vel similem modum, qui Industriâ 17. traditus est, traduxeris.

Hæc, vel his potiora ubi præstiteris, certum eorum patrocinium, quin, & æternæ beatitudinis cum iisdem consortium spera; nec te spes confundet.

INDUSTRIA XIX.

Actionum erga Defunctos.

A Nimæ piacularibus Purgatorij flammis detentæ eò magis à nobis juvandæ sunt, quò minùs se ipsas juvare possunt: eò majori etiam misericordiâ dignæ, quo acriori miseriâ premuntur: eo quoque charitatis affectu prosequendæ, quo simili auxiliij vehementiore desiderio flagraret unusquisq; nostrum,

istrum, si pœnis involutus, iisdem ignibus ustularetur. Memor igitur dicti Dominici: *qua mensurâ mensi fueritis, eadem remetietur vobis.* Matth. 7. animabus Purgatorij vel similem feres opem.

1. Quotidie aliquid pro defunctoribus, saltem psalmum *De profundis*, &c. post pulsam vespertinum ad Salutationem Angelicam.

2. Feria 2. omnia satisfactionis opera pro iisdem offeres.

3. Quas licebit, Indulgentias iis applicabis, factâ eam in rem matutinâ intentione. Speciatim autem Menstruam Communionem eum in finem studiosè frequentare proderit.

4. Defunctorum illorum singulariter memor eris, quibus quocunque modo eras obligatus, vel alio modo conjunctus, item eorum, quos offendisti, vel quibus causa purgatorij fuisti: vel eorum, qui magis egent, & speciale auxilium

lium non habent. Vel qui magis DEUM in cœlis glorificabunt, & amabunt: qui in hac N. virtute, quam speciatim optares, magis excelluerunt, quas ut & tibi impetrent, vel alia in quavis necessitate constituto auxiliarem, & ipsi tibi operam præstent, rogare licebit.

INDUSTRIA XXII.

Actionum erga Superiores.

His debetur 1. Reverens observantia, exhibenda tum interno cordis affectu, tum externis reverentiæ signis, considerando in iis personam ipsius Christi, cujus vicarij sunt; item defendendo ipsorum honorem, præcepta, &c.

2. Integra, & perfecta obedientia cum resignatione propriæ voluntatis, & judicij. De his enim dixit Christus Luc. 10. *Qui vos audit, me audit.*

3. Calor animi cum Christia-

na simplicitate, detegendo ei, uti
& Confessario, intimas etiam con-
scientiæ latebras, ut te efficacius
dirigere possit.

5. Oratio pro iisdem.

INDUSTRIA XXIII.

Actiones erga alios Proxi- mos.

Proximis quibuscunque exhi-
benda est charitas, quæ in his
tribus consistit. Primò velle iis
propter DEUM vera bona singulis
convenientia. Secundò nolle iis-
dem vera mala. Tertiò velle sup-
portare in charitate illorum onera.

2. Bonum exemplum.

3. Zelus ad eos quomodocun-
que licebit, juvandos.

4. Humilis, & affabilis, maturâ-
que conversatio cum bona de o-
mnibus opinione, &c.

INDUSTRIA XXIV.*Actionum erga se ipsum.*

UT omne officium erga proximum consistit in ejusdem dilectione, ita ex opposito erga se ipsum ferè absolvitur in sancto odio sui: Ascetæ mortificationem appellant, quæ duplex est, externa, & interna. Externa constat his ferè tribus partibus. 1. Ut ab illicitis carnis, & sensuum voluptatibus abstineatur. 2. Ut etiam quandoque ex amore virtutis a licitis. 3. Ut corpus asperitatibus, & pœnitentiis quibusdam seu spontaneis, seu aliunde advenientibus (ut ex iniquitate tempestatum, ex malitia hominum, ex constitutione morbida corporis, &c) in servitutem redigatur. Interna mortificatio concernit omnes interiores affectus moderandos, ut amorem sensualem per virtutem castitatis, & temperantiæ; amorem terrenorum

rum per virtutem paupertatis, vel liberalitatis; amorem mundanum per virtutem humilitatis; amorem proprium per virtutem obedientiæ, &c.

Hinc ipse tibi facilè statues, quas tum externas corporis, tum internas animi mortificationes statis temporibus, vel oblatiis occasionibus exercere velis.

I N D U S T R I A

U L T I M A

De Preparatione ad bonam mortem.

ARS artium est ars bene moriendi; error in morte, quoniam semel tantum morimur, est omnium gravissimus, est æternus, emendari non potest; à DEO, & cælo in æternum aberratur. Si miles artem bellandi non discat, neque in ea se unquam exerceat; homo terribilem, peritum, & summè dolosum in

conflictu quomodo superabit? *Militia est vita hominis super terram*, Job. 7. Milites fumus omnes; adversarium habemus dæmonem, qui in ultimo agone omnes machinas admovebit. Vincemur facilè, non vincemus, nisi in hac arte bene instructi, & exercitati simus. Ut prò bene moriaris, quod unum est necessarium, sequentia præmitte.

1. Vive vitam bonam; qualis enim vita, mors est ita. *Vis non timere mortem, vive bene.* S. Aug. Vita tua constat futuris aliquot annis, mensibus, hebdomadis, diebus: vive juxta præsentis industrias, & bene vixisti.

2. Dum sanus es, multa bona operari potes: infirmus, debilis, & moribundus quid poteris? Fac nunc, quæ moriens facta fuisse voles. Nunc ora, nunc jejuna, nunc da eleemosynam.

3. Sæpius meditare, quid sit mors; quibus te rebus privet; quàm

quàm felix bonis, quàm infelix malis; quàm certa in se; quàm incerta quoad tempus, locum, modum, & quod terribilissimum omnium, etiam quoad statum animæ.

4. Singulis hebdomadis Dominico, aut Festo die, solus omninò, & separatus ab omnibus, ex teipso quare: *Si mihi nunc hoc loco moriendum esset, quo animo, & qua preparatione morerer? éstne aliquid, quod in presenti conscientiam meam gravat?* Si quid ejusmodi fuerit, dole, propone emendationem, idque quantocyùs confitere.

5. Singulas sacras communionem per modum viatici sume, & quidem cum eis actibus, quos, sumendo viaticum, exerceres. Eosdem actus quotidie elicere posses sub communionem spirituali, prætim vespertina, quam cum Exrema Unctione pariter spirituali dies maximò emolumentò.

6. Adjuva libenter in... os, &

moribundos orationibus, & operibus misericordiae spiritualis, & corporalis; agonizantium etiam quotidie memor esto; pro his, & pro animabus purgatorij diligenter precare.

7. Elige quosdam mortis tuae Patronos, quos eo fine quotidie coles, eisque mortem tuam commendabis. Ejusmodi esse possent S. Michaël, S. Angelus Custos, S. Josephus, S. Barbara, S. Menstruus, S. Patronus Nominis, Familiae tuae, aut Religionis &c.

8. Singularem affectum habe erga Sanctissimam DEI Matrem, & peculiari devotione recita verba illa. *Sancta Maria Mater DEI ora pro nobis peccatoribus, nunc, & in hora mortis nostrae, Amen.*

9. Prae aliis omnibus venerare Christum Crucifixum, & in cruc agonizantem; pete per ejus sanctum agonem ultimae luciae tuae felicem eventum, & mortem tuam

cum morte Christi conjunge, & dic: *Sit mors tua vita mea, O JESU! O JESU! tunc esto mihi JESUS, & salva me.*

10. Denique tibi, & aliis propè utilissimum erit, si quales virtutum actus exerceri solent cum moribundis, & quales tu in extremo agone elicere velles; eorum in vita habitum, & consuetudinem contrahas. Tales sunt actus fidei, spei, charitatis, gratiarum actionis, doloris, resignationis, desiderij DEUM videndi, &c Hos ante somnum, quasi jamjam moriturus, peropportunè elicere poteris ad modum, quem dabit inferius praxis ultima.





P R A X E S I N D U S T R I A R U M.

Ut expeditior sit usus Industriarum, hætenus traditarum, juverit earundem potiores præxes plerâsque ad formam orationis hic mox in promptu habere, & hunc, vel similem in modum usurpare.

P R A X I S I. Respondet Industriæ I.

Ante quodvis opus.

O DEUS, utinam hoc opus ad tuum beneplacitum, ad meum meritum, ad proximi ædificationem perfectè peragere sciam, velim, possim, & reipsâ sic peragam! Id certè offero tibi ô SS. Trinitas unus DEUS, velut debitum seruicij tuis meæ obsequium, in unionem meritum unigeniti Filij DEI, & ejusdem glorio-

rio.

riosa Virginis Matris, & omnium
Sanctorum, quo possum affectu, ad
Nominis tui gloriam, amorem, &
honorem, in gratiarum actionem
omnium beneficiorum, mihi aliis-
que collatorum, in satisfactionem
omnium peccatorum meorum, ad
impetrandam defunctis requiem,
mihi, & his NN. gratiam, tibi per-
fectè serviendi, & hanc cum primis
N. virtutem exercendi, &c. Susci-
pe, & perfice hoc desiderium me-
um, atque ad explendum bene u-
berem gratiam, & benedictionem
largire per infinitam tuam Boni-
tatem, per merita filij tui, & B. V.
Mariæ, ac SS. tuorum; ex te enim,
& in te, ac per te sunt omnia.

Breviùs. O DEUS desidero hoc
opus integrè, ac sanctè peragere.


Suscipe, quod tibi tunc ex puro
amore tui, & hujus N. virtutis of-
fero, ô desideriorum exauditor
DEUS! da quod jubes & jube,
quod vis.

In ipso opere quandóque ruminanda.

Confirma, & perfice ô DEUS,
quod operatus es in nobis. Placet
quod proposui.

Post opus.

Benedictus es Domine DEUS
meus, qui introitum, progressum
& exitum operi huic tribuisti:
tuum est, si quod in eo bonum est,
propter quod te laudo: meum, si
quid in eo peccatum, de quo do-
leo. Dignare ô piissime Domine
suscipere, & meritis unigeniti Fi-
lij tui supplere defectum me-
um; & da, ut, quod à me jam ne-
glectum, aliàs juxta benepla-
citurum tuum corrigatur,
& perficiatur.



P R A X I S II.

Respondet Industriæ II.

Pro modo surgendi.

Dum surgitur.

IN nomine DEI Patris, qui me creavit, Filij, qui me suo pretioso sanguine redemit, & Spiritûs S. qui me sanctificavit, surgò. Ipsi honor, laus, & gloria in sæcula.

Benedicta sit SS. Trinitas, unus DEUS, qui me incolumem ad hanc usque diem perduxit: ecce nunc dies salutis. Justificationes tuas ò DEUS custodiam, viam iniquitatis amove à me, *maximè hujus peccati N. quod speciatim cavere propono: in justificationibus tuis meditabor, de hac materia N.* Da, quod jubes, & jube, quod vis. DEUS, DEUS meus ad te de luce vigilo, &c. Psalm. 62.

Inter Induendum.

Cred. mihi, & in te, ò æterna infalibilis veritas, te ego supplex
quo

quo possum humilitatis, & reverentiae affectu adoro, laudo, glorifico, & nihilum meum agnoscens Majestati tuae me inclino. Spero in te, & ad te ô Bonitas infinita, ô Omnipotentia inexhausta, quidquid veraciter promisisti, vitam scilicet & gloriam sempiternam in futuro, in praesenti verò gratiam, & remissionem peccatorum; de quibus ex animo ob te summum bonum offensum doleo; simulque unice te amo propter ineffabilem tuam Bonitatem, & Beneficentiam: quam, & alias omnes infinitas perfectiones tuas tibi ô DEUS meus, & omnia! ex animo gratulor. Utinam ego, & omnes creaturae te agnoscant, ament, glorificent, & SS. beneplacitum tuum perfecte adimpleant. Ad hoc ergo me nunc, & per totam vitam, ac aeternitatem tibi prorsus offero, & consecro. Jube, quod vis, & da, quod jubes. Paternoster. &c. Ave Maria, Credo.

Preces matutine ad DEUM.

Adjutorium nostrum in nomine Domini; qui fecit cælum, & terram.

Confiteor DEO omnipotenti &c.

Misereatur mei omnipotens DEUS, & dimissis peccatis meis perducatur me ad vitam æternam. Indulgentiam, absolutionem, & remissionem peccatorum meorum tribuat mihi omnipotens, & misericors Dominus, Amen.

Dignare Domine die isto sine peccato nos custodire. Miserere nostri Domine, miserere nostri.

Fiat misericordia tua Domine super nos, quemadmodum speravimus in te. Domine exaudi orationem meam, & clamor meus ad te veniat.

OREMUS.

Domine Deus omnipotens, qui ad principium hujus diei nos pervenire fecisti, tuâ nos hodie salva virtute, ut in hac die ad nullum declinemus peccatum, sed

semper ad tuam justitiam faciendam nostra procedant eloquia, dirigantur cogitationes, & opera, per Christum Dominum nostrum, Am.

Dirigere, & sanctificare, regere, & gubernare, dignare Domine Deus Rex cæli & terræ, hodie corda, & corpora nostra: sensus, sermones & actus nostros in lege tua, & in operibus mandatorum tuorum, ut hic, & in æternum te auxiliante salvi, & liberi esse mereamur, Salvator mundi: qui vivis, & regnas in sæcula sæculorum, Amen.

Ad B. Virg. Mariam

SANCTA Maria, Mater Dei, & Virgo, ego N. novo amoris affectu te hodie in Dominam, Patronam, & Advocatam, quin & Matrem meam gratiosissimam eligo, firmiterque statuo, ac propono, me nunquam te derelicturum, neque contra te aliquid unquam dicturum, aut facturum, neque permitturum, ut a meis creditis aliquid contra

tuum honorem unquam agatur. Obsecro te igitur, suscipe me, licet indignissimum, in peculiarissimum famulum tuum, ad sis mihi in actionibus omnibus meis, nec me deseras in hora mortis, ô clemens, ô pia, ô dulcis Virgo Maria.

O Domina mea Sancta Maria, me, omnesque mihi commendatos in tuam benedictam fidem, ac singularem custodiam, & in sinum misericordiae quoad animam, & corpus, & omnia nostra, hodie, & quotidie commendo; fac, ut omnia nostra dirigantur, & disponantur desideria, verba, & opera secundum tuam, tuique Filij Sanctissimam voluntatem, Amen.

Ad S. Angelum Custodum.

Beatissime, ac gloriosissime mi Angele Custos, ego quamvis tuâ sacrâ custodiâ longè indignissimus, fretus tamen eximiâ pietate, & charitate tuâ, & zelo illo, quem habes erga salutem animæ

meæ, eligo te hodie in præsentia totius curiæ cælestis pro singulari Protectore, & Advocato meo, firmissimèque propono, tibi ad mortem usque fideliter semper obedire. Obsecro te igitur per gloriam illam, quâ in cælo jam frueris, ut acceptes hoc propositum meum, & gratum habeas sincerum hunc affectum erga te meum; adsis mihi in omnibus actionibus meis, gratiâque impetres à tuo, & meo Domino, ita me gerendi in omnibus cogitationibus, verbis, operibus meis, ut purissimos oculos tuos nunquam offendam, neque Divinam Majestatem ad justam contra me iram accendam. Adsis mihi semper, nec me deseras in hora mortis meæ, Amen.

Oblatio Matutina.

D*ie Dominica fiat, in honorem SS. Apostolorum præsertim Petri & Pauli pro Ecclesia Catholica; mihi verò pro impetranda æter-*

æterna beatitudine, & perseverantia in digno Dei obsequio.

Die Lunæ, in honorem ejus Sancti, cujus nomen gero, pro fidelibus defunctis; mihi pro impetrando eo, super quo facio examen particulare.

Die Martis, in honorem Sancti Angeli Custodis pro omnibus meis Benefactoribus; mihi pro impetranda puritate conscientiæ absque consensu in peccatum præsertim grave.

Die Mercurij, in honorem Sancti mei menstrui, & aliorum peculiarium Patronorum, pro Romano Imperio, & statu omni sæculari; mihi pro impetranda ea virtute, quam in S. Menstruo colendam sortitus sum, vel pro charitate proximi.

Die Jovis, in honorem Ven. Sacramenti, & aliorum Sanctorum, præsertim mei status, & ordinis, pro omni statu Ecclesiastico, & Re-

ligioso ; mihi pro impetranda devotione , & dono orationis.

Dui Veneris , in honorem Passionis Domini , & SS. Martyrum , pro conversione impiorum , tam fidelium , quàm infidelium , mihi pro impetranda mortificatione malorum affectuum , & pro felici morte.

Die Sabbathi , in honorem B. Virginis , pro meis parentibus , consanguineis , & aliis amicis , & quomodocunque mihi commissis , & commendatis , mihi pro impetranda observatione meorum votorum (si quæ habeo) item humilitate , & mansuetudine.

Praxis oblationis.

Tibi ô SS. Trinitas offero hodie , & deinceps omnes meas cogitationes , desideria , verba , & opera ; actus & omissiones ; officia & negotia , prospera & adversa , ex sincerissimo tui amore ad laudem , & cultum Sanctissimi Nominis tui in
unio-

unionem infinitorum meritorum
Filij tui Domini mei JESU Christi,
ejusdemque S. Matris, & omnium
Sanctorum, ac præsertim hujus
Sancti N. ad cujus honorem, & imi-
tationem ejusdem præclarissima-
rum virtutum, illius patrocini-
o impetrandam, tuam ô Deus meus
actionibus omnibus meis, præfer-
tim istis, & istis, benedictionem
uberem largiri digneris, ut per has
mihi quidem hanc N. gratiam, &
virtutem; aliis verò præsertim his
N. pro quibus peculiariter hæc o-
mnia hujusdiei opera, & satisfac-
tiones offero; obtinere valeam,
quod cuique expedit. Supplex
proin te piissime Deus obsecro pro
tua gratia, te verò ô Sancte N. pro
singulari, & gratioso tuo patrocini-
o, ut ex nunc omnia ad Divinæ
Majestatis honorem, & ad meam
proximorumque utilitatem per-
agam.

PRAXIS III.

Respondet Industriæ III.

Ante Orationem mentalem.

Loquebar ad Dominum, cum
sim pulvis & cinis.

Providebam Dominum in conspectu meo semper, quoniam à dextris est mihi, ne commovear. Confitebor tibi Domine in toto corde meo. In conspectu Angelorum pfallam tibi &c.

Initio Orationis.

Per signum Crucis de inimicis nostris libera nos Deus noster.

Deus in adjutorium meum intende, Domine ad adjuvendum me festina.

Actiones nostras quæsumus Domine aspirando præveni, & adjuvando prosequere, ut cuncta nostra oratio à te semper incipat, & per te cæpta finiatur. Per Christum Dominum nostrum, Amen.

Vel: Tibi Domine offero, quid-
quid

quid hoc tempore & loco cogitavero : ut purè ad honorem , & gloriam tuam dirigatur , propter te metipsum supplico , mihi adfis , ut ita orem , sicut tu vis ad Sanctissimi Nominis tui gloriam , animæ verò meæ utilitatem , Amen.

O Pater hanc tibi orationem unitam , & incorporatam orationi unigeniti Filij tui Jesu Christi suscipe , per eundem te obsecrans , ut sicut illius fuit , ita & mea oratio fit tibi accepta.

O Redemptor & Magister mi , doce me orare cum tali attentione , puritate & fervore , qualem tu , Patrem tuum orans , adhibebas , quò mea , ut tua , oratio grata illi sit.

O Sanctissime Spiritus , ego miser & ignorans peccator , quid orem ? sicut oportet , nescio. Tu itaque Deus meus age in me , ac move me , ut gemitibus inenarrabilibus petam , quo mea oratio accepta sit , à tam nobili procedens prin

principio, quale tu es, cui sit honor & gloria in æterna sæcula, Amen.

In progressu orationis.

PORRò in oratione, quæ fiet in loco privato & secreto, ad frequentem modum, qui quæsitis superius n. 7. respondeat, procedes, & meditaberis v. g. de Nativitate Domini, hac vel simili methodo: pones tibi ob oculos mentis stabulum Bethlemiticum, atque in eo neo-natum JESulum: postulabis deum in gratiam v. g. ô Divine Pusio, quem in humana carne hîc adoro, notum mihi fac, quid ex hoc admirabili Nativitatis tuæ mysterio discere debeam; da simul gratiam, ut id non solùm velim, sed & perficiam.

I. Considera: ô anima mea! Deum humana carne indutû, nasci voluisse in stabulo: ita per Evangelium te docet ipsa Veritas æterna Deus, qui adeò sapiens est, ut falli non possit; adeò bonus, ut fallere non velit. Credo ô Deus meus

te incarnatum, & hominem natum esse; adjuva incrudelitatem meam. Adoro supremam tuam in infantili licèt corpusculo Majestatem, &c.

2. Ecce! Deus ita se humiliavit, & exinanivit, ut formam servi, nempe miseri hominis induerit: Deus sapientissimus nasci voluit infans; omnipotens imbecillum corpus assumpsit: summa Majestas pro natiuitatis suæ loco elegit stabulum &c. idque fecit amore tui, ut nempe te redimeret: túque eum vicissim amares. O bonitas Dei infinita! gratias tibi, quas possum, reddo pro tanto beneficio: eheu doleo! quòd te unquam offenderim, quòd amoris tuo tam ingratus existiterim. Ah! amabo de inceptis, ô bone JEsule! tu deinceps totus meus sis, & ego totus tuus.

3. Et quidnî amem Deum, infinitè bonum, pulchrum, justum, misericordè, sapientem, potentè, &c. quidnî amem illum, qui mihi in-

numera quodidie, & hoc ipso momento beneficia præstat? quidni ex me toto amem eum, cui corpus & animam, & quidquid sum, debeo? Deus est finis meus ultimus, quem si non amo, æternùm infelix ero; si diligo, semper beatus in cælesti gloria existam &c.

4. Heu me miserum! quid egi? tantum Deum, aut hætenus non amavi, sed insuper peccatis offendi; aut tepidè nimis amavi. O Deus infinitè amabilis! deprecor ex corde omnes tui offensas; deprecor meum in diligendo teporem.

3. Non ita deinceps; sed amabo te ô Deus meus! ex toto corde meo, ex tota anima mea, ex omnibus viribus meis. Cavebo solerter à peccatis, præcipuè à N. in quod frequentius labor: fervens deinceps ero in tui cultu, nempe orationibus meis, auditione Missæ, Confessione, &c. nocte, præsertim in templo, sub sacro, & concione,
sub

sub Vesperis, & Litanis, orabo cum summa modestia, attentione, manibus conjunctis, ac sublatis &c.

6. Adverto bene, quòd me hactenus illa occasio N. illa familiaritas N. illa domus N. illud negotium N. ille socius N. in peccatum adduxerit, hæc omnia deinceps vitabo. Obfuit mihi hactenus amor proprius, licentia sensuum, oculorum, aurium, &c. & commodorum studium: at in futurum Majestas tua Divina, & Bonitas versabitur ob oculos, & amor proprio resistet. Impedimento erat respectus hominum, actiones aliorum, irrisiones, quas timebam: dehinc non quid alij agant, vel mihi dicturi sint, sed quid me agere deceat, & oporteat, cognito tanto in me amore perpendam.

Tu ô bone JESU! quem admodum dedisti, ~~quod~~ hoc agnoscerem, & statuerem; da quoque, ut in proposito semper perseverem. Credo
in

in te , mi JEfu ! adore te ; gratias ago tibi , doleo de peccatis , spero gratiam tuam , propono emendationem in omnibus , præfertim in his NN. amabo te semper ô JEfule mi ! amabo te Deum meum ! amor meus ! & omnia.

NB. Quòd si materia meditationis te deficiat , meditare modò præfatò de industriis , & praxibus hoc libello contentis ; quod meditandi genus & facilè & valdè proficuum erit.

Post orationem.

Ferè ut supra praxi 2. post quodvis opus.

PRAXIS IV.

Respondet Industriæ IV.

Ante sacrum.

OMnipotens sempiternæ Deus , ego licèt undecunque tuo conspectu (& Ministerio) si Sacerdos sit , indignissimus , fretus tamen

pie-

pietate tuâ infinitâ , & impulsus
desiderio tibi serviendi , te glorifi-
candi , memoriam mirabilium tuo-
rum recolendi , te laudandi , te pro-
pitiandi , & à te varia dona mihi ,
& aliis impetrandi , volo audire
(*Sacerdos dicit, celebrare*) Missam,
quam tibi offero ad laudem , & glo-
riam sanctissimi Nominis tui , in
recognitionem summæ & infinitæ
tuæ Majestatis , & in recognitio-
nem servitutis meæ innumeris ti-
tulis tibi debitæ , maximè in me-
moriâ & gratiarum actionem Do-
minicæ Redemptionis, Passionis, &
mortis Filij tui. Offero tibi etiam
ô Deus meus hoc Sacrificium lau-
dis , in gratiarum actionem pro-
pter infinitam gloriam tuam, & Fi-
lij tui, propter ineffabilia, cum pri-
mîs SS. Matri ejusdem dilectissimi
Filij tui, electis omnibus, & maximè
Sancto huic (cujus anniversarium
diem recolimus) demum & mihi,
collata dona & beneficia , maximè
hæc

hæc N. Utinam pro his gratus fuif-
 fem , per hoc ipsum tamen Sacri-
 ficium supple defectum meum.
 Sed & per ejusdem tanquam ho-
 stiaë propitiatoriaë virtutem dimit-
 te universa, de quibus ex animo do-
 leo , delicta mea ; uti & debitas pro-
 iis pœnas, pro quibus hoc infiniti
 valoris pretium tibi offero. Susci-
 pe etiam ô Domine hoc Sacri-
 ficium tanquam hostiam pacificam
 ad impetrandam defunctis requië,
 vivis gratiam , mihi perseverantiam
 in tuo Sancto servitio , in sancta
 fide Catholica , in hoc N. statu , in
 sancto tuo (Sacerdotali) ministe-
 rio , in gratia tua cum omni perfe-
 ctione Christiana (Religiosâ , Sa-
 cerdotali) filiali. Averte per hu-
 jus Sacrificij virtutem, hæc N. mihi,
 aliis mala : da istas N. gratias , vir-
 tutes , pro quibus tibi humillimè
 supplico , ac præsertim pro gratia ,
 ut dignè Sacrificio nuic tremendo
 assistam , Amen.

Ad

Ad Elevationem.

Ave verum Corpus Christi de
 Maria natum Virgine, verè
 passum, immolatum in Cruce pro
 homine. Estò nobis prægustatum
 mortis in examine, ô pie! ô dulcis!
 ô JESU Fili Mariæ.

Ave verus Sanguis Christi, qui
 pro me Crucis in ara effusus es,
 miserere mei, ô pie! ô dulcis! ô
 JESU Fili Mariæ, Amen.

*Repeti etiam suprâ posita oratio
 ante sacrum hîc posset.*

Communio Spiritualis.

Domine JESU Christe firmissi-
 mâ fide credo, ac profiteor,
 te hîc corporaliter præsentem in
 altari hostiam veram & vivam im-
 molari, qui pro me natus, passus,
 & in ara Crucis pro me immolatus,
 & mortuus es. Te ego Domi-
 num, ac Deum meum, Creatorem,

E

ac

ac Redemptorem meum suppliciter
 adoro & veneror, ac Majestati tuae & gloriae
 minima creatura tua me proster-
 no corde humili, & contrito
 quod ô DEUS meus non despicias
 Neque enim, hinc praesens es ve-
 lut Judex, sed ut amabilissimus
 Salvator, Pater, ac Medicus meus,
 ut sanes omnes spirituales meas
 infirmitates & miserias, uti sanare
 scis, potes, & etiam vis. In hac igi-
 tur infinita sapientia, omnipoten-
 tia, & bonitate tua confusus, spero
 per infinita merita tua remissionem
 omnium peccatorum, de quibus do-
 leo ob te summum bonum offensum,
 spero etiam omnia dona gratiae,
 & gloriae juxta tuum SS. benepla-
 citum, & meam utilitatem, pro
 quibus mihi conferendis, maximè
 his, N. te humillimè rogo, obte-
 storque; ô Deus animæ meae, uni-
 cum Bonum meum. gaudeo de ines-
 fabili gloria, & perfectione tua: uti-
 nam te unâ mecum omnes creatu-
 ra

plexæ, ut par est, agnoscant, ament,
 & glorificent. Id certè ego ex nunc
 desidero, & amore tui me, ac mea
 omnia tibi prorsus offero propter
 infinitam Bonitatem, & Beneficia
 tua, pro quibus te laudo, & bene-
 dico: neque aliud quidquam ulte-
 rius peto, ac rogo, quàm ut tecum
 omnino unus spiritus efficiar: &
 quia Sacramentali Communione,
 quam quidem, si liceret, unicè de-
 siderarem, tibi hodie uniri non me-
 reor, transforma me nihilominus
 totum in te, ut vivam ego, jam
 non ego, vivas verò tu in me.

A Nima Christi sanctifica me,

Corpus Christi salva me,

Sanguis Christi inebria me,

Aqua Lateris Christi lava me,

Passio Christi conforta me:

O bone JESU exaudi me,

Intra vulnera tua absconde me,

Ne permittas me separari à te,

Ab hoste maligno defende me.

In hora mortis meæ voca me,

Et jube me venire ad te,
 Ut cum Sanctis tuis laudem te
 In sæcula sæculorum, Amen.

PRAXIS V.

Respondet Industriæ V.

De Oratione Vocali.

Ante Orationem.

Domine in unionem Divinæ il-
 lius intentionis, & devotio-
 nis, qua ipse in terris DEO Patri
 tuo laudes persolvisti, has tibi ho-
 ras & preces persolvo ad laudem,
 & cultum SS. Nominis tui, & B.
 Virginis Mariæ, & Sanctorum tuo-
 rum, maximè hujus N. cujus anni-
 versarius hodie dies recurrit. Ape-
 ri igitur, ô Domine DEUS meus os
 meum, & labia mea ad benedicen-
 dum Nomen Sanctum tuum: munda
 cor meum ab omnibus vanis,
 perversis, & alienis cogitationibus,
 illumina intellectum, affectum in-
 flamma, ut dignè, attentè, & devo-

tè
 rec
 rea
 jef

R

A

1.

2.

3.

4.

5.

1.

2.

3.

A

tè hoc officium (vel has preces) recitare valeam, & exaudiri merear ante conspectum Divinæ Majestatis tuæ, Amen.

*RECITATIO ROSARII,
SEU PSALTERII.*

Ad Salutationis Angelicæ verba illa: IESUS dic.

In decade Rosarij gaudiosi.

1. Quem Virgo concepisti.
2. Quem visitando Elisabeth, portasti.
3. Quem Virgo genuisti.
4. Quem in templo præsentasti.
5. Quem in templo invenisti.

Ad tria Ave Maria post eadem verba dic:

Qui nobis augeat.

1. Fidem rectam.
2. Spem firmam.
3. Charitatem perfectam.

Ad Salutationis Angelicæ verba illa: IESUS dic.

In decade Rosarij dolorosi.

1. Qui pro nobis sanguinem sudavit.
2. Qui pro nobis flagellatus est.
3. Qui pro nobis coronatus est spinis.
4. Qui pro nobis crucem bajulavit.
5. Qui pro nobis crucifixus est.

Ad tria Ave Maria.

Post eadem verba.

1. Qui intellectum illuminet.
2. Qui voluntatem inflammet.
3. Qui memoriam roboret.

*Ad Salutationis Angelicæ*verba illa: *JESUS DIC:**In decade Rosarij gloriosi.*

1. Qui resurrexit à mortuis.
2. Qui Cœlos ascendit.
3. Qui Spiritum S. misit.
4. Qui te assumpsit.
5. Qui te in Cœlis coronavit.

Ad tria Ave Maria.

Post eadem verba.

1. Qui dirigat cogitationes.

2. Qui regat verba.

3. Qui gubernet opera.

Post Orationem.

O Piissima Mater DEI! supple hoc imperfectum obsequium meum apud dilectum Filium tuum. O piissime JESU suscipe hoc idem de manu B. Matris tuæ, unitumque tuis, & ejusdem, Sanctorumque omnium meritis offer æterno Patri tuo. Pater respice in faciem dilecti Filij tui, & miserere nobis pro beneplacito tuo ad maximam æternamque gloriam tuam, Amen.

Laudate Dominum omnes gentes, &c.

PRAXIS VI.

Respondet Industriæ VI.

De Lectione Spirituali.

Ante Lectionem.

LOquerè Domine, quia audit servus tuus. Eloquia tua, eloquia casta, argentum igne examinatum.

In Lectione.

Da, quod jubes, & jube, quod vis.

Post Lectionem.

Benedictus es Domine DEUS meus, qui illuminasti tenebras meas, & docuisti me facere voluntatem tuam: confirma hoc, quod inspirare, & operari in me dignatus es, DEUS cordis mei, & pars mea DEUS in æternum.

P R A X I S VII.

Respondet Industriæ VII.

De Studijs, &c.

Oratio ante quamcunque
Actionem.

Actiones nostras quæsumus Domine, aspirando præveni, & adjuvando profequere, ut cuncta nostra operatio à te semper incipiat, & per te cæpta finiatur.

Tua nos, Domine, quæsumus gratia semper præveniat, & sequatur: ut mandatis tuis semper inhæren-

ren-

rentes, quæ tibi soli placita sunt, & dictis exequamur, & factis, Amen.

Vel ad Filium DEI.

Offero tibi, ô misericordissime **J**esu cuncta, quæ nunc acturus sum in unione Sacratissimæ Passionis tuæ: ut per ejusdem merita solam tuam, tuique æterni Patris gloriam in omnibus quærendo merear, & bonis operibus abundare, & sanctissimæ utriusque voluntati laudabiliter, ac sincero corde deservire. Qui cum eodem Patre vivis, & regnas in sæcula sæculorum, Amen.

Vel ad spiritum Sanctum.

Hymnus de eodem.

Veni Creator Spiritus,
Mentes tuorum visita.
Imple superno lumine,
Quæ tu creasti pectora.
Qui diceris Paraclitus,
Altissimi donum **DEI**

Fons vivus, ignis, charitas,
Et spiritualis unctio.

Tu septiformis munere,
Digitus paternæ dexteræ,
Tu ritè promissum Patris,
Sermone ditans guttura.

Accende Lumen sensibus,
Infunde amorem cordibus,
Infirma nostri corporis,
Virtute firmans perpeti.

Hostem repellas longiùs,
Pacémque dones protinus,
Ductore sic te prævio

Vitemus omne noxium,
Per te sciamus, da Patrem,
Noscamus atque Filium,
Téque utriúsque Spiritum
Credamus omni tempore.

DEO Patri sit gloria,
Et Filio, qui à mortuis
Surrexit; ac Paraclito
In sempiterna, sæcula, Amen.

Vel ad Sanctos DEI.

Virgo Maria, beati mei Patro-
ni, cæterique omnes Sancti
Dei

Dei orate pro me, ut hoc opus juxta sanctissimam Dei voluntatem & beneplacitum ad Divinam ejusdem gloriam valeam perficere. Juvate, & dirigite gressus meos, ut non deficiam in via: sed feliciter, & constanter in cœpto perseverem, ut Deus glorificetur in me, & sit nomen Majestatis ejus benedictum in sæcula, Amen.

Vel

OMnes Sancti tui, quæsumus, Domine nos ubique adjuvent, ut, dum eorum merita colimus, patrocinia sentiamus; Sancta Maria, & omnes Sancti intercedant pro nobis ad Dominum, ut in his, quæ agere intendimus, mereamur ab eo adjuvari, & per merita Filii ejus JESU Christi salvari. Qui cum eodem Patre vivit &c.

Absoluto quocunque labore, occupatione, præsertim publica.

Suscipe Clementissime Deus precibus, & meritis Beatissimæ sem-

per Virginis Mariæ, & omnium
Sanctorum officium servitutis meæ,
& si quid dignum laude egi, pro-
pitiùs respice, quod verò negli-
genter actum, clementer igno-
sce. Qui in Trinitate perfecta vi-
vis, & regnas Deus in sæcula sæ-
culorum, Amen.

Tibi laus, & gloria æterne Deus
quod auxilio gratiæ tuæ, quæ
agenda suscepi, feliciter perfecta
sint, quæ tibi grata, mihi salutaria
esse concede. Benedictum sit dul-
ce nomen Domini nostri J E S U
Christi Nazareni Crucifixi, & Bea-
tissimæ Virginis Mariæ Matris ejus,
& tota Curia cælestis sit benedicta
in æternum, & ultra.



PRAXIS VIII.

Respondet Industriæ VIII.

De Examine particulari.

1. Gratiarum actio brevis.

QUàm bonus, & liberalis es erga me hucusque, ô Deus infinitè amabilis: humiliter agnosco beneficia maximè circa cautelam hujus N. defectûs, & exercitium hujus N. virtutis: & pro iisdem te laudo, & quo possum affectu, gratias ago.

2. *Petitio gratiæ.*

Dignare insuper omnibus his miserationibus tuis addere gratiam lapsus contra propositum meum agnoscendi, expiandi, & emendandi.

3. *Examen.*

1. Num propositum manè feci circa definitum vitium, aut virtutem, cum petitione gratiæ? an suo tempore quandoque interdum renovavi?

2. An, & quoties hucusque contra id sciens, vel ignarus egi?

3. An de singulis lapsibus dolui?

4. An remediis aptis studui, vel usus sum?

5. Quo fructu in hac curatione verbor? num à proximo examine, vel die, vel etiam hebdomade profectum, vel defectum sentio.

4. *Dolor.*

Quàm ingratus sum ego erga te ô Deus! sic abutens bonitate tuâ erga me, doleo de his, & omnibus lapsibus meis purè propter te. Ignosce, indulge, & supple per te.

5. *Propositum.*

En paratum cor meum ad omne beneplacitum tuum perfectiùs in hoc N. exequendum: perfice gratiâ tuâ desiderium meum: qui dedisti scire, & velle; da, & facere.

P R A X I S IX.

Respondet Industriæ IX.

BENEDICTIO BREVIS.

Benedicite *R.* Deus. Nos, & ea,
quæ sumus sumpturi, bene-
dicat Pater æternus, Amen. Pater
noster.

Gratiarum Actio.

Laus Deo, pax vivis, requies
defunctis, tu autem Domine
miserere nobis. Pater noster, &c.
Deus det Ecclesiæ suæ pacem, no-
bis, & benefactoribus nostris suam
gratiam, & post mortem vitam
æternam. Et beata viscera Mariæ,
quæ portaverunt æterni Patris Fi-
lium.

P R A X I S X.

Respondet Industriæ X.

De Recreatione.

Ante Colloquium.

Fone Domine custodiam ori-
meo, & ostium circumstantiæ

labiis meis. Non declinet cor meum in verba malitiæ. ps. 140.

Adsis mihi Domine Deus meus qui dixisti. Ubi sunt duo, vel tres congregati in nomine meo, ibi sum in medio eorum, Matth. 18.

Post Colloquium visitationis Ven. Sacramenti.

Eadem formula, quæ supra praxi 4. in fine de communione spiritali, & praxi 2. de oblatione matutina locum habere potest, item infra praxi. 15.

PRAXIS XI.

Respondet Industriæ XI.

De Examine generali.

Gratiarum actio pro beneficiis.

O Clementissime DEUS, quid retribuam tibi pro omnibus, quæ retribuisti mihi? ab æterno me dilexisti, & ut spero ad æternam gloriam me prædestinasti.

Crede

me
us
tre
ib
3.
tio
axi
ua
tu
frã
I.
id
s,
no
er.
ti.
et.

Creâsti me, cùm non essem, & post-
quàm perieram, homo pro me fa-
ctus Filius tuus, sanguine suo me
redemit. In tempore porrò me-
rita ejusdem tam copiosè mihi ap-
plicâsti. Ad cognitionem tui, veræ-
que fidei lumen in Ecclesia Catho-
lica me adduxisti, in ea etiam con-
servâsti, in eâque tot naturæ, & gra-
tiæ donis usque in hanc horam me
benignissimè locupletâsti. Deni-
que hoc die etiam me immeren-
tem, & ingratum tot corporalibus,
& spiritualibus, maximè istis NN.
beneficiis cumulâsti, à multis, &
gravibus peccatis, periculis, & pœ-
nis commeritis misericorditer præ-
servâsti, liberâsti. Pro his, & aliis
pluribus, etiam mihi incognitis
donis, próque tua infinita bonita-
te, quam agnosco, veneror, & glo-
rifico, te ô Clementissime Pater,
laudo, benedico, & ex toto corde,
quæ possum, gratias ago, atque in
gratiarum a&ionem infinita meri-
ta,

ta, & obsequia Filij tui unà cum meritis, & gratiarum actionibus B. Maria Virginis, ac omnium SS. Divinæ Majestati tuæ offero, unice optans, & rogans, ut semper gratum me exhibeam.

Petitio Luminis.

PER eandem Charitatem tuam misericordissime Pater dignare cæteris beneficiis tuis etiam hoc addere, ut mentis meæ tenebras gratiâ tuæ visitationis illumines, affectum voluntatis inflammes, & corroboret ad cognoscendum, expiandum, & emendandum, quidquid cogitatione, verbo, opere, omissione, ac præsertim contra meum examen particulare hodie peccavi.

Discussio Conscientiæ.

1. **Q**uomodo se habet meum examen particulare?
v. *suprà modum praxi 8.*

2. Quid

2. Quid ab ultimo examine quomodocunque deliqui?

3. Quid boni intermisi, ad quod vel obligatus, vel bonam occasionem nactus eram?

4. Qua intentione, & perfectione mea consueta opera peregi?

5. Quas tentationes, & malas inclinationes in me sensi?

6. Quibus mediis has imperfectiones expiare, & deinceps emendare poterō?

Dolor de peccatis.

O Pater misericordiarum! quid retribuui tibi pro dilectione tua, nisi peccata, negligentias, ingritudines? Utinam nunquam te offendissem, nec offenderem posthac in æternum? Tibi soli peccavi, & malum coram te feci. Doleo de his NN. maximè etiam, quæ contra examen particulare deliqui, & aliis omnibus peccatis, negligentis, & offensionibus meis
pro

propter te infinito amore, & honore dignum, quem his offendi. Propitius esto mihi peccatori, ô Deus summè amabilis, quem amonunc, & diligo super omnia, & ex hoc ipso tui amore te offensum ex animo doleo, & erubesco.

Propositum, & Petitio.

CUpio, proponôque seriò emendare omnia hæc peccata NN. & præsertim, quæ contra meum examen particulare commisi: statuôque emendare his NN. mediis. Perfice, & confirma ô Deus meus hoc tam imperfectum desiderium meum. In satisfactionem peccatorum meorum, & ad impetrandam gratiam tuam offero tibi pretiosam passionem, mortem, & universa merita unigenti Filij tui, & ejusdem S. Matris, ac omnium Sanctorum. Amen.

Pater noster, Ave Maria, vel *Psalmus miserere mei Deus &c. vel Hymnus Ambrosianus*, Te Deum laudamus.

Re-

Remedia ad emendationem.

- I. **F**irmum propositum sæpe, & maximè manè renovatum.
- II. Fuga occasionum, societatum, aspectûs, curiositatis audiendi, loquacitatis, &c.
- III. Primæ tentationis propulsatio per orationem, vel appellationem Nominis JESU, vel signum S. Crucis, vel propositam *Christi* crucifixi imaginem, vel illa verba: *Per Immaculatam Conceptionem libera me Virgo Maria, &c.*
- IV. Sedula Verbi DEI auditio, & piorum librorum lectio; nec non abstinentia à libris vanis, & lascivis.
- V. Consideratio præsentia DEI, & Angeli Custodis.
- VI. Dura corporis tractatio.
- VII. Fuga otij, & honesta mentis & corporis occupatio.
- VIII.

VIII. Memoria Novissimorum, & beneficiorum DEI, & Passionis Christi, & exemplorum Divinae Justitiæ in talia dilecta.

IX. Frequens usus Sacramentorum.

X. Examen particulare ad vitia extirpanda, &c.

PRAXIS XII.

Cùm Industria duodecima praxi distincta è prioribus non egeat : spectat hæc praxis adhuc ad Industriam undecimam, quâ docetur pia compositio ad somnum per preces nocturnas.

Preces nocturnæ post Examen conscientiaæ.

TE lucis ante terminum,
Rerum Creator poscimus,
Ut pro tua Clementia
Sis Præsul, & Custodia.

Pro

Procul recedant somnia,
 Et noctium phantasmata,
 Hostemque nostrum comprime.
 Ne polluantur corpora.

Præsta Pater piissime,
 Patrique compar unice,
 Cum Spiritu Paraclito,
 Regnans per omne sæculum,
 Amen.

Salva nos Domine vigilantes,
 Custodi nos dormientes, ut vi-
 gilemus cum Christo, & requiesca-
 mus in pace. Dignare Domine no-
 ãte ista sine peccato nos custodire.
 Miserere nostri Domine, miserere
 nostri.

Fiat misericordia tua Domine
 super nos, quemadmodum spera-
 vimus in te.

Domine exaudi orationem
 meam.

Et clamor meus ad te veniat.

O R E M U S.

Visita quæsumus Domine habi-
 tationem istam, & omnes in-
 si-

fidias inimici ab ea longè repelle,
 Angeli tui Sancti habitent in ea,
 qui nos in pace custodiant, & Be-
 nedictio tua sit super nos semper.
 Per Dominum &c. Amen.


O Domina mea Sancta Maria,
 me in tuam benedictam fidem
 ac singularem custodiam, & in fi-
 num misericordiæ tuæ, hac nocte,
 & in hora exitûs mei quoad ani-
 mam, & corpus meum tibi comen-
 do; omnem spem, & consolatio-
 nem meam, vitam, & finem vitæ
 meæ tibi committo, ut per tuam
 sanctissimam intercessionem, & per
 tua merita, omnia mea dirigantur,
 & disponantur opera secundum
 tuam, tuique Filij sanctissimam
 voluntatem, Amen.

TUæ tutelæ me hac nocte com-
 mendo ô Sanctissime Angele
 Custos, cui me usque custodien-
 dum Divina Bonitas commenda-

vir. Duc quæso cæcum , igno-
 rantem instrue , imbecillum con-
 forta , errantem reduc , pigrum
 impelle , dormientem excita , gra-
 dientem promove , & extremam
 illam , difficilémque luctam , quæ
 cum dæmonibus , & morte ipsâ
 futura est , mihi felicem procura,
 Amen.

OMnes Sancti orate pro me , ut
 ab eo merear adjuvari , &
 salvari , qui vivit , & regnat in sæ-
 cula sæculorum , Amen.

Benedicat , & custodiat nos o-
 mnipotens & misericors Do-
 minus , Pater , & Filius , & Spi-
 ritus S. Amen.



F

PRA.



P R A X I S
 HEBDOMADARIÆ,
 aut MENSTRUÆ.

*Correspondentes eodem ordine Indu-
 striis hebdomadariis, aut
 mensuris.*

P R A X I S XIII.

Pro Confessione Sacramentali.

*Ante præparationem. Petitio
 Luminis.*

Domine JESU Christe, vera
 mundi Lux, illuminans om-
 nes, qui in tenebris, & umbra
 mortis sedent, illumina per S. Spi-
 ritûs tui gratiam, cor, & conscien-
 tiam meam, ut perfectè, quidquid
 Divinæ Majestatis tuæ oculos of-
 fendit, recognoscere, & illud verè
 cordis contritione, humili confes-
 sione, & dignâ satisfactione expia-
 re valeam: qui vivis, & regnas cum
 Deo

Deo Patre, in unitate ejusdem Spiritûs S. Deus, per omnia sæcula sæculorum, Amen.

EXAMEN PECCATORUM

Contra DEUM.

NUM dubiis contra fidem cogitationibus deliberatè inhæsi?

Num diffidentia, aut pusillanimitati inordinatæ succubui?

Num blasphemis, aut aliis minus rectis de Deo cogitationibus locum dedi, num etiam verbis, & quomodo, ac quoties?

Num contra votum, vel juramentum aliquod deliqui, qualiter, & quoties?

Num sine necessitate, vel malè juravi, vel aliquid execratus sum, & quomodo?

Num preces sub peccato debitas neglexi, vel deliberatè subiis diu distractus fui?

Num alias consuetas preces omnia, aut distractè, & negligenter persolvi?

Contra te ipsum.

NUM superbus fui, magni me, & mea faciendo, alios contemnendo?

Num vanam gloriam quaesivi, acceptavi: num ejusmodi complacentias habui?

Num ad laudem propriam quid egi, num jactabunda verba locutus sum?

Num intemperans in cibo, & potu fui, tum quoad quantitatem, tum quoad qualitatem, nimiam aviditatem, vel extra tempus aliquid fumendo?

Num cogitationibus inhonestis curiosius inhæsi, num deliberatè delectatus sum, vel etiam assensum dedi in opus, & quale, & cum quo personarum genere?

Num idem feci visu, auditu, sermone, tactu, & quomodo, quâ causâ, cum quo?

Num injustè aliquid contra 7.

præ-

præceptum, vel votum paupertatis
accepi, dedi, & cujus pretij?

Num mentitus sum?

Num impatiens fui?

Num otiosas cogitationes, ser-
mones, & actus commisi?

Num tempus malè impendi?
aut alia bona omisi, &c.

Contra alios.

NUM quid contra Parentes, vel
Superiores deliqui, & in quo
genere peccati?

Num odium contra proximum
habui, quamdiu?

Num averfas cogitationes con-
tra proximum fovi?

Num reipsâ nocumentum affer-
re volui, & quale?

Num impracatus aliis sum ma-
lum, & quale? num deliberatè, &
seriò, vel ex subita passione, aut
consuetudine?

Num agnomina, convitia, aut
alia mordacia dicta intuli proximo,

ac cum gravi contumelia, vel ex
gravi odio?

Num improperavi, irrifi, subsan-
navi proximum?

Num contendi, vel contentio-
num, & discordiæ causa fui?

Num verberibus excepi?

Num temerè suspicatus sum de
liberatè, & in re gravi?

Num temeraria Judicia itidem
deliberatè habui, & an in re gravi?

Num detraxi proximo in re
gravi, occultâ, & cum ejusdem in-
famia? num tales detractiones au-
divi libenter, vel earum causa fui?

Num causa fui alterius peccati,
& qualis, & an scienter?

Num ex invidia de alterius bo-
no tristatus, vel malo gavisus sum,
& quali?

Post Examen.

Actus perfectæ Contritionis.

Domine mi JESU Christe, verus
Deus, & verus homo, Crea-

tor, & Salvator meus, doleo ex toto corde meo, quòd te offendim, quia tu Deus meus es, quem amo super omnia; firmiterque statuo nunquam posthac peccare, sed omnes peccandi occasiones devitare. Propono quoque peccata mea confiteri, pœnitentiam, quæ injuncta fuerit, exsolvere, & si quid alicui debeam, restituere. Amore etiam tui remitto injuriam à quocunque mihi illatam. Insuper ad expianda peccata mea, offero Majestati tuæ vitam, labores, & bona opera mea universa. Utì verò humillimè peccatorum meorum remissionem efflagito, ita confido ab infinita Bonitate tuâ, per merita Sanctissimæ Passionis, sanguinis, & mortis tuæ, ea mihi remittenda, præstandam etiam gratiam, quâ vitam meam emendem, & in sanctissimo servitio tuo in finem perseverem, Amen.

Ante Confessionem Sacramentalem.

Suscipe hanc confessionem meam piissime, ac clementissime Domine JESU Christe, unica spes mea salutis, & da mihi obsecro contritionem cordis, & lacrymas oculis meis, ut defleam diebus, ac noctibus omnes iniquitates meas, de quibus propter te offensum ex animo doleo. Aufer per hoc Sacramentum pœnitentiæ grave onus peccatorum meorum. Largire mihi Spiritum humilitatis, & veritatis, quo omnia peccata mea Sacerdoti Ministro tuo perfectè, sicut in conspectu tuo nihil eorum latere potest, detegam, atque ab eodem, virtute hujus Sacramenti absolutus, ad obsequium mandatorum tuorum, & obedientiam revertar. Qui vivis, & regnas, &c.

In Confessione.

IN nomine Patris, &c. Benedicte Pater. Confiteor Deo omnipotentem.

em.
me
Do.
ne
tri.
ocu.
no.
de
ani.
cra.
nus
mi.
ita.
Sa.
fi.
um
e ab
nti
da.
re.
di
po.
en.

renti, B. Mariæ semper Virgini, &c. omnibus Sanctis, & tibi Pater, quia peccavi nimis cogitatione, verbo, & opere. Speciatim autem ab ultima Confessione, quam peregi à N. diebus, me accuso.

Sequitur Confessio, quâ absolutâ dicitur.

DE his, & aliis meis peccatis, quorum non recordor, dico meam culpam, meam culpam, meam maximam culpam. Ideo precor B. Mariam semper Virginem, &c. omnes SS. & te Pater, orare pro me apud Dominum Deum nostrum, petoque salutarem pœnitentiam, & absolutionem.

Sub absolutione similes aspirationes elici possunt.

OJesu Deus cordis mei, quàm bonus fuisti erga me, quàm ingratus ego ad te. Ignosce, & propitiùs esto mihi misero peccatori. Doleo purè propter te, quòd unquam offenderim te infinito hono-

re, amore, obsequio dignissimum. En nunc paratum cor meum ad omne beneplacitum tuum. Lava me in sanguine tuo à peccatis meis, & super nivem dealbabor, &c.

Post Confessionem.

SIt tibi Domine, obsecro, meritis SS. Passionis, ac mortis tuæ, & B. Mariæ semper Virginis Matris tuæ, ac omnium SS. grata, & accepta ista confessio mea, ut, quidquid mihi defuit, nunc, & aliàs de sufficientia contritionis, de puritate, & integritate Confessionis, suppleat pietas, & misericordia tua, & secundùm illam digneris me habere plenius, & perfectius absolutum in cælo. Da mihi ex nunc integram & puram mentem, simplex, & rectum propositum, ut sanus factus non amplius peccem! ne deterius mihi aliquid contingat? sed potius (quod unicè cupio) ut nihil deinceps in tota vita mea quæram, aut

cong

concupiscam aliud, quàm quod animæ sit utile, ac Divinæ Majestati tuæ imprimis placeat, Amen.

PRAXIS XIV.

Pro Recollectione, & inspectione sui statûs.

Petitio Luminis.

Misericordias tuas, Domine, in æternum cantabo, qui me toties pretioso tuo sanguine, & SS. Sacramentis abluisti. O utinam te Deus animæ meæ nunquam offendissem, & tempus acceptabile in tuo servitio integrè, & perfectè collocâssem. Hoc si hætenus (uti doleo) non feci, jam certè id deinceps unicè desidero. Proin ne in antiquas recidam miserias, & defectus, sed potiùs ut sequenti hebdomade, mense, imò totâ reliquâ vitâ in novitate vitæ tecum ambullem, jam statum, & latebras animæ meæ, juva me lumine gratiæ tuæ

perscrutari, ut, quod in me malignum, corrigam: quod imperfectum, perficiam: quod verò bonum reperero, cum gratiarū actione tibi omnis boni fonti in acceptis referam, & per te conservem, ac absolvam: fac ô Domine Deus meus, ut vitæ meæ rationes instituas, ordinem, ad sanctissimæ tuæ voluntatis beneplacitum, Amen.

Puncta Examinis.

1. Quæ peccata, & quos defectus, ac imperfectiones hoc octiduo (vel mense) potissimum commisi, & quomodo deinceps ab iis me præservabo?

2. Quibus tentationibus, aut malis inclinationibus, & periculis obnoxium me sensi: quomodo occurrendum?

3. Quarum maximè virtutum penuriâ laboro; & cui præcipuè in meo examine particulari invigilabo:

4. Quomodo perago mea exercitia spiritualia erga Deum: 5

5. Quomodo obsecro propofita mea, & num actiones confuetas juxta fuprà pofitas Industrias inftituo?

6. Quos bonos inftinctus, motus, & alia fingularia beneficia hoc octiduo (vel mense) à Deo accepi, quo fruâu, & cooperatione mea?

Ad fmgula puncta convenientes affectus eliciendi, gratitudinis, fi bene; doloris, fi malè rem meam conftitutam reperero. Totum examen fequitur hæc, vel fimilis oratio.

O Domine Deus miferator, & mifericors, qui custodis patrum, & mifericordiam fervis tuis, gratias tibi ago, quia dignatus es indicare mihi ftatû animæ meæ, & voluntatem tuam. Exaudi, quæfo propter gloriam Nominis tui deprecationem meam, ut defectus istos NN. meos, de quibus vehèmenter doleo, emendare, ac pia defideria ista NN. perficere poffim,

sim, ut magnificetur Nomen tuum usque in sempiternum. Suscipe illa obsecro, & opera mea in unione meritorum Filii tui, & omnium Sanctorum tuorum: dispone de me vilissima creatura tua secundum, beneplacitum tuum. Resigno me, & projicio totum in te, omniaque accepto à manu tua paterna, ac toto corde te diligere, & tibi servire desidero. Jube, quod vis, & da, quod jubes.

*Alia Oratio D. Thomæ Aquinatis
Pro Reformatione vitæ.*

CONcede mihi misericors Deus, quæ tibi sunt placita, diligenter, & ardentè concupiscere, prudenter investigare, veraciter agnoscere, perfectè adimplere, ad laudem, & gloriam Nominis tui. Ordina statum meum, & quod à me requiris, ut faciam, tribue, ut sciam, & da exequi, sicut oportet, & expedit salutis animæ meæ. Da mihi
Do-

Domine Deus, inter prospera, & adversa non deficere, ut in illis non extollar, in istis non deprimar, de nullo gaudeam, vel doleam, nisi quod ducat ad te, vel abducat à te: nulli placere appetam, vel displicere timeam, nisi tibi. Vilescant mihi Domine, omnia transitoria, & chara sint mihi omnia tua propter te, & tu Deus meus super omnia. Tædeat me gaudij, quod est sine te, nec cupiam aliquid, quod est extra te. Delectet me Domine omnis labor, qui est pro te, & tædiosa sit mihi omnis quies, quæ est sine te. Frequenter da mihi Domine cor ad te dirigere, & in defectione mea cum emendationis proposito dolendo pensare. Fac me Domine Deus obedientem sine contradictione, pauperem sine defectione, castum sine corruptione, patientem sine murmuratione, humilem sine fictione, hilarem sine dissolutione, tristem sine dejectione,

ne, maturum sine gravitate, agilem sine levitate, timentem sine desperatione, veracem sine duplicitate, operantem bona sine presumptione, proximum corrigere sine elatione, ipsum ædificare verbo, & exemplo sine simulatione. Da mihi, Domine Deus, cor pervigil, quod nulla abducat à te curiosa cogitatio; da nobile, quod nulla deorsum trahat indigna affectio; da rectum, quod nulla deorsum obliquet sinistra intentio; da invictum, quod nulla frangat tribulatio; da liberum, quod nulla sibi vendicet perversa, & violenta affectio. Largire mihi Domine Deus, intellectum te cognoscentem, diligentiam te quærentem, sapientiam te invenientem, conversationem tibi placentem, perseverantiam te fideliter expectantem, & fiduciam te finaliter amplectentem, tuis pœnis configi per pœnitentiam, tuis beneficiis in vita vivi per gra-

gratiam, & tandem tuis gaudiis in patria perfrui per gloriam. Qui vivis, & regnas Deus in sæcula sæculorum, Amen.

P R A X I S X V.

Pro Communionē Sacramentali.

Ante Cōmunionem sub sacro cum primis locum habent ea, quæ praxi 4. tradidi circa initium sacri, & spirituales Cōmunionem; Tum aliæ de S. Cōmunionē orationes (ut passim habentur) recitari, vel quod ferè optimum est, iidem affectus, qui post Cōmunionem, elici possunt, mutatâ solùm temporis differentiâ.

Sub sacra Communionē Aspirationes similes.

1. Dominus meus, & Deus meus.
2. Dilectus meus mihi, & ego illi.
3. Quid est homo, quòd memores ejus, aut Filius hominis, quoniam visitas eum?

4. Quid

4. Quid mihi est in cælo, & à te quid volui super terram, Deus cordis mei, & pars mea Deus in æternū.

5. Domine tu scis, quia amo te.

6. Quis me separabit à charitate Christi?

7. Ego autem in Domino gaudebo, & exultabo in Deo JESU meo.

Post Ss. Communionem.

Praxis decem affectuum
juxta Industriam XV.

I. *Fidei.*

ERgône Redemptor meus Filius Dei, & B. Mariæ Virginis Dominus meus JESUS CHRISTUS sedens ad dexteram Patris jam animæ meæ tecum ipsemet subiit, & mecum, imò intra me verè præsens commoratur? ita fanè. Id equidem firmissima fide teneo, & credo tibi O Veritas ineffabilis, quòd tu idem, qui in utero à Virgine conceptus, in stabulo natus, in cruce

pas.

passus, mortuus es, & jam ad dexteram Patris sedes, quoad corpus, & animam tuam sacratissimam cum omni plenitudine gratiarum tuarum mihi, & in me adsis. Obstupefcite cœli super hoc, quis enim tu? quis ego? &c.

2. *Religionis.*

FAteor ô colende, adorande, tremende, Majestatem tuam majore cultu, & reverentia dignam esse, quàm ut ab ulla creatura, etiã ab ardentissimis Seraphinis, quin & a Religiosissima Matre tua satis coli possit. Quàm parum igitur à me præstari poterit? Nihilominus quo possum submissionis affectu te omni honore, cultu, & obsequio dignissimum agnosco, adoro, & revereor, unicéque opto, ut Nomen Sanctum tuum à me, & omnibus creaturis omni, quo fieri potest modo, agnoscat, colatur, adoretur, & benedicatur cum omnimoda
no-

noſtri ſubiectione, & recognitione
colendiſſimæ tuæ D. Majeſtatis.

3. *Gratitudinis.*

Quid porrò tibi ò liberaliſſime
Redemptor retribuam pro om-
nibus, quæ retribuifti mihi, à pri-
mo jam conceptionis meæ mo-
mento ad hoc uſque momentum?
imò à tota æternitate, quâ me ſic
dilexiſti, & ut ſpero, ad gloriam
æternam præordinaſti, in tempore
verò ſic me redemiſti; ſic redem-
ptionem tuam applicaſti, vocando
me ad fidem S. Catholicam, ad
hunc N. ſtatum, & tot alia, ac tanta
ſpecialia mihi conferendo benefi-
cia, imò temetiſſum tum alias, tum
hodie in hoc SS. Sacramento cum
omnibus theſauris tuis communi-
cando! agnoſco, ſuſpicio, laudo, &
benedico hanc tuam ineffabilem
Bonitatem; & pro his, aliisque
omnibus donis, próque infinita
gloria tua, quas poſſum, gratias
ago,

ago; & in gratiarum actionem pro innumeris, & maximis beneficiis cum primis SS. Matri tuæ, huic N. cujus festum hodie agimus, Sancto, omnibusque electis, ac tandem etiam mihi collatis, hoc ipsum sacrificium laudis, & hanc SS. Sacramenti sumptionem in memoriam omnium mirabilium tuorum offero, id unum exoptans, ut ego, & omnes alij debitas gratiarum actiones, & laudes semper referamus.

4. *Amoris.*

ET quomodo te non amem ô suavissime, ô gratiosissime hominū Amator, cujus deliciae sunt esse cum filiis hominum. Gaudeo. exulto de omni gloria tua, de omni perfectione tua; & utinam ab omnibus, ut par est, agnoscereris, & amareris: utinam Sanctissima tua voluntas, & beneplacitum tuum ab omnibus, acceptaretur, adimpleretur; in me certè ut voluntas tua

tua fiat , ex toto corde , anima , mente , & omnibus viribus amore tui ardentissimè desidero.

5. *Oblationis.*

Suscipe Domine universam meam libertatem. Accipe memoriam intellectum , atq; voluntatem meã. Quidquid habeo, vel possideo, & mihi largitus es, id tibi totum restituo , ac tuæ prorsus trado voluntati gubernandum. Placet , quod promisi , quod vovi , Amorem tui solùm cum gratia tua mihi dones , & dives sum satis , nec aliud quidquam ultrà posco.

6. *Contritionis.*

O Quàm serò te amavi Deus cordis mei, quàm serò te amavi , sed neque hîc mea substitit ingratitude. Insuper & toties, & tantopere offendi hanc ipsam tuã amabilissimam Bonitatem à te nunquam vel in minimo offensus , imò max-
mis

mis semper beneficiis affectus. Agnosco, erubesco, detestor hanc meam omnem ingratitude, doleo te unquam à me, vel ulla creatura offensum, quem in omnibus amo, & ab omnibus amari jam, & deinceps super omnia efflagito. Dimitte ô Domine, nec ulterius permittite, ut à me, vel alio quoquam offendaris.

7. *Spei.*

NULLAM quidem ô Justissime Deus meretur summa mea indignitas à te gratiam. Sed uti omnino in me, & meis meritis diffido, ita nihil ominus infinita bonitate, ac misericordia tua fretus ad te confidenter venio, qui nulla indignitatis meæ habita ratione, prior ad me venire hodie dignatus es, non ut officium Judicis, sed misericordissimi Patris, & Medici sanantis scientis, potentis, & volentis, omnes infirmitates meas exerce-
res

res, & me, quibuscunque vellem, gratiis locupletares. Qui enim te ipsum mihi dedisti, quomodo non omnia quoque tua lubens, ac volens, mihi communicabis? Unde ô clementissime Deus, ac Domine, hujus SS. Sacramenti virtute spero promissam in novissimo die resurrectionem, & gloriam quoque sempiternam, cujus hodie pignus, & arrham accepi. Spero quoque remissionem peccatorum per hunc panem vivificantem, & à morte peccati præservantem: spero omnia gratiæ tuæ auxilia, ut sumpto hoc pane ego sim (per charitatem) in te, & tu in me, & non moriar in æternum.

8. Petitionis.

HAc spe fretus non abscondo, sed cum omni fiducia expono tibi ô mise ricordissime Redemptor omnes misérias, & necessitates meas, omnem indigentiam, & pau-
per-

pertatem meam. Ecce his NN. laboro defectibus, his non rarò opprimor NN. tentationibus, his NN. exagitor periculis, &c. Sana Domine animam meam, & omnes haece spirituales infirmitates. Veniat invicem tecum in me tua profundissima humilitas, tua suavissima mansuetudo, tua virginea, & plusquam angelica castitas perfectissima obedientia, paupertas, & rerum temporalium, ac mundanarum contemptus, &c.

Da mihi Fidei, Spei & Charitatis augmentum, perseverantem item in tuo sancto obsequio affectum, perseverantiam in sancta tua Fide, hoc N. statu, in gratia tua cum omni perfectione Christiana (Religiosa, Sacerdotali) & filiali. Transforma me totum in te, ut jam non vivam ego, vivas verò tu in me, O Christe JESU, pars mea Deus in aeternum.

9. *Charitas proximi.*

Non solum autem pro me, sed & pro omnibus, pro quibus me vis orare, & quos omnes in visceribus tuis ô Suavissime JESU amplector, te rogo, & obtestor per Charitatem tuam, ut pro cujusvis indigentia auxiliarem & beneficentiam tuam manum omnibus & singulis porrigere digneris. Commendat tibi ô amatissime Domine universam cumprimis Ecclesiam, & omnes status tam Ecclesiasticos, quam seculares, singulaque ejus membra cumprimis summum Pontificem, Episcopum Diœcesis, Imperatorem, Reges, & Principes Christianos, & istas NN. personas, istas NN. necessitates, &c. Proponantur hic pro communibus, & charitatem communi, quàm private aliorum in communi, vel particulari nominandorum necessitates, cujus fusiorem formulam v. apud Christ. Mayer in Enchirid.

dust
n. 2.
dis
una
dam

O
una
tron
obtin
& gr
omn
man
& sc
nita
SS. S
æter
tuo,
sequ
simo
nisc
pe-t

dist. p. 3. c. 15. §. 6. & p. 2. c. 5. §. 5.
n. 2. Orabitur hic etiam pro defun-
ctis, & persolventur eæ preces, quæ
unà cum S. Communionem vi quarun-
dam Indulgentiarum requiruntur.

IO. Invocatio B. V. & SS.

O Regina Sanctorum omnium
Mater Dei, & Virgo Maria,
unà cum S. Angelo Custode, SS. Pa-
tronis meis electis omnibus, pro his
obtinendis, & in sacrificium laudis,
& gratiarum actionis perpetuæ, pro
omnibus beneficiis sanctissimæ Hu-
manitati dilecti Filij tui, tibi, ele-
ctis omnibus, & mihi à Divina Bo-
nitate collatis, præsertim per hoc
SS. Sacramentum, ac conferendis in
æternum, offer eidem dilecto Filio
tuo, tua, & omniū SS. desideria, ob-
sequia, & merita in unione Sanctis-
simorum suorum meritorum cum
miscere pidiis meis desiderijs, & im-
perfectis obsequijs: & ora pro no-

bis cum tota Curia cælesti gratia
illi æternas decantans.

O vos omnes SS. Patroni mei
SS. Angeli, Patriarchæ, Propheta
Apostoli, Martyres, Confessores
Virgines, cundâque electi benedi
cite, laudate, superexaltate, ma
gnificate Dominum mecum, mise
ricordias Domini in æternum can
tantes.

Benedicite omnia opera Domi
ni Domino, &c. *ut est in officio*
Laudes. Vel Te Deum laudamus
&c. *Vel Gloria in excelsis Deo*
Vel psalmus 102. Benedic anima
mea Domino, &c.

Modus salutandi maximè coram
SS. Eucharistia, SS. Christi Vulnera
& se, ac alios in ea commen-
dandi.

I. **D**ulcissime Jesu, adoro vul
nus Manus tuæ dextræ. De
mihî quæso victoriam de meipso
& gratiam extirpandi ex coram
meo omnia vitia, inclinationes

las. Recořendo tibi in hoc vulnus universalem sanctæ Ecclesiæ statum, conversionem infidelium, & reductionem ad eandem omnium hæreticorum. Pater noster, &c. Ave Maria, &c.

II. Patientissime JESU adoro vulnus manûs tuæ sinistrae. Rogo te, da mihi patientiam in omnibus adversitatibus, largire mihi fortitudinem in extremo vitæ momento, & gratiam evitandi mortem æternam. In idem vulnus tuum sacrosanctum commendo tibi tuos utriusque sexûs fideles. Pater noster, &c. Ave Maria, &c.

III. Amabilissime JESU, adoro sacratissimum vulnus pedis tui dextri. Da mihi quæso gratiam, progrediendi semper in melius in viatorum sacratissimorum mandatorum, in operibus bonis, & augmento omnium virtutum, secundum tuam sanctissimam, & Divinam voluntatem. In idem sacratissimum

vulnus commendo tibi omnes Ecclesiasticos, & utriusque sexûs Religiosos. Pater noster, &c. Ave Maria, &c.

IV. Benignissime JESU, adoro sacratissimum vulnus pedis tui sinistri. Obsecro te, libera me ab omnibus periculis, tam animæ, quàm corporis, & da mihi gratiam effugiendi omnia peccata, & peccandi occasiones. In idem vulnus sacratissimum recomendo propinquos, amicos, inimicos, & omnes omnino, pro quibus orare teneor. Pater noster, &c. Ave Maria, &c.

V. Amabilissime, & misericordissime JESU, indignissimus ego in tuo conspectu peccator, adoro vulnus sacratissimi lateris tui. Oro humillimè, ut ardentissimo tuo amore me incendas, ut omni inordinato affectu ad quascunque creaturas derelicto, tu solus semper cor meum inhabites. Commendo huic sacratissimo vulneri tuo

tuo omnes animas, quæ in purgatorio detinentur. *Pater noster, &c.*
Ave Maria, &c.

Potest hic modus exerceri, vel tempore S. Communionis, vel sub Missa, vel ad visitationem Venerabilis Sacramenti, vel etiam coram Crucifixi imagine.

P R A X I S XVI.

Pro audiendo Verbo DEI.

Ante Concionem.

Munda cor meum, Domine, ut semen Verbi tui cadat in terram bonam, & fructum afferat etiã centesimum. Desidero illud in mansuetudine suscipere devotè, tanquã edicta tua; & salubriter velut æger medicinam propono mihi applicare, ac similiter exequi ad honorem, & gloriam Nominis tui.

Sub Concione.

LOquere Domine, quia audit
 servus tuus. Doce me facere
 voluntatem tuam, &c.

Post Concionem.

EN Domine, hæc est voluntas
 tua. Sed non est volentis,
 neque currentis, sed tui Deus mi-
 serentis. Da itaque quod jubes, &
 jube, quod vis. Propono hoc N.
 tali tempore facere per gratiam
 tuam, Amen. Veni Sancte Spiritus,
 reple tuorum corda fidelium, &
 tui amoris ignem in eis accende.

PRAXIS XVII.

De Cultu Festorum.

Exercitium pro die Dominica.

OPater misericordiarum, & De-
 us totius consolationis, quàm
 magna, & multiplex tua est in me
 bonitas, ac misericordia, quam mi-
 hi hac insuper hebdomade in to-
 be

beneficiis corporis, & animæ liberalissimè exhibuisti, cùm tam paternè me conservâsti, à tot periculis, & malis eripuisti, præservâsti, tot gratiis, & inspirationibus illuminâsti; inflamâsti; ac in omnibus meis actionibus ita providè, & amanter me direxisti, duxisti. Benedico te ô Deus meus, & cum omnibus, electis tuis te laudo, glorifico, & in gratiarum actionem universa eorundem obsequia, ac cum primis unigeniti Filij tui, & ejusdem S. Matris merita supplex offero, cum iisdem obsequia uniens mea licèt pauca, & imperfecta hujus imprimis diei, quo cum sancta Ecclesia memoriam creationis, & reparationis meæ religiosissimo simul, & gravissimo animi affectu recolere desidero.

O si tibi Creatori, ac Domino meo, quem ex toto corde super omnia diligo, hac præterita hebdomade, imò totâ vitâ meâ studiosè,

& perfectè serviissem ; & nullâ etiâ
 minimâ offensâ in te deliquissem :
 sed agnosco teporem , & ingrati-
 tudinem meam , tum aliàs semper,
 tum hoc tempore commissam. E-
 rubesco , & doleo. Ignosce , &
 miserere mei , secundùm magnitu-
 dinem misericordiæ tuæ , respice ô
 Creator meus in opus manuum
 tuarum. Restaura illud ô glorio-
 se Redemptor per sanctam Resur-
 rectionem tuam. Perfice ô Spiri-
 tus S. Paraclite per gratiam tuam.
 Firmiter ex nunc statuo , ac propo-
 no , hunc cum primis diem , & to-
 tam subsequenter hebdomadem ,
 imò & totam reliquam vitam in
 tuo servitio prorsus impendere :
 omnia peccata , præsertim hoc N.
 sedulò devitare , in omnium virtu-
 tum , præsertim hujus N. exercitio,
 quos possum , progressus facere.
 Ac proin omnes cogitationes , de-
 sideria , verba , actiones , adversa ,
 prospera universa hujus diei , &

heb-

hebdomadæ, quin & totius vitæ, offero tibi in unionem meritorum dilectissimi Filij tui Domini mei JESU Christi, ejusdem gloriosæ Matris, ac omnium Sanctorum ad laudem, & gloriam Nominis tui, in memoriam, & gratiarum actionem Creationis, Redemptionis, & omnium beneficiorū mihi, & omnibus collatorum, uti & in remissionem, ac satisfactionem omnium peccatorum meorum, & aliorum: denique ad impetranda à tua Divina Bonitate hæc NN. mihi, & aliis dona, & gratias: pro quibus, uti & pro executione horum omnium desideriorum, & propositorum meorum humillimè te rogo, ut sicut dedisti velle, des etiam perficere, per eundem Dominum nostrum JESUM Christum Filium tuum, qui tecum vivit, & regnat in unitate Spiritus S. Deus, per omnia sæcula sæculorum, Amen.

Exercitium pro Cultu alicujus Sancti in ejusdem Festo.

Clementissime Deus, cui inexhaustos Bonitatis, Sapientiae, & Omnipotentiae tuae thesauros cum primis super unigenitum Filiū tuum, & per hunc super ejusdem Benedictam Matrem, omnesque Electos, ac speciatim etiam super hunc Sanctum N. cujus hodie festivam recolimus memoriam, effudisti: ego te benedico, laudo, glorifico, ac quas possum maximas gratias ago Divinae Liberalitati tuae pro omnibus donis, & beneficiis huic Sancto N. & per illum etiam mihi, aliis, totique Ecclesiae collatis; atque in gratiarum actionem offero tibi ejusdem S. Ecclesiae, ac mea omnia obsequia, orationes, aliaque devotionis exercitia, quae per tot sacrificia, & varia pietatis opera in debitae servitutis obsequium tibi undequocque hodie exhibentur.

Agno-

Agnosco hinc ô Domine , tuam infinitam Majestatem à me nunquam satis colendam ; inde verò meam , ac meritorum meorum sumam indignitatem in comparatione gloriosi hujus S. N. ejusque perfectissimorum obsequiorum tibi ab eo exhibitorum , in quorum proin unionem omnia mea quantumvis tenuia merita , & obsequia , seu potiùs illius ejusdem S. N. tibi offero ; in iisque tuam infinitam Bonitatem , Sapientiam , & Omnipotentiam agnosco , suspicio , colo , & amplector.

O utinam hujus Sancti N. vestigiis insistens earundem virtutum , N. spiritualium donorum ad laudem , & gloriam Nominis tui ego quoque particeps fierem , quibus ille in hac vita claruit , & tam studiosè tibi semper deservit. Scio Domine , quòd non sit abbreviata manus tua , quin imò id ipsum tu in me desideras , & ideo etiam tam

pretiosa gratiarū Charismata huic
 Sancto N. contulisti, ac festivo
 hoc die recolenda Ecclesiæ tuæ
 inspirāsti, ut imitari non pigeat,
 quod celebrare delectat, paratus
 quoque copiosa gratiæ tuæ auxi-
 lia per ejusdem Sancti N. inter-
 cessionem conferre.

Hac igitur spe fretus supplex
 per ejusdem Sancti N. merita, ac
 patrocinia te rogo, obtestorque
 pro eadem abundantanti gratia tua.
 Da mihi benignissime Deus hujus
 Sancti N. inconcussam fidem, spem
 firmam, ardentissimam tui, & pro-
 ximi Charitatem æmulari. Con-
 cede mihi illius profundam humi-
 litatem, constantem in adversis
 patientiam, & mansuetudinem, re-
 rum temporalium, ac mundana-
 rum conceptum cum generosa
 voluptatum abdicatione sectari.
 Da mihi imitari ejusdem omni-
 modam resignationem, & sanctam
 conformitatem cum Divina

Voluntate ; denique has speciatim NN. virtutes , quibus cumprimis indigeo : ut tandem cum eodem Sancto N. ejusdem post hanc mortalem vitam confors coronæ , & gloriæ effici merear. Per Dominum , &c.

Ad Sanctum.

O Beatissime , ac gloriosissime Sancte N. gaudeo, exulto, & gratulor tibi omnem gloriã tuam, quã post præclarissima virtutum merita jam æternùm frueris. In gratiarum actionem offero hodie Domino Deo tuo, & meo, non tam mea solùm, ùt quæ tenuia sunt, & imperfecta, quàm oblata cupio totius Ecclesiæ pia obsequia, sacrificia, aliãque omnia devotionis opera, quibus gratam meritorum, virtutumq; tuarum cõmemorationem hodie facimus. O si easdem, quas in te suscipio, colo, veneror, virtutum actiones imitari, quàm pro-

ximè possem! Supple defectum, & infirmitatem meam ô Sancte N. & per tuam intercessionem, cui optimus Deus, qui glorificantes se glorificat, hoc præsertim nuptiali tuo festo die nil negare poterit, impetra mihi has NN. gratias, & virtutes, ut in hac vita actionum tuarum sedulus æmulator, in altera verò æternæ gloriæ tuæ confors effici merear, Amen.

PRAXIS XVIII.

Pro usu Indulgentiarum.

Domine JESU Chrifte: tantis tibi debitis ob peccata mea sum obstrictus, ut ex me non possim satisfacere: ideóque in illorum satisfactionem, ex inexhausto thesauro meritorum tuorum, tuæque sanctissimæ Genitricis, & Sanctorum omnium, Indulgentiam à te per Vicarium tuum concessam, lucrari cupio, & unà animabus Purgatorii applicare.

IN-

INDULGENTIÆ
Sodalibus Marianis con-
cessæ.

Compendium Indulgentiarum.

Ex Bulla Gregorii XIII.

Indulgentiæ Plenariæ.

Si confiteantur, communicent :

1. Die admissiois ad Sodalitatem.
2. In articulo mortis.
3. In festo Titulari Congregatio-
nis.
4. In Nativitate Christi, & Ascen-
sione.
5. In festis B. V. Annuntiationis,
Assumptionis, Conceptionis, Na-
tivitatis.

Item Gregorius XIII. in Bulla con-
firm. Sodal. 10. Septemb. 1577.
concedit Indulgentias 20. anno-
rum iis, qui alium docuerint ali-
quid eorum, quæ in Sodalitatis
libello continentur.

Indulgentiæ unius anni

1. Quoties Sodalium, vel aliorum corpora ad sepulturam comitantur; vel si impediti fuerint, dum auditô signô campanæ pro viatico, vel sepultura, genuflexi (si potuerint) semel Pater & Ave pro infirmo, vel anima defuncti recitaverint.
2. Quoties cœtibus Marianis tum publicis, tum privatis interfunt.
3. Quoties officiis Divinis interfunt.
4. Quoties exhortationes sacras, aut pia colloquia audiunt, aut Conventum frequentant.
5. Quoties die feriato Missam audiunt.
6. Quoties conscientiam suam examinant.
7. Quoties infirmos, vel incarceratos, vel pauperes in hospitalibus visitant.
8. Quoties pacem inter inimicos conciliant.

9. Quoties Litanis intersunt, Sabbatho, Festis, & Vigiliis.
10. Quoties audiunt decantari Psalmum Miserere per Quadragesimam in templo Soc. JEsu.
11. Quoties Officium B. Virginis recitant.
12. Quoties dicunt Coronam B. V.

Compendium Indulgentiarum Stationum Urbis Romæ.

Propè quotidie sunt variæ Indulgentiæ, quas lucrari quoque poterunt ex speciali privilegio Sodalæ, si puri à peccato mortali, saltem per contritionem, dicant septies Pater & Ave in templo Societatis JEsu, ubi habetur, secus in alia quacunque Capella.

Indulgentiæ Stationum plenariæ.

Anuarij 1. quinquies. 2. 6. bis. 7. bis. 8. 9. 10. 11. 12. 13. bis. 15. 16. 17. 18. bis. 20. 21. bis. 22. 24.

25. 26. 27. bis. 28. 31. bis. Ultima Dominica mensis bis.

Februarij 1. bis 2. & 3. bis. 4. 5. ter. 6. 7. 8. 9. bis. 22. 24. ter. 26.

Martij 7. & 12. bis. 19. 20. ter. 21. 24. 25. quater. 26. 27. 28. 29. 30. 31. Singulis diebus Veneris hoc Mense.

Aprilis 1. bis. 2. 3. 5. 23. bis. 24. 25. 29. ter.

Maij 1. quinquies 2. 3. quater 4. bis 5. 6. ter. 7. 8. ter. 9. 10. bis 12. bis. 14. 19. 20. 21. 31. Quavis Dominica Mensis, & ab 8. hujus usque ad 1. August. quotidie ter.

Junij 2. 11. 13. 14. 15. 24. bis. 28. 29. ter. 30. Quavis Dominica Mensis plenar. & quotidie ter.

Julij 1. 2. ter. 3. 4. 5. 6. bis. 7. 8. 9. 14. 15. 17. bis. 18. 20. 21. 22. ter. 23. 25. ter. 26. 27. 28. 30. Et quotidie ter.

Augusti 1. & 2. bis. 3. & 4. bis. 5. & 6. quater. 7. 8. bis. 10. 11. 12. ter. 13. 14. bis. 15. septies. 16. bis. 17.

&

& 18. bis. 19. ter. 20. bis. 21. ter.
22. bis. 23. 24. quater. 25. 28. 29.
bis.

Septembris 1. 7. 8. octies. 9. 10. ter.
11. 12. 13. 14. quinquies. 15. bis.
16. 17. 18. 19. 20. bis. 21. quin-
quies. 27. 29. ter. 30.

Octobris 4. 5. 6. 7. 8. 9. 10. 11. 14.
18. bis. 23. 28. bis.

Novembris 1. 2. quater. 3. 4. 5. 6. 7.
8. bis. 9. 10. 11. bis. 19. 21. bis.
22. 23. 24. 25. 30. quater.

Decemberis 2. 4. 5. 6. ter. 7. bis. 8.
quinquies. 9. 10. 11. 12. 13. bis.
14. 15. 21. & 24. ter. 25. 26. ter.
27. quater. 28. 29. 30. bis. 31.
quater.

Diebus supra notatis semel in-
telligitur concessa indulgentia ple-
naria, ubi alius numerus non est
expressus.

Insuper ad quodvis sacrum ex
tribus Natalis Domini.

Pridie Paschæ & Pentecostes,
festo corporis Christi, itémque in
ip-

ipsis his festis, & per singulorum octavas quotidie.

Festo Ascensionis, Transfigurationis Domini, itémque SS. Trinitatis.

Primâ Dominicâ cujusvis Mensis, & triduo quatuor temporum per Adventum.

Item Dominicis Adventûs, Septuagesimæ, Sexagesimæ, Quinquagesimæ, & totius Quadragesimæ.

Primâ Dominicâ post Pascha.

Omni feria quarta, & Sabbatho totius anni.

Die Cinerum, & triduo sequenti.

Primâ septimanâ Quadragesimæ quotidie, secundâ, excepto die Lunæ.

Penultima & ultima septimana quotidie.

Indulgentiæ Stationum

non plenariæ.

Quotidie 60, 8. annorum Indul-

dulgentias, totidem quadragenas
& remissionem tertiæ partis pecca-
torum Sodales obtinent, insuper
100. aut plurium annorum omni-
bus Dominicis per annum, singu-
lisque diebus, per totam Quadra-
gesimam & Adventum. In Pascha-
te & per octavam. Diebus Roga-
tionum, & quatuor temporum.
Festo Ascensionis, & ab eo usque
ad Kalendas Augusti. Præterea
diebus:

Januarij 1. 6. 7. 8. 9. 10. 11. 12. 13.
14. 16. 17. 21. 22. 27. 28. 31. Item
secundâ Dominicâ post Epiph.

Februarij 1. 2. 3. 5. 9. 22. 24. 26.

Martij 7. 12. 21. 25.

Aprilis 1. 3. 5. 9. 23. 25. 28. 29.

Maij 1. 3. 9. 12. 13. 19. 20. 21. 31.

Junij 1. 2. 15. 22. 24. 26. 28. 29. 30.

Julij 2. 9. 20. 21. 23. 24. 27. 28. 29.

30.

Augusti 1. 8. 10. 11. 12. 13. 14. 15.

16. 17. 18. 19. 20. 21. 22. 24. 28.

A festo Assumptionis Deiparæ

usque ad ejus Nativitatem quotidie
12000. ann. & remissionem tertiæ
partis peccatorum.

Septembris 8. 14. 16. 20. 21. 27. 29.
30.

Octobris 4. 28.

Novembris 1. 2. 3. 4. 5. 6. 18. 19.
21. 22. 23. 24. 25. 26. 20.

Decembris 2. 4. 5. 6. 7. 8. 13. 24.
25. 26. 27. 28. 29. 30. 31.

In omnibus festivitatibus Deiparae
1000. ann. à festo Annunciationis usque ad Kalendas Augusti
quotidiè 12000. ann. Totidem
quadragenas & remissionem tertiæ
partis peccatorum.

*Sodales liberare possunt ani-
mam ex purgatorio, vi stationum
sequentibus diebus.*

Januarij 27.

Februarij 2. & 3.

Maij 6. bis, sibi sint præscripta.

Julij 24. sed eo die recitandum Ro-
sarium pro Summo Pontifice.

Sep^o

Septembris 8. & die Sabbathi quatuor temporum.

Novembris 2. & 30.

Decembris 27. Dominicâ septuagesimâ & quinquagesimâ.

In Quadragesima.

Post II. Dominicam Invocavit.

Die Martis, Mercurij, Sabbathi.

Post II. Dominicam Reminiscere, die Martis, Mercurij, Jovis, Veneris, Sabbathi.

Dominica III. Seu Oculi, & Sabbatho sequenti.

Dominica IV. seu Lætare.

Dominica V. seu Passionis, & die Veneris ac Sabbatho sequenti.

Dominica VI. seu Palmarum, & die Parasceves, seu Veneris sancto ac Sabbatho sancto.

Pascha, die Mercurij post Dominicam Resurrectionis.

Pentecoste, die Martis, Jovis, Sabbathi, post Dominicam Pentec.

Dominica SS. Trinitatis omni fe-

riâ quartâ, seu diebus Mercurij
per totum annum.



P R A X E S EXTEMPORANEÆ.

*Respondent itidem eodem ordine
suprà positis Industriis, & pro data
occasione, ac tempore, modò proli-
xiùs, modò succinctius exerceri pos-
sunt. Illis certè omnes nostræ actio-
nes, miris modis ad augmentum
Divinæ gloriæ, & propriij meriti fec-
cundantur, remansuræ aliàs sine
iis perquàm aridæ, & steriles.*

P R A X I S XIX.
Actionum, & Virtutum
erga DEUM.
Fidei.

O Infallibilis, & æterna & prima
Veritas Dominus meus, &
Deus

Deus meus, toto animo amplector hoc fundamentum Fidei, & corde, ore, ac opere profiteor, ac credo propter tuam infallibilem auctoritatem omnia, quæ dixisti, revelasti, & credenda proposuisti, mediante S. Ecclesia, præsertim ea, quæ continentur in Symbolo Apostolico, firmissimè protestans, me velle vivere, & mori in hac, imò & pro hac omni veritate. Cupio etiam, ut universus mundus te verum Deum, & quem misisti, Jesum Christum agnoscat, credat, & confiteatur. Adauge benignissime hanc eandem mihi Fidem, & fac: ut non deficiat fides mea.

B R E V I U S.

Credo, & firmissimè assentior huic symbolo, vel huic N. Articulo, quia tu ô æterna infallibilis Veritas Ecclesiæ tuæ revelasti.

Spei.

O Potentissime, misericordissime, fidelissime DEUS, per hanc,

hanc , & propter hanc eandem Omnipotentiam, misericordiam, & fidelitatē tuam infallibilem , quā mihi misericorditer, & potenter vitā æternam, & omnia ad eam necessaria promifisti, spero, & à te solo per auxilium gratiæ tuæ, & bona opera, quæ mediante eadem speciali gratia tua statuo facere, confequi desidero, & efflagito vitam æternam aliâque ad ejus consecutionem necessaria: unde ex hac eadem fiducia spero veniam peccatorum meorum, & vires ad superandas omnes difficultates in hac vita occurrentes, contra quas animum meum erigo tuâ ô Deus fidelissimâ & misericordissimâ nixus omnipotentia. Fiat misericordia tua Domine super nos, quemadmodum speravimus in te. In te Domine speravi, non confundar in æternum, Amen.

B R E V I U S.

Spero Domine hanc N. gratiam vel hujus N. successum per auxilium

lium

lium gratiæ tuæ , quia non est impossibile apud te omne verbum.

Charitatis.

A Mabilissime Domine Deus, summè gaudeo de tuis infinitis perfectionibus, & attributis, quòd solus tu sis, qui es summum infinitum bonum N. utinam ego cumprimis, & omnes unà tecum te, ut par est, agnoscant, colant, ament, magnificent. Suspicio, veneror, amplector amore tui omne beneplacitum tuum, & ad omnem Voluntatem tuam me paratum, & expeditum offero: servire tibi unice desidero propter infinitam Bonitatem tuam: & amore hujus omnia mea opera, affectus, & desideria ex nunc tibi dono, & dedico, ut iis te solum quæram, te solum amem, & sanctissimam tuam voluntatem adimpleam. Quod ut clementissimè confirmes, dignanter acceptes, & gratiosè in me perficias, humillimè rogo.

B R E V I U S.

O Amor, & Deus meus, & omnia! nil peto, nec amo extra te. Propter te, qui es omne bonum meum, & amore tui hoc N. tibi offero, ut in eo tuum adimpleatur beneplacitum.

Actus Religionis.

O Deus infinitæ Majestatis, ecce ego omni, quâ possum submissione, & humilitate positus coram tua Divina Majestate, agnosco me creaturam, te verò universorum absolutum Dominum, dignissimum, qui pro tali ab omnibus agnoscaris, honoreris. Hac eadem infima cordiali submissione excellentissimam Majestatem tuam adoro, tibi que quam possum reverentiam omnem, & honorem exhibeo, in omnibus præsertim devotionis exercitiis, quibus infinitam tuam excellentiam, inde omnimodam mei subjectionem, & à te de-

pen-

pendentiam contestatem volo, & intendo.

BREVIUS.

Supreme rerum Domine, in recognitionem immensæ tuæ Majestatis, meæque tibi debitæ servitutis, hunc N. actum, hoc N. opus Religionis, vel devotionis offero.

Præsentia Divina, & Amoris.

Summe, immense, timende, & tremende Domine! considerans hinc tuam immensam Præsentiam omnia implentem, penetrantem, comprehendentem; inde verò tuam infinitam Majestatem, in cujus conspectu tremunt omnes spiritus etiam cælestes, totus confusus coram te, descendo, & fugio in abyssum nihili mei, magnopere timens, ne te offendam, & separer à Divina gratia tua, sicut aliis multis evenit, eò quòd in conspectu tuo non rectè ambularent.

B R E V I U S.

Providebam Dominum in conspectu meo semper, quoniam à dextris est mihi, ne commovear, psalm. 15. Confige timore tuo carnes meas, à judiciis enim tuis timui. Psalm. 118.

Resignationis.

SANCTISSIME DEUS, ac PROVIDENTISSIME DOMINE; Voluntas tua est regula omnis Justitiæ, & Sanctitatis: es infinitè sapiens, potens, & bonus. Ergo toto cordis affectu revereor, laudo, amplector. 1. Quidquid per te, vel superiores meos mihi præcepisti, præcipis, præcipies. 2. eodem affectu patienter accepto, quæ mihi, vel aliis imiseris, vel permiseris ferenda, ac toleranda in bonis externis, famæ, vitæ, & quorumcunque bonorum, 3. Reverenter quoq; exosculor, & suscipio omnia tua judicia decreta, permissiones, & omnem circa me,

me, aliósq; ordinationē in divi-
sione donorum naturæ, gratiæ, & glo-
riæ, atque in his omnibus desidero
amori tui honoris, & beneplaciti
perfectissimè voluntatem meam
cum tua, in qua solùm mihi com-
placeo, & quiesco, conformare.
Quare te rogo, ut de me, meisque
disponere velis, quomodo, & quan-
tùm tibi placet ad majorem tuam
gloriam. Da, quod jubes, & jube,
quod vis.

B R E V I U S.

Domine in hoc N. quod me vis
agere, vel pati; vel quod imittis;
aut permittis; non mea, sed tua
voluntas fiat.

Zeli.

Domine Deus Zelotes justissi-
me honoris tui, qui gloriam
tuam alteri non das, sanctificetur,
obsecro, Nomen tuum, pro cujus
honore, & gloria augenda, & glori-
ficanda me tibi totū offero, & con-

H 5

secro

secro. Doleo, & summè crucior, te tam parùm, & à tam paucis agnoscì, coli, amari, quin etiam tot, & tam enormibus peccatis offendi. Da Domine Deus propter gloriam Nominis tui mihi, & omnibus uberrimè gratiam perfectissimè tibi serviendi, itaque te amandi, ut non ampliùs te offendamus, sed perpetuò te laudemus, & amemus, uti Angeli, & Sancti tui faciunt in cælo. En paratum cor meum ad omne tuum Ministerium, quod lubens, & gaudens amore gloriæ tuæ, & salutis animarum, juxta sanctissimum tuum beneplacitum aggredior. Ecce ego! mitte me.

B R E V I U S.

Propter gloriam, & honorem Nominis tui, O Deus meus, & salutem proximi, hunc N. laborem, hoc N. opus, hanc N. molestiam tibi lubens, volens, offero, sanctificetur in hoc N. Nomen tuum.

PRA

P R A X I S XX.

Actionum erga B. V. Ma-
riam & Sanctos.

*Praxis se manè, & vespere Dei-
paræ comendandi jam supra tradita
est; uti & Sabbathina opera eidem
consecrandi, & ejusdem dies festos
colendi, Rosarij item recitandi. Su-
persunt alia Industriæ hîc decla-
randa.*

Praxis salutandi ter in die B. V.
ad campanæ pulsum.

Angelus Domini nuntiavit Ma-
riæ, & concepit de Spiritu S.
Ave Maria &c.

Ecce Ancilla Domini, fiat mihi
secundum Verbum tuum. Ave
Mária, &c.

Et Verbum Caro factum est, &
habitavit in nobis. Ave Maria, &c.

Subjungi potest Oratio.

Gratiam tuam quæsumus, &c.

Vel

Benedictus sit Deus Pater, qui

me creavit, unigenitúsque Dei Filius, qui me redemit, Sanctus quoque Spiritus, qui vocavit me, & fecit mecum misericordiam suam. Ex te enim, & in te, & propter te sunt omnia, Deus meus, & omnia.

O R A T I O.

Pro Dono Castitatis ad B.
Virginem.

O Sanctissima Virgo, & Mater Maria! mundissimum puritatis speculum, & purissimum Virginitatis Exemplar: Ego N. ex intimo te imitandi desiderio, & amore Castitatis accensus, firmiter propono me, quoad vixero, nullis unquam inhonestis cogitationibus, aut desideriis scienter inhæsurum, aut consensurum, neque unquam aliquid cogitatione, verbo, opere, vel quovis alio modo facturum, aut permissurum, quod castitati adversum intelligam: & hæc omnia ad majorem Dei gloriam, animæque meæ salutem.

Te igitur ô castissima Virgo, ego indignissimus filius, per tuam Virginitatem rogo, mihi impetres à dilectissimo Filio tuo gratiam, & auxilium, ut, quod verbis offero, opere præstem, & sincerus semper Castitatis, & constans pietatis amator existam, donec tandem ad cælestes Filij tui nuptias admittar, suavissimis castorum epulis reficiendus in cælis, Amen.

Protestatio, & propositum retinendæ castæ mentis.

EGO N. coram castissima Virgine Maria, Angelo meo Custode, & tota cælesti Curia tibi, Deus cordis mei, quem ubique præsentem agnosco, & sanctè veneror, me sisto: ac protestor, me nolle unquam consentire, non modò facinori committendo, sed ne cogitando quidem, quantumvis adversarij vim inferant; detestor, execror omnes istas fæditates, ac spurcitiâs. Adeste, ô Maria, ô Angele

mi, Patronique castitatis meæ, tú-
que voluntatem meam confirma
ô bone JESU, quod per sanguinem
tuum, supplex precor, Amen.

AFFECTUS PRÆCIPUI

Ad invocandam, & colendam suis
temporibus Misericordiæ Matrem.

Ex

Laurentio Chiffletio S. J.

I. Fides de Deiparæ presentia.

CERTISSIMÈ credo, ô Regina glo-
riæ, te ad Solis æterni radios,
apertissimè dispicere omnes animi
te implorantis affectus. O feli-
cem deprecationum mearum præ-
rogativam, quòd tibi, quæ eas au-
dis, quàm mihi, qui eas concipio,
clariùs innotescant. Ave Maria.

II. Affectus Pœnitentiæ Charitate perfectæ.

CORAM Filio Mariæ de meis de-
lictis ingemisco; quibus omni
ex parte absolutam, atque infini-
tam ejus Bonitatem perfidiosus of-
fendi; quam nunc ex animo præ-

OM-

omnibus bonis amo, & amare stauo. Omnia & singula mea crimina sciens, ac volens summo odio detestor, & coram te Servatoris mei Optima Matre, illi ipsi Domino, quem aliàs læsi, fidele, ac perpetuum obsequium debere me profiteor, & cum ejus auxilio exsolvere decerno. Ave Maria.

III. Sanctæ animi demissionis.

Virgo, cui veritas vel in capitalis rei lingua placet; non nego me omni supplicio dignum, omni indignum beneficio. Noxam meam suppliciter, atque ingenuè fateor esse atrocem. Atque hæc ipsa est ratio, cur in causa mea deploratissima talem, qualis es, Patronam mihi coner adsciscere. Ave Maria.

IV. Reverentiæ.

Salve Domina omnium, quæ Conditor fecit, refecit Assertor. Salve Mater auctoritate apud Deum, & favore quodammodo omnipotens, Universalis beneficiorum Fili

lij Administra. Agedum potentissima, flecte oculos ad venerandum famulum, aliquid à te, tuis opibus, tuâque magnificentia dignum, petere parantem. Ave Maria.

V. Gratiarum actionis.

PRO tanta, quam adeò sæpè expertus sum, liberalitatis tuæ profusione, ô exuberans meorum omnium bonorum scaturigo, pro tot gratiis, quarum vix minimam partem novi, quid rependam, nisi ex intimis medullis effusa grati animi signa? Sincerè profiteor, me universa corpotis, atque animi bona Mariæ ferre accepta: neque me hoc unquam nomine posse exsolvi: cum ea omnia, quæ posthac etiam spero, ad eandem æris alieni mei sortem accessura sint. Verùm quàm illud mihi fortunatum est, ô Creditrix suavissima! quòd solvendo sim semper futurus impar: ut me tibi nexum tradam, perpetuisque amoris tui vinculis ob nomina
nou

non dissoluta captivus obstringar.
Ave Maria.

VI. Amoris.

A Mo te propter Deum, tam
Dilectam à Deo meo. Amo
te propter Deum tam amantem
Dei mei, tibi que omnes spirituum
creatorum amores opto. Ad fe-
licitatis, gloriæ tuæ recordatio-
nem totus gaudiô colliquesco. Ni-
hil mihi gravius hujus corporis
sarcinâ, quâ præpeditur animus, ne
ad te in tuo splendore spectan-
dam, colendâque avolet. Quid
plura de impetu mei erga te amo-
ris eloquar? plura dicere tentan-
tem ipsa tanti amoris suavitas elin-
guem facit, tacitôque ardore de-
pascitur. Illud unum mihi est sa-
tis, Formosa mea, Cælestis mea
Rosa, sancta meæ mentis oblecta-
tio, ac sensuum stupor, quod, quan-
ti te faciam, quantum te amem,
quantum amare velim; ipsa nôsti.
Ave Maria.

VII. *Fiducia.*

DA mihi, ô Mater pulchræ dilectionis, amorem Filij tui; da perennem in eo amore constantiam. Prospice vili servulo tuo: imple desideria mea: quod in corpore ad meam salutem, ad Filij gloriam mihi necessarium vides, benigna manu suffice. Boni consule, si sapius urgeo, non quasi benevolentiaæ tuæ diffidens, sed ut tibi gratum faciam, quæ maxime importunos flagitatores amas. Mater, & millies Mater, omnia vota mea, omnes meas curas tibi ex animo trado. Ave Maria.

DE CULTU SS. PATRONORUM.

Praxis colendi Sanctos maxime Patronos, jam supra suis locis tradita est, ut patet ex Industria 20.

Ad Litanias de omnibus SS. atten-
tè, & devotè recitandas hæc
non parùm juverint.

INitiô statue te coram Deo, ac
Curia Cœlesti, & pete à B. Vir-
gine amorem Dei; ab Angelis pu-
ram intentionem; ab Apostolis obe-
dientiam: à Martyribus patien-
tiam; à Confessoribus paupertatem;
& à Virginibus castitatem. Ad illa
verba; *libera nos Domine*, cogita,
quàm multa mala te circumstent,
& pete liberari. Ad *Te rogamus*,
vide, quàm multis egeas, eaque po-
stula à fonte omnis boni tibi præ-
sente.

P R A X I S XXI.

Actionum erga Defunctos.

*Post pulsum vespertinum ad saluta-
tionem Angelicam.*

DE profundis clamavi ad te
Domine: Domine exaudi
orationem meam.

Fiant aures tuæ intendentes in
vocem deprecationis meæ. Si

Si iniquitates observaveris Domine, Domine quis sustinebit?

Quia apud te propitiatio est, & propter legem tuam sustinui te Domine.

Sustinuit anima mea in verbo ejus: speravit anima mea in Domino.

A custodia matutina usque ad noctem speret Israël in Domino.

Quia apud Dominum misericordia, & copiosa apud eum Redemptio.

Et ipse redimet Israël ex omnibus iniquitatibus ejus.

Requiem æternam dona eis Domine, & lux perpetua luceat eis.

O R A T I O

Fidelium Deus omnium Conditor, & Redemptor, animabus famulorum, famularumque tuarum remissionem cunctorum tribue peccatorum, ut indulgentiam, quam semper optaverunt, piis supplicationibus consequantur. Qui vivis, & regnas in sæcula sæculorum, Amen.

*Alia praxes, defunctos concernentes
etiam suprâ traditæ.*

P R A X I S XXII.

Actiounum erga Superiores.

I. Observantiæ.

R Ex Regum, ac Domine Domi-
nantium Deus! Ecce ego in-
finitam Majestatem tuam non so-
lùm in temetipso, sed & in omni-
bus Personam tuam, vel ratione
originis, vel ratione officij, & pote-
statis à te acceptæ, vel ratione cu-
juscunq; excellentiæ repræsenta-
tibus, colo, veneror, & adoro. Hinc
cum primis Parentes meos singulari
pietatis cultu; hinc omnes Præla-
tos, & Superiores, exactò obedi-
entiæ obsequiò; hinc demum omnes
quacunque sapientiæ, virtutis, aut
alterius singularis doni prærogati-
vâ conspicuos, peculiari observan-
tiæ affectu prosequor, suspicio, &
revereor; & externis quoque de-
bitæ

bitæ pietatis, obedientiæ, & observantiæ testimoniis exhibere iisdem, atque ut ab omnibus similiter exhibeatur, ex animo exopto, nihil omnino permissurus, quod debitum iis honorem quomodocunque infringat, vel imminuat.

2. *Obedientiæ.*

Eosdem Prælatos, & Superiores meos veluti tuos, & Filij tui Vicarios agnosco, & in iis, eorumque præceptis temet jubentem suspicio, & veneror: ac proinde illorum præcepta non secus, atque tua audiam, ac in omnibus integrè etiam ad solum eorum nutum promptissimâ voluntatis affectione, perfectâ intellectus, & judicij submissione parebo, ac obediam amore ejus, qui pro nobis factus est obediens usque ad mortem, scilicet JFfus Christus Filius tuus in æternam benedictus, Amen.

3. Candoris, & Simplicitatis.

ET quoniam Simplicissime Deus abominaris in univertum eos, qui duplici sunt corde, cum simplicibus autem, & rectis sermocinatio tua; idcirco omnibus quidem præsertim vero Superioribus, & Patribus spiritualibus meis me sincerum, & candidum præstabo, detestis etiam, ubi opus fuerit, intimis conscientiaë meæ latebris, ut per eosdem rectius, suavius, & efficacius regar, & ab omnibus periculis præferver.

4. Orationis.

DA porrò Domine Deus iisdem Spiritum principalem, ut ea, quæ sibi, nobisque salubria fuerint, videant, & ad ea, quæ sibi, & nobis agenda cognoverint, convalescant. Pro hoc Spiritu iis impetrando (cùm gratum animum referre vix aliter queam) has tibi NN. preces, hæc N. opera mea pro iisdem offero.

PRA.

PRAXIS XXIII.

Adiouvum erga Proximos.

I. *Charitatis proximi.*

QUoniam ô Amantissime Domine simili præcepto me jubes proximum propter te diligere sicut me, tanquam opera manuum tuarum, creaturas, & imagines tuas infinitô Filij tui pretiô redemptas, & Divinorum donorum, quin & æternæ beatitudinis capaces, idcirco quemcunque ex istis ob dictas causas in visceribus charitatis suscipio, amplector, foveo. Eis ego omnia naturæ, gratiæ, & gloriæ, quæ habent, dona, ex animo gratulor; quæ non habent, & juxta beneplacitum tuum habere possunt, voveo, & exopto: quin &, quo possum modo, hæc eadem iis consiliô, auxiliô, procurare, promovere, & perficere juvabo. Absit porrô longissimè à me, ut cuiquam quantumvis mihi infenso, & contrario ullum exoptem;

optem, nedum inferam malum; quin potius eorundem miseriis, & malis cordiali affectu condoleo, & aliud nil efflagito, quàm ut iis omnibus vel liberentur, vel certè subleventur. Interim dum hoc fiat, intimo compassionis sensu eadem illorum misérias, morositates, & quascunque molestias misericorditer, & patienter supportabo, tolerabo: quando charitas operit multitudinem peccatorum, quibus & me premi nimium quantum ipse sentio.

2. Boni Exempli.

CUM autem opera præstent verbis, ut per malas imperfectas meas actiones non blasphemetur Nomen tuum, hinc omni contentione elaborabo, ut luceat lux mea coram hominibus, & videant opera mea bona, & glorificent te Patrem cœlestem horum omnium fontem, & datorem.

3. *Zeli.*

QUòd si insuper quodcumq; misericordiae, & charitatis obsequium ei exhibere licuerit, nulli ego labori, molestiaeue parcam, ut consiliò, adhortatione correctione, vel quovis alio modo lucrer fratrem meum.

4. *Amicitiae.*

SOcialis porrò vitæ ita studiosus ero, ut omnibus partes potiores deferam, & juxta cujusque statûs decentiam, eos quibuscum ago, reverenter, & amicè tractem absq; ullo superbiæ, aut impatientiæ, aut cujuscumque sinistrae de iis opinionis, quam nec mente quidem admittam, signo, indiciòque. Et in hoc Charitatis exercitio sic constanter pergam, ut per hanc dilectionem Filij tui Discipulus sim, & agnoscar, te donante per eundem Filium tuum Dominum meum **JESUM** Christum, qui tecum vivit, &

PRAXIS XXIV.

Actionum erga seipsum.

Mortificationis variae.

Domine Deus meus, qui mortificas, & vivificas, qui que dixisti per Filium tuum, quòd qui amat animam suam, perdet eam: & qui odit animam suam in hoc mundo, in vitam æternam custodit eam: ecce ego amore tui mortificationem Jesu in corpore meo jugiter portare, & carnem meam cum concupiscentijs meis crucifigere statuo.

Unde æternam mihi ab illicitis sensuum, & carnis voluptatibus indico abstinentiã, & cùm occasio tulerit, aut beneplacitum tuum suggesserit, etiam à concessis, & licitis, quin & corpus meum castigare, & in servitutem redigere allaborabo pœnitentijs tum spontaneis hisce NN. (*flagellationum, jejuniorum, cilicij gestatione, &c.*) tum ab extra ex necessitate quadam advenientibus,

bus, ut ex iniquitate temporum, malitiâ hominum, & morbiâ corporis constitutione, quæ omnia fortiter feram, patienter tolerabo.

Potissimum verò internis animi motibus, & affectibus compescendis jugem, & sedulam operam adhibebo. Proinde amore tui O Deus meus, carnis curam ne fecero, sed candidâ, & utinam etiam Virgineâ, quin & Angelicâ cordis, & corporis puritate, & mentis meæ munditiâ; insuper & honestissimâ cibi, potûsque temperantia, ut tibi serviam, & ad suaviores, & sanctiores delicias, & epulas, famem meâ hinc quasi porcorum filiquis non saturandam reservem, toto cordis affectu à te efflagito.

Minori adhuc desiderio ô Pater Pauperum Deus feror ad opes, & bona temporalia, sed iis quoad possum, & tibi placet, sponte liberèque cum vera spiritûs imò & rerum (si eò usque me vocare di-

gnatus fueris) paupertate renun-
tio, ut nudus nudum JESUM se-
quar, quod si id non omninò licet,
in sublevandis certè pauperum mi-
seriis affectum erga te magnum,
modicum verò erga ipsas mihi
concessas opes, liberali mente, &
opere ostendam.

Denique agnoscens extremam
meam hinc quidem vilitatem, &
miseriam; inde humani favoris, &
mundanæ laudis vanissimam incon-
stantiam, & inconstantissimam va-
nitatem, non solùm me ipsum pro-
fundissimè submitto, & humilio, sed
& humiliari, contemnique, quin
& omni opprobriorum genere af-
fici in votis habeo, amore JESU
Christi sic humiliati, & acerbissi-
mam mortem mei causâ perpeffi.
Rogo te proin ô benignissime Do-
mine, ut eodem tui amore, mihi,
mundo, amoriq; proprio mortuus
vivam, qui amore amoris mei di-
gnatus es in ligno crucis mori. Am.

PRAXIS Ultima.

Respondens Industriæ ultimæ.

Meditatio de morte.

IN præludio primo pone tibi ob oculos mentis duos moribundos, unum bonum, & perfectum Christianum, alterum malum & imperfectum: finge eosdem decumbere in eodem cubiculo, illum quidem ex parte dextra, hunc ex parte sinistra: hos inter tu consistes medius, & audi verba Isaiaë 38. utrique inclamari: *quia morieris tu, & non vives.*

In secundo præludio pete gratiam à Deo, ita meditandi de morte, ut, quocumque tempore venerit, te nunquam imparatum reperiat.

Considera I. *Quid sit mors?* & expendere verba Ezechielis c. 7. *finis venit, venit finis - - - ecce venit,* nempe hominis illius utriusque Mors, & hora postrema venit; finis gaudiorum venit, venit finis do-

lorum ; ecce venit finis temporis ,
quo seu gaudere , seu tristari , aut
boni quidpiam promereri possent :
utrique , justo & injusto in clama-
tur . *quia tempus non erit amplius.*
Apoc. 10.

Considera II. *Quibus rebus Mors*
privet justum , & quibus injustum.
Utrumque privat divitiis , honori-
bus , voluptatibus ; utrumque sub-
trahit paupertati , contemptui , do-
loribus hujus vitæ ; utrumque se-
parat à parentibus , fratribus , soro-
ribus , consanguineis , amicis , & cha-
ris omnibus , sine spe ulla eosdem
in hac vita revisendi : sed heu !
quàm dispari ratione ? magna faci-
litate relinquit omnia justus in
morte , quia cor suum ab iis in vita
abstraxerat : summâ violentiâ di-
mittit omnia injustus , quia cor ip-
sius eisdem sumè affixum tenetur.

Considera III. *Quàm certa sit*
Mors , & quære ex teipso : an etiam
tu morieris ? qui hæc legis , vel me-

ditaris? accipe responsum ex Isaia 38. *Hæc dicit Dominus : dispone domui tuæ, quia morieris tu, & non vi- ves. Morieris certò, quia statutum est hominibus semel mori. Hebr. 9. Moriuntur homines quotidie; au- dis campanæ pulsus, vides funera: moriuntur alij; & tu morieris; & tibi veniet ille finis; & tu omnibus illis privaberis.*

Confidera IV. *Quàm incerta sit Mors? Morieris certissimè; sed quando? sed ubi? sed quo modo? sed in quo statu animæ? in gratia Dei? an in peccato? hoc equidem incertissimum.*

Ergo morieris tu? ita: sed *quan- do? quo tempore?* fortè hoc anno; fortè hoc mense; fortè hac septi- mana; fortè hoc die; fortè hac hora. Velut fur, horâ, qua non putas, Mors tua veniet. Quid si hodie? quid si hac hora veniret? *essésne hoc momento paratus? attende, est negotium maximum.*

à momento pendet æternitas: *vigila, quia nescis diem, neque horam*: omnitempore fieri potest, ut evoceris in domum æternitatis; omni pariter, si sapias, tempore ad eundem paratus esto.

Ergo morieris & tu? ita; sed *ubi? in quo loco?* alius moritur domi suæ in lecto, in sella, ad mensam, ad fenestram, in postremo domûs angulo: alius moritur extra domum in platea, in templo, in loco sui officij, recreationis, lusûs, in horto, in agro, in sylva: alius in itinere, alius in bello; alius in terra, alius in aqua, &c. Et tu ubi morieris? nescis? hoc scias; ubicunque es, ibi mori potes; alicubi certò morieris; etiam atque etiam vide, ne te ullo in loco mors imparatum inveniat.

Ergo morieris & tu? ita: sed *quo modo? qua morte? subitanè? an diuturnâ?* Thomas Kempensis ait: *quàm multi putantes diu vive-*

re decepti sunt, & insperatè de corpore extracti? quoties audisti à dicentibus; quia ille gladiò cecidit; ille submersus est; ille ab alto ruens cervicem fregit; ille manducando obriguit; ille ludendo finem fecit? Alius igne, alius ferrò, alius peste, alius latrocinio interiit. Et quomodo tu morieris? quid si apoplectico fulmine tangeris? usum rationis, vel sensuum amitteres? morte demùm subitanèa exspirares? ah cave, differas ad lectulum, ad lethalem morbū pœnitentiam; quia pœnitentia sera rarò vera: qui tibi promisit spatium pœnitendi, crastinum non promisit.

Ergo morieris & tu? ita: sed in quo statu? gratiæ? an peccati? multi vocati, pauci electi; nescit homo, utrùm amore, an odio dignus sit: Jacob dilexit, Esau autem odio habuit. Quàm terribilium omnium terribilissimum sit, in peccato mori; & quàm optabilium omnium optabilissimum sit.

lis
qu
G
ta
G
pun
inf
egi
ner
& a
bus
om
era
me
me
qua
aliis
hor
jam
luf
non
Jan
tas

lissimum, , in gratia decedere, sequentia puncta docebunt.

Confidera V. *Vel potiùs aspice, & ausculta propè emorientem, juxta præludium primum, peccatorem; & conformiter primo ac secundo puncto exclamantem.*

Heu me miserum, & æternùm infelicem ! vitam propè omnem egi in deliciis, & voluptatibus; carnem meam delicatè habui: oculis & auribus; linguæ & palato, manibus & pedibus, toti corpori grata omnia indulsi, negavi nihil: non erat peccatum, carnî & sensibus meis volupè & jucundum, quod temerarius non admisi. Heu quæ & quanta gaudia solus, & quæ cum aliis charis meis suscepi ! & ecce ! horum omnium venit finis : non jam delectat somnus, cibus, potus, lusus, saltus, honor, numus, socius, non ipsa voluptas carnis delectat. Jam video miser, quia omnia vanitas, & affuctio spiritûs. Ah amara

I 6

mors,

mors quomodo separas me, & abripis à charis meis? momentaneum, quod delectabat, finitur; æternum, quod cruciabit, incipit finiendum nunquam. Ah quantùm aberravi à via Veritatis! vitam illam corpori perjucundam, putabam esse beatam; & ecce! quomodo novissima ejus ducant ad interitum. Ah pereo! juvate, juvate Parentes, fratres, sorores, amici, socij juvate, pereo! Ita perire me sinunt, maxime indigum omnes deserunt, nemo juvat. Desertus ab omnibus quid faciam? quò me vertam? ad Sanctos, quos nunquam vel tepidè nimis colui? ad Angelum Tutelarem, quem bene monentem toties sprevi, & præsentem tot peccatis offendi? ad Matrem misericordiæ, cujus filium me nunquam præstiti? ad Christum, quem tam gravibus peccatis rursus crucifixi? & quem jam severum Judicem experiar? ad SS. Triadem, cujus tremendam Ma-

jestatem toties vilipendi, eique res
vanas & turpes præhabui?

Væ væ mihi jam soli! non ha-
beo, qui me sublevaret. Miser!
pauper! & unicus quid agam? ipse
me juvem? non possum. Et quid
tandem mihi modò prodest tanta
mea pecunia, tanta dignitas, tanta
potentia, tanta doctrina, tanta pru-
dentia hujus mundi? Sola virtus,
sola pietas prodesse posset misero,
sed ubi est? quantum virtutis, &
pietatis exercere poteram sanus, &
vegetus! infirmus adeo & emoriens
possum nihil. O si ex tota vita
præterita in deliciis, & peccatis ex-
acta, vel unicus annus, vel mensis,
vel septimana rediret: quàm per-
petuis vigiliis, quàm ferventibus
orationibus, quàm severis jejuniis,
& carnis macerationibus, quàm lar-
gis eleemosynis, tam corporalibus,
quàm spiritualibus, ejusmodi tem-
pus pretiosissimum pro Deo, pro
cælo, pro anima mea transigerem,

omnia peccata fugerem, virtutibus
 universis vacarem! Sed quid in-
 cassum opto annum, mensem, septi-
 manam? utinam daretur hora vel
 unica ex millenis & millenis, quas
 bene valens, nimio somno, vel otio,
 cibo, vel potu, lusu vel inutili col-
 loquio, vanis aliis studiis, vel pessi-
 mis fortè actionibus perdidit! ah
 quanto fervore gratias Deo age-
 rem pro beneficiis in me licet pec-
 catorem collatis! quanta devotio-
 ne peterem à Spiritu Sancto gratiam
 peccata mea omnia agnoscendi, de-
 flendi, & ritè confitendi! quantâ
 diligentiam cogitationes, verba, &
 opera examinarem! quanta inten-
 sione & extensione dolorem ac
 propositum elicerem! quanta fide,
 spe, charitate, religione, humili-
 tate, &c. sanctissima morientium
 Sacramenta susciperem.

Jam verò finis venit, ecce venit;
 non possum amplius. Corpus totum
 acerbitate, & vehementiam mor-
 bi

bi fr
 per
 res
 vetu
 frig
 dan
 bus
 me
 det
 vio
 pos
 A&
 de
 auc
 san
 poss
 poss
 pos
 am
 De
 mi
 pe
 non
 M
 te

bi fractum est, ac lassatum; caput
 perturbatur; oculi cæcitiunt; au-
 res obsurdescunt; lingua ægrè mo-
 vetur; manus concidunt; pedes
 frigent; membra omnia lethalè su-
 dant; phantasia consuetis imagini-
 bus luditur; memoria planè deficit;
 mens conscia implacabiliter mor-
 det; voluntas à charis creaturis
 violentè abstrahitur, à Deo paulò
 post violentissimè abstrahenda.
 Actum est mecum; jam non est
 de tempore; *non possum*: monet,
 audio tantillum, & rogat per omnia
 sancta Sacerdos, ut confitear; *non*
possum: ut parcam inimicis; *non*
possum: ut restituam aliena; *non*
possum: ut illam creaturam non
 amem; *non possum*: ut credam in
 Deum, sperem, & amem super o-
 mnia; *non possum*: ut doleam de
 peccatis, & signa doloris edam;
non possum: ut invocem Matrem
 Misericordiæ; *non possum*: ut fal-
 tem in infinitis meritis Christi, &
 pre-

pretiosissimo ejus sanguine confidam ; denique *non possum* : & justô Dei judicô *non possum* : quia, *dum potui, nolui, dum maximè vellem, non possum*. Tempus enim non est ampliùs ; Mors adest ; Judex Christus jam fulminat ; fauces inferni patent. Pereo æternùm miser : nunquam in æternum gaudebo ; dolebo , & patiar semper ; quia peccavi nimis. O peccata ! ô socij ! ô æternitas ! ô æternitas ! ô infelix æternitas ! Ita *Mors peccatorum pessima*. Psalm. 33.

Confidera ultimò , & verte jam oculos tuos ad partem dextram, vide , & audi morientem justum. O me beatum , clamat ille, & æternùm felicem ; tandem venit hora optata , , millies desiderata venit ! tandem venit finis miseriarum mundi hujus, tentationum & tribulationum , non ampliùs erit opus somnô , cibô , potu , non ampliùs dolebit caput , non oculi , non den-

dentes, non collum, non manus, non pectus, non stomachus, non pedes; non amplius dæmon, non mundus, non caro ad peccatum invitabit; non allicient prospera, non terrebunt adversa; Finis omnium venit. Ah quàm libenter defero mundi hujus bona, quæ me subinde in Dei servitio turbârunt! quantum gaudeo me liberari ab amicis & sociis, qui mihi tot pretiosas horas suffurati sunt! valete amici & socij; jam obvios habeo Sanctos Patronos meos, Angelum Custodem, sanctissimam Virginem, ipse Christus adest, & vocat me: ecce paratum cor meum Deus! peccavi in vita mea, fateor! at confessus sum omnia, magno dolore, & seriô propositô; sacrum viaticum, & extremam unctiorem devotè suscepi; aliena restitui; inimicis peperci; quæ facienda erant, feci, omnia animo præsentem & deliberato; nihil me jam angit, nihil

retinet; *jamiætus moriar. Gen. 46.*
 Ecce Domine paratū cor meū; voca
 me, dum placet, & ego responde-
 bo tibi secundū magnam miseri-
 cordiam tuam. Dicam; credo in
 te Domine, ô æterna Veritas! spe-
 ro in te ô omnipotens Fidelitas!
 amo te supet omnia, ô summa Bo-
 nitas! gratias ago tibi, ô infinita
 Benignitas! doleo ex corde, quòd
 te summum Bonum offenderim:
 amore tui libenter morior, tantū
 te ampliùs non offendam. Non
 in meis, quæ defectibus plena sunt,
 operibus, sed in meritis Christi in-
 finitis, in sanctissimis ejus vulneri-
 bus, in meritis & intercessione Vir-
 ginis Mariæ, S. Angeli Custodis, &
 omnium Sanctorum confido. O
 Maria! ô beati este mei Advocati
 cum Custode Angelo. Mater Dei
 memento mei! monstra te esse Ma-
 trem, quia monstravi me filium.
 Jesu Fili David miserere mei, & o-
 stende pro me Patri vulnera tua.

Pa-

46. Pater respice in faciem Christi tui, & miserere mei ! ô amor Patris & Filij, miserere, veni, & fac, ut moriar in amore perfecto Patris, & Filij, & Spiritûs Sancti. Resigno plenissimè quoad omnia, & trado me totum in manus Patris Omnipotentis, Filij omnia scientis, & spiritûs S. me amantis ! ô Sanctissima Trias quando te perfectè videbo, & amabo ! ô amare ! ô ire ! ô sibi perire ! ô ad Deum pervenire ! credo, spero, amo, doleo, gratias ago, Pater in manus tuas comendo spiritum meum ! JESUS ! MARIA ! JOSEPH ! vestrî amore patior, vestrî amore morior ; vester sim totus, & nullatenus meus ; JESUS MARIA, JOSEPH. ô JESU esto mihi JESUS ! ô MARIA esto mihi MATER ! ô JESU ! ô MARIA ! Ita Pretiosa in conspectu Domini mors Sanctorum ejus. Psalm. 115.

Inspice jam te ipsum ; & vide, si tibi nunc moriendum foret, utrum cum impio, an cum justo decederes ;

res: si cum iusto? gratias age Deo, profice in virtute; & pete in colloquio perseverantiam. Si verò cum impio æternùm infelix abires, sine mora, dum tempus habes, convertere ad Dominum, confitere, & defle præterita; in futurum efficaciter meliora propone, & proposita exequere; Vive cum iusto, & cum eodem morieris.

Praxis Cõmunionis Sacramentalis & spiritualis reperies suis locis superiùs.

Praxis extremam unctionem spiritualiter, ut ita dicam, suscipiendi poterit esse, ut sequitur. Decubiturus accipe aquam benedictam, & signa sensus tuos in modum crucis; dum signas oculos, contritus ora, & dic: *per istam sacram signationem, & suam piissimam misericordiam indulgeat mihi Dominus, quidquid per visum deliqui. Amen.*

Eodem modo procedes ad aures,

Deo, res, nares, os, manus, pedes, & lum-
 collo. os, & orabis similiter v. g. ad au-
 cum res, & in fine orationis dices, quid-
 sine quid per *auditum* deliqui, Amen.
 ver. Idem ad reliquas corporis partes
 de. observabis.

Præter Præses juvandi infirmos, inge-
 niofus in proximum amor, si in te
 eo. est, affluenter dictabit.

Pro agonizantibus ora quotidie
 en. diligenter, præsertim verò dum
 lo. pulsus campanæ pro agonizante
 audis, inter cæteras preces tuas at-
 tem tentè & devotè recita etiam effica-
 fu. cem illam orationem, & dic: *Respi-*
 ur. *ce quæsumus Domine super hanc ani-*
 ne. *nam tuam, pro qua Dominus no-*
 no. *ster JESUS Christus non dubitavit*
 os, *manibus tradi nocentium: & Cru-*
 am *cis subire tormentum.*

Pro fidelibus defunctis utiliter,
 & non sine multiplici scœnore offe-
 res Deo bonorum operum tuorum
 omnium fructum satisfactorium.

Pra-

Praxes colendi sanctos Patronos, S. Angelum Custodem, Beatissimā Virginem, & Christum Crucifixum in libellis precatoriis facilè reperies. Optimam colendi methodum noveris esse, si virtutes Sanctorum, Deiparæ, & patientis Servatoris imiteris.

Actus denique, quos moriturus elicies, vel saltem elicere optares, longiores invenies in diversis libelli hujus praxibus, præcipuè Sacrificij Missæ, sacræ Communionis, & actionum erga Deum. Breves verò actus fidei, spei, charitatis, &c. habes in puncto ultimo meditationis de Morte; quos ante somnum facilè & utiliter cum Justo bene moriente elicere poteris.

H O C F A C,

Et

V I V E S.

LUC. 10.

CUL-

CULTUS FESTORUM

SOLEMNIMUM B. M. V.

Festum Immaculatæ Conceptionis
MARIÆ.

VIII. Decembris.

Mysterium, Origio Festi.

Hodie agitur memoria illius diei, quò Maria in utero S. Matris Annæ sinè labe originaria est concepta. Peculiaris hic erat Dei in Virginem favor, quò futuram Dei Matrem ne momentò quidem Diaboli mancipium esse voluit.

Et potuit utique id facere Omnipotens Deus; & ut faceret, etiam decuit: fecit itaque, & immunem servavit Mariam ab illa culpa, quam Adam, primus hominum parens, prævaricando Dei legem contraxit, & cum illo nos posteri omnes.

Hæc Virginis illibata conceptio olim res erat multi dissidij. Hodie unanimi consensione tota profite-

tur

tur Ecclesia, testantur Sancti Patres, & Concilia, & solida probant rationum momenta: contra quæ pugnare sive linguâ, sive calamô, sive clam, sive palam, lege cautum est à Christi Vicariis Paulo V. & Gregorio XV. aliisque.

Nondum tamen id fidei dogma est: nec hæreseos damnandi illi, qui secùs de Virgine sentiunt: quod peculiari Numinis providentia factum putant, ut scilicet habeant Mariani clientes, quo piè, ac spontè credendo suum uberius erga Deiparam affectum contestentur.

Cultus immaculatæ Conceptionis antiquissimus est, & sub ipsis Ecclesiæ incunabulis ab Apostolis usurpatus: nam à S. Jacobo primum in Hispaniam illatus est, & inde in regna cætera.

Solemnis festivitas tardiùs esse cæpit, scilicet sub annum Christi MLXX. authore Elfrico Remensi Præsule. Luctabatur hic miserè

CUM

Pa- cum maris fluctibus: at implorata
ant Virginis ope incolumis est elucta-
pu- tus: nec multò post, quod votò
sive tunc promiserat, Immaculatæ Vir-
st à ginis Conceptionem primus festi-
go- voriu Remis celebravit.

ma Gloriosa hæc initia subinde ampli-
qui ora reddidit Pap. Sixtus, hujus nom.
pe- IV. an. Christi MCCCCLXXVI.
fa- Hic festivam hanc celebritatem
ant non paucis concludi regnis, sed
on- universæ Ecclesiæ communem
Dei- voluit, aut certè stabilivit, largis-
simo diebus impertitis.

Documenta, Cultus.

I. A primo Conceptionis suæ mo-
mento absque macula originali fuit
& Maria. An & tu primævæ innocen-
tiæ florem illibatam tenes? hic ma-
ximus tuus thesaurus est, quem
omni studio custodire debes: semel
amissum nunquam recuperabis.

II. Maria etiam ab actuali culpa

immunis fuit. Quâ curâ tu declinas peccatorum maculas? non est majus in mundo malum, quàm labe peccati gravis: in hoc, ut ne incidas, Deum ora. Præstat millies mori, quàm tali labe contaminari.

III. In Maria ne quidem fomes peccati fuit. An tu etiam extirpas ex animo radices peccatorum? si maculari non vis peccato gravi, coercere pravos affectus, fuge peccandi occasiones, minimos nævos evita. Non diu eris sine macula, si hæc non præstiteris.

Offer omnia opera tua B. Virgini Mariæ.

Renova propositum de piè credenda & tuenda Immaculata Virginis Conceptione.

Si non horis singulis, sæpius saltem de die corde vel ore dic: per sanctam Virginitatem, & Immaculatam Conceptionem tuam Virgo purissima! munda cor † corpus † & animam meam †.

Ora-

Or

C

ce,

Vir

ind

um

per

ten

fili

go,

si p

Ed

me

cog

cu

na

Ag

nu

pu

ta

cip

co

Oratio ad Beatissimam Vir- ginem pro dono Puritatis.

O Regina Virginum , Maria!
amantissima Mater mea ! ec-
ce, JESUS benignissimus filius tuus,
Virgo, Joannem Virginem , & me
indignissimum, tibi Virgini in fili-
um adoptavit. Obsecro te igitur
per amorem , sanguinem, & mor-
tem ejus ; suscipe me in filium: quia
filium tuum , & te toto corde dili-
go, atque eligo in Matrem. Imò ,
si placet tibi , cum Bernardino, &
Edmundo tuo, in sponsam animæ
meæ. Malo siquidem mori , quàm
cogitatione, verbô, vel opere, ali-
cujus creaturæ illicito amore inqui-
nari. Sequi te cupio, & JESUM ,
Agnum, quocunque ierit, in æter-
num ; & , cum Angelo custode meo,
puritatem servare angelicam, jux-
ta statum meum in æternum. Ac-
cipe, & serva, ô dulcissima Mater!
cor & animam, & corpus meum, ti-

bi toto corde dicata in æternum,
Amen.

Festum Nativitatis Mariæ.

VIII. Septembris.

Myſterium, Origo Feſti.

REcolit hodie S. Mater Eccleſia memoriam illius diei, quo Maria futura Dei Genitrix mundo nata eſt, cujus natiuitas gaudium attulit Deo, Angelis, & hominibus: quòd nata tandem eſſet illa, è qua mundi ſalus, & felicitas eſſet naſcitur.

Nata eſt Maria, ut certior fert opinio, An. mundi 4038. in Nazareth, Galilææ urbecula: dum Rex Herodes regnaret in Judæa, & Romano præeſſet Imperio Octavianus Auguſtus.

Pater Virginis Joachim fuit, Mater Anna; hæc Bethlehemitis, ille Nazarethes, ambo de tribu Juda, & ſtirpe David. Erant conſpicui inter ſuos nobilitate; ſed magis amo-

re Dei, & excellis virtutibus præditi; toti intenti jejuniis, precibus, elemofynis: steriles tamen, & viginti annos improles.

Sterili nasci thorò Deus Mariam voluit, ut purissimæ Virginis ortus tribueretur gratiæ, non naturæ, & quemadmodum S. Damascenus ait: ut hoc miraculo ad miraculorum omnium maximum, scilicet ad incarnationem Dei filii, quædam quasi via sterneretur.

De festi hujus origine non eadem omnium est sententia. Sunt, qui cum Baronio cæpisse putant Anno Christi CCCCXXXVI. post Concilium scilicet Ephesinum. Alii id tribuunt Innocentio Papæ IV. Hic à morte Cælestini IV. contra machinationes Friderici II. Cæsaris in Pontificem ritè electus, statuisse fertur, ut in tanti beneficii memoriam, Natalis Deiparæ festivo ritu ageretur.

Hac opinionum inter se pugnan-

tium diverſitate nihil feſti hujus antiquitati detrahitur, omnibus enim certum, indubitatumque eſt glorioſum Virginis Natalem à ve- tuſtiſſimis Patribus Græcis, & Latinis peculiari cultu fuiſſe celebra- tum.

Pro agendis feſti hujus ſolemniis diem octavum Septembris Roma delegit, idque, ut fertur, cælo au- thore: ajunt enim anachoretam ali- quem eo die audiſſe quot annis cæleſtes genios, qui lætiſſimis mo- dulis omnem latè aërem imple- rent, & unà intellexiſſe, Angelo- rum Reginae natalem iis lætitiæ te- ſtimoniis à Superis agi.

Documenta, Cultus.

I. Nata eſt hodie Maria, futura Dei Mater. Si Mater Dei eſt, nihil poterit illi negare Deus. Spem er- go omnem poſt Deum in Maria col- loca, ad hanc cum fiducia in omni- bus neceſſitatibus accede. Omnia potes impetrare per Mariam. II.

II. Nata est hodie Maria, futura etiam tua Mater. An Mariam amas ut Matrem? an vitâ, & moribus te probas Mariæ filium? si vis esse Mariæ filius, aut innocens, aut pœnitens sis, oportet: non agnoscit illa filios nisi innocentes, aut serîo pœnitentes.

III. Nativitas Mariæ gaudium attulit cœlo, & terræ. Quomodo tu testatum facis tuum gaudium? testare illud constanti pietate in Mariam. Huic te indies in filium offer, illius patrocinium cum fervore implora, alios etiam ad cultum, & amorem Mariæ extimula. Sic gaudent genuini Mariæ filii.

Sæpius hodie, ac præcipuè dum surgis, gratulare B. V. de ejusdem Nativitate.

Hodie, & per octavam & aliàs etiam Matrem gratiarum invoca, dic corde & ore: *Monstra te esse Matrem.* Hoc pium exercitium maximè serviet in afflictionibus, ten-

rationibus, aliisque necessitatibus.

Recitari possent per singulos 9 dies 30. Ave Maria, quot nempe diebus in utero S. Annæ Maria fuit.

Oratio S. Petri de Nolasco ad Matrem Dei.

O Mater, & Domina! consolatio afflictorum, remedium indigentium, advocata illorum, qui ad tribunal piissimi filii, & judicis nostri causam salutis suæ agunt. O Regina ultra modum compatiens tuis subditis, quæ inter cæcas tenebras itineris es luminosissimus planeta, aurora nostrarum cogitationum, frænum peccatorum, flamma calefaciens nostram tepiditatem; stimulus ad excitandam devotionem. O Domina sedens super Seraphinis! ô Mater! ô Domina mea! esto Mater omnium. Monstra te esse Matrem per gloriam
Om.

Omnipotentis Patris in laudem
tui filij per amorem Spiritûs Sancti
sponsi tui.

Festum Præsentationis.

MARIÆ.

XXI. Novembris.

Mysterium, Origo Festi.

Hodie Maria à Parentibus suis
Anna & Joachim in templo
Hierosolymitano præsentata est,
& Dei obsequio dicata. Vix dum
trimula Virgo fuit: & jam ingens
pietatis ardor tenellum pectus cor-
ripuit. Tanta alacritate templi
gradus ascendit, ut volare potius,
quàm properare ad Dei obsequium
videretur. Fuit etiam omnium
prima, quæ ad retinendum decus
perpetuæ Virginitatis se votô ad-
strinxit.

Deo dicata vixit in parthenone
annos undecim, in legendis divinis
Scripturis, iisque meditandis so-

lers, assidua in oratione, in submissionis, modestiæque studio, in pudore virgineo, cæterisque virtutibus futurâ Dei Matre dignis.

In hoc virtutum studio otium, quàm potuit, maximè averfata est. Tempus ab operibus pietatis reliquum labori impendit: didicit quippe stamina ducere ex lana, lino, & serico, pingere acu, conficere amictus Sacerdotum, & quidquid ad ornatum templi pertinebat.

Tale virgineæ integritatis, pietatis, & solertiæ exemplum usque ad annum ætatis decimum quartum in Maria effulfit: eò usque scilicet, donec fors felicior Josepho obtingeret sancto, maturæque ætatis viro, qui purissimæ Virgini sponsus datus omni cura, ac studiò virgineam sponsam custodivit.

Festivitas præsentatæ Virginis admodum antiqua est, & dudum celebrata in Ecclesia orientali. Luculenta hujus indicia extant tum

in

in Græcorum Menologio, tum apud S. Germanum Constantinopolitanum Patriarcham, qui floruit circa Annum Christi 715. ut videre est apud Surium 21. Novembris.

Subinde ad occidentalem Ecclesiam translata præcipuè floruit in Galliis Anno 1375. sub Carolo V. Francorum Rege, cujus precibus, & insigni pietate permotus indulget Papa Pius II. ut præsentatæ Virginis memoria ab universo regno festivo ritu celebraretur.

A Paulo II. festum hoc calendario est insertum, iterum inde expunctum à Pio V. sed denuò restitutum est à Sixto V. & novo diplomate toto orbe propagatum Anno 1585. ad laborante potissimum Francisco Turriano è Soc. Jesu.

Documenta, Cultus.

I. Triennis fuit Maria, quando obsequio Dei sese dicavit. Disce à

teneris pietati affuefcere, & primum ætatis florem non mundo, non voluptatibus, fed Deo confecrare. Hoc omni jure à te Deus pofcit, hoc mille titulis tu Deo debes.

II. Maria pulcherrimis virtutibus in parthenone effulfit. An imitaris illius erga majores obfervantiam? affiduum precandi ftudium? mores compositos? pudorem virginæum? his Dei, hominúmque amorem Maria promeruit: his tu promereberis multas gratias, & gloriam æternam.

III. Maria tempus reliquum ab operibus pietatis labori impendit. Disce à Maria fugere otium, quod dicitur pulvinar diaboli. Nunquam fis fine utili labore, quem puriffima intentione ad Deum referas. Sic vitabis multa crimina, & cumulabis merita.

Hac die examinabis, quomodo te habueris cum Deo, cum proximo,

mo, & tecum ipso, quomodo horas diei impendas: quomodo proposita, aut si quæ habes vota implens, eadèmq; hodie renovabis.

Cum Maria te totum dedica divino honori.

Denique Virginem hanc roga, ut ex tuo corde faciat vivum templum Dei, totum, quod illi displicet, tollendo, ut tandem te admitat in templum gloriæ.

Oratio P. Eusebij Nierembergij.

Domina! supra omnes titulos, ob quos digna es, ut te ament etiam mille mundi, amo te potissimum ideò, quòd id summè placeat Deo meo, & quòd tu sic amari velis à me, ut amando te propter Deum, amem ipsum Deum. Suprema Domina! ecce ego servus, & filius tuus omni submissione, reverentiâ, & amore te prosequi volo; & per te omnia, quæ ago, offero

Deo meo, à quo per te beneficia omnia in me descendunt. Tu sacratissimis tuis manibus mihi das, quæ mihi mittit Deus; tu iisdem vicissim accipe, quæ reddo, & illa sanguine filii tui elue, pretiosa redde, ac ita offer Deo. Custodi me.

Festum Annunciationis

MARIÆ.

XXV. Martij.

Mysterium, Origo Festi.

GRata hodie recurrit memoria illius diei, quo Gabriel de cælo missus venit ad Mariam, Virginem piam, humilem, pudicam, tulitque felicissimum illud nuntium, eandem, volente Numine, Christi Matrem futuram.

Viso, auditoque nuntio erubuit primùm, timuit, & turbata est Virgo: at cùm intelligeret matrem se fore simul, & Virginem, timorem posuit, annuit Imperio, meruitque,

ut eo temporis momentô divinus Spiritus ex purissimo Virginis sanguine Jesu corpusculum formaret.

Urbs, in qua tum Virgo degebat, Nazareth fuit; domus Annæ & Joachim; conclave, in quo orationi, meditationi, cæterisque pietatis operibus Virgo vacavit; dies, ut ex Luca Evangelista desumitur, vigesima quinta mensis Martij.

Subinde inusitatô prodigiô sacram hanc domum cælum ornavit; è Galilæa primùm in forum Julium Anno 1692. mox in Italiam angelicis humeris translata est, ac reposita in sylvâ illustris fœminæ, Lauretæ nomine, ubi hodiedum sita Domus Lauretana appellatur.

Festi hujus originem debemus Apostolis, à quibus, si Bonifacio credimus, festivo cultu, ritúque coli cæptum est. Non desunt de hoc luculenta testimonia Gregorij Thaumaturgi, qui circa Annum Christi 230. maximis virtutibus & miraculis orbem illustravit. La-

Labentibus annis per varia regna hæc celebritas propagata est, Marianis clientibus Matris suæ cultum strenuè promoventibus, quos inter præprimis eluxit S. Raymundus tum Barcellonæ in Catalaunia Canonicus, qui anniversaria celebritate coli hunc diem fecit An. Christi MCC. amplissimis redivitibus in finem suppeditatis.

In quibusdam Ecclesiis aliquamdiu celebratur 18. Dec. ut colligitur ex Concilio Laodicensi, & Toletano X. at S. Ildefonsus rursus transtulit ad 25. Martij, scilicet illum diem, quo à priscis jam inde temporibus celebratum est, Augustino teste, in acerbissimæ mortis memoriam, quam eo die humani generis Salvator obiit.

Documenta, Cultus.

I. Deus misit Angelum ad Mariam Virginem piam, humilem, & pudicam. Pios nimirum, humiles & pu-
di-

dicos amat Deus: impiis, superbis, & impuris resistit. An tu pius es, humilis, & pudicus? his tu virtutibus tude: sine quibus nec Deo gratus esse potes, nec hominibus.

II. Angelus venit ad Mariam orationi intentam. Orantibus adest Deus, & gratias elargitur suas. In periculis, in tentationibus ad Deum ora. Ora frequenter, ierventer, cum spe, & fiducia. Sic orans facilè impetrabis, quod oras.

III. Ad Angeli alloquium timuit Maria. Si loqui cum bono Angelo Mariâ timuit, an non tu meritò auscultare timeas Angelo malo? vox mali angeli pravæ cogitationes sunt, quas identidem menti tuæ suggerit. Has tu excute velut scintillam urentem: vel momentò his sponte immorari, fœdari est.

Hodie manè, dum surgis, & indies per octavam horis singulis salutatione Angelicâ Mariam saluta. Visita, si vacat, sacellum Lauretanum,

num, & Litanias Lauretanas recitata, item 9. Pater & Ave in memoria 9. mensium, quibus Christus in utero B. V. delituit. Rosarium solito devotiùs ora.

Denique iterum te in filium, servum, & mancipium B. Virgini dedicabis.

Oratio S. Augustini.

O Beata Maria! quis tibi dignè valeat justa gratiarum, ac laudum præconia rependere; quæ singulari tuo assensu, mundo succurristi perditio? quas tibi laudes fragilitas humani generis persolvat; quæ solò tuò commercio recuperandi cœli aditum invenisti? accipe itaque quascunque, meritis tuis impares, gratiarum actiones; & cum susceperis vota, culpas nostras orando excusa. Admitte nostras preces intra Sacrarium exauditio- nis; & reporta nobis antidotum re-
con-

conciationis. Sit per te excusabile, quod per te ingerimus: fiat impetrabile; quod fidâ mente poscimus. Accipe quod offerimus; redona, quod rogamus, excusa, quod timemus: quia tu es spes unica peccatorum; per te speramus veniam delictorum; & in te, Beatissima, nostrorum est expectatio præmiorum. Sancta Maria! succurre miseris; iuva pusillanimes; refove flebiles; ora pro populo; interveni pro clero; intercede pro devoto fœmineo sexu: sentiant omnes tuum juvamen; quicumque celebrant tuam sanctam commemorationem. Assiste parata votis poscentium; & repende omnibus optatum effectum. Sint tibi studia, assiduè orare pro populo Dei; quæ meruisti benedicta Redemptorem ferre mundi: qui vivit, & regnat in sæcula, sæculorum, Amen.

Fe-

Festum Visitationis Mariæ.

II. Julij.

Myſterium, Origo Feſti.

MYſterium, cujus hodie memoria recolitur, eſt ſancta illa viſitatio, qua Maria, relicta tantisper urbe Nazareth, feſtinavit ad montana Judææ, & confectis ferè octoginta paſſuum millibus viſitavit cognatam ſuam Elifabeth.

Vix domum Zachariæ Virgo ſubiit, vix dicta ſalute gravidam Elifabetham amplexa eſt, & continuo in utero Matris Joannes exultat, à culpa liberatur originaria, Spiritu S. repletur Elifabeth, & ut omnia prodigiis agerentur, Zacharias etiam perditæ vocis uſum recipit, & futura præcidit.

Dici non poteſt, quantâ hæc inter lætitiâ Virgo exultaverit? quantâ Elifabeth? utriusque gaudium tantum fuit: ut ſuaviſſimis lachry-

mis

mis colliqueſcerent. His piis lacrymis pios cantus Maria addidit: nam ut Dei in ſe munificentiam pro viribus extolleret, anguſtiſſimum illud carmen inſonuit: Magnificat anima mea Dominum, &c.

Trimeſtre ſpatium in domo Zachariæ Maria exegit. Ancilla nulla ſic ſervit Dominiæ, ut illa ſervivit Eliſabeth. Tempus omne impendit cognatæ obſequiis, commodis, ſolatiis, quibus cum Eliſabeth amplius non egeret, domum unde venit, Maria repetiit.

Hæc feſtivitas Urbano VI. Papæ ſuam debet originem. Hic, ut teſtis eſt Baronius, circa annum 1385. author extitit - ut Mariæ Eliſabethæ viſitantis memoria feſtivo ritu ageretur.

Quod piè, ſanctèque ab Urbano conſtitutum eſt, non multò poſt pari auctoritate firmavit Papa Bonifacius IX. fecitque anno Chr. 1389. ut hæc nova in Virginem pietas

tas latiùs per Christianum orbem se se diffunderet.

Instituendæ Festivitatiscausa fuit diffidium ex electione Urbani VI. inter Cardinales exortum. Horum alii adhæsere Urbano, alij Clementi VII. Anti-Papæ. Invocata Dei paradiffidium sustulit; & continuò in tanti beneficij memoriam, & tesseram grati animi, hujus festi celebritas est instituta.

Documenta, Cultus.

I. Maria visitavit Elisabeth, matronam omnibus virtutibus conspicuam. Tales oportet esse amicos, quos tu visitas. Visitandi sunt, ex quorum consuetudine melior evadas. Fugiendi sunt, qui à Divinis abstrahunt, & indolis sunt liberioris. Citiùs te isti malum, quàm illos tu bonos efficies.

II. Ad visitandam Elisabeth charitas & urbanitas Mariam impulere Utinam non alio tu sine alienacædes subeas! non promiscuè quævis do-

domus adeunda est ; magnâ hic tibi cautelâ opus. Qui temerè aliena limina terunt ; multis peccandi periculis se obiiciunt.

III. Maria, & Elifabeth sermones de Deo miscuère. Tui cum aliis sermones sùntne ejusmodi ? nunquid asperguntur jocis fordidis, verbis indecentibus, aut noxiis famæ alienæ ; pone custodiam ori tuo, & si tibi loquendum est, ea loquere quæ Deo non displicent, & proximos ædificant.

Hodie, & per octavam Canticum Magnificat, Sanctissimæ Virginis labiis distinctum recita. Visita Ecclesiam aut sacellum B. V. sacrum, & ora Deiparam, ut visitationes amicorum cum fructu obeas. Vide, quales hætenus visitationes tuæ fuerint, an Christianæ, an inutiles, aut cum peccandi periculo conjunctæ ? ama honorum, fuge pravorum consortia. Poterit visitari ægrotus, afflictus, aut aliquis carcere deten-

tentus, & his exhiberi opus misericordiae corporalis vel spiritualis.

Oratio. S. Ephrem,

PER te, ô Domina, sumus reconciliati cum IESU Christo Deo meo; & tuo filio; per te, inquam, quæ es adjutrix desertorum. tu, ô Virgo purissima, es meus securus portus, & ego ab infantia mea fui, & sum sub tua protectione. Esto mihi pia & misericors, qui multis peccatis offendi Deum Creatorem meum & Judicem. Ne glorietur contra me dæmon, invoco auxilium tuum, ô Mater sanctissima, lachrymabundis oculis ad pedes tuos prostratus humillimè rogo, ut apud tuum dulcem filium pro me intercedas, ne me propter peccata mea à se abjiciat, & tanquam infructuosam arborem excindat, & in flamas mittat; sed me in paradisum transferat, ubi nec planctus est, nec mors, sed gaudium sempiternum.

Festum Purificationis.

MARIÆ.

II. Februarij.

Mysterium, Origo Festi.

Dies, quem annuâ hodie memo-
riâ recolimus, ille dies est, quo
Virgo purissima templum Hieroso-
lymitanum ingressa utramque legē
implevit, sive illam, quæ post qua-
draginta à partu dies purgari puer-
peram, sive illam, quæ primogeni-
tum præsentari in templo, Deo-
que offerri iussit.

Hac Gemina lege, quoniam &
Virgo, & Deipara fuit, minimè
quidem Maria tenebatur: obtem-
peravit tamen, & non modò Jesum
Primogenitum Deo consecravit,
verùm etiam, quamvis purissima,
purgari voluit, geminis turturi-
bus pro se, & filio oblatis.

Utrique legi non iussa, non coa-
cta se Virgo submisit: subjecit

L

spon-

spontè, obediunt libere, pulcherri-
mò mortalibus exemplò, quanta
animi alacritate divinis legibus pa-
rendum sit, & qua cura, & studio
corporis atque animæ puritas con-
servanda.

Quem singulari hæc dies lætitia
affecit, Simeon fuit, felix ille, ac
pius Senecio: qui, quòd divinitus
didicisset, non prius moriturum se,
quàm Jesum vidisset, eo viso ruit
in amplexus, stringit, adorat, fu-
turos Matris dolores prædicat, &
quasi vitam jamjam positurus, car-
men illud præ gaudio concinit:
*Nunc dimittis servum tuum Domine
in pace, &c.*

Virginis purificatæ cultus jam
inde ab anno Christi 255. apud
Christianos floruit, id, quod in ser-
mone suo Methodius memorat ea
tempestate Tyri Episcopus, & Mar-
tyrij laureâ insignitus.

Ut in occidente etiam festivo ri-
tu coleretur, author fuit Gelasius

I. Hic lupercalia februario mense Romana in urbe quot annis agi solita abrogavit, & Virginæ purificationis festivitatem substituit anno Christi 469.

Initia hæc ampliora reddidit Justinianus Imperator: nam sæva lue Constantinopolim atrociter depulante, opem Virginis imploravit, qua impetrata curavit sollicitè, ut toto Romano Imperio Virginis purificatæ memoria festivâ celebritate ageretur anno Christi 544.

Documenta, Cultus.

I. Maria obtemperavit legi, qua non tenebatur. Quâ curâ tu observas præcepta Dei, & Ecclesiæ, vel moderatorum Jussa, quibus teneris? testare tuum in Deum amorem exactâ legum observantiâ. Non diligit Deum, qui legibus Dei non obtemperat.

II. Maria maluit immunda videri,

deri, quàm legem prævaricari. Disce obedire Dei præceptis, quamvis ideo hominibus displiceas. Est certa nota fervorum Dei, displicere hominibus propter Deum. Dignus Deo non est, qui placere homini magis studet, quàm Deo.

III. Maria servatæ legis fructum tulit amplissimum: nam Simeon eam coluit ut Dei Matrem, & miratus est Virginem. Non finit se vinci nostra liberalitate Deus. Pro modico obsequio reddit centuplū. Non time pati adversa amore Dei: hæc fortiter tolerata solatium pariunt, gratiam augment, & præmia cumulant.

Hac die animæ tuæ statum inspicias, perscrutando quibus maximè vitiis labores, qui mali habitus in te sint? conaberis conscientiam expurgare per actus contritionis, & bonæ confessionis. Maximè verò propone illud vitare peccatum, in quod sæpius laberis, atque hoc pro-

posi-

positum quotidie per hanc octavam
in honorem B. V. renova. Præpri-
mis humilitatem B. V. per actus in-
ternos & externos imitari studeas.

Oretio S. Thomæ de Aquino.

O Dulcissima, & Beatissima Vir-
go Maria, plena misericordiâ!
ego committotuaë pietati animam,
& corpus meum, & omnes cogita-
tiones, desideria, verba, opera, vi-
tam, & mortem meam. O Domi-
na mea, adjuva me, & conforta
contra infidias, & laqueos hostis an-
tiqui. Impetra mihi, ô dulcissima
Domina, veram, & perfectam cha-
ritatem, quâ ego toto corde amem
dulcissimum, & dilectissimum fi-
lium tuum Dominum meum JE-
sum Christum, & post hunc te su-
per omnia alia. Impetra mihi etiam
charitatem cum proximo, ut illum
in Deo, & per Deum amem; nec

ullum contemnam, aut temerariè
 judicem; nec animo me super aliquem
 extollam. O Regina mea,
 Mater, fac etiam præpotenti tua
 intercessione, ut in meo corde ma-
 neat semper amor, & timor tui;
 ut Deum & te semper amem, & ti-
 meam; & in amore Dei, & tui te-
 nero perseverans, & per tuam in-
 tercessionem usque ad mortem à
 te inducar in paradisum.

Festum Assumptionis
 MARIÆ.

XV Augusti.

Mysterium, Origo Festi.

MEmoriam hodie agimus vir-
 ginei obitûs, quo sanctissima
 Mariæ anima jam cælo matura pu-
 rissimum corpus reliquit, & plau-
 dentibus Angelis, atque in occur-
 sum Reginae suæ venientibus in
 cælum assumpta est.

Hic gloriosus è terris ad superos
 tran-

transitus evenit sub vesperam ante XVII. Calendas Septembris, anno à partu Christi septimò & quinquagesimò, à Christi obitu vigesimo tertiò, ætatis suæ, ut certior est opinio, septuagesimò secundò.

Postquam missus de cœlo Gabriel ad suavissimam mortem virginem invitaverat, convenère toto orbe acciti Apostoli, & cum his Dionysius Areopagita, Hierotheus & Timotheus. Omnes morientis lectulum circumstantes supremum vale amantissimæ Matri dixerunt.

Sublatâ in cœlos animâ mœrorem solabantur Apostoli virgineò corpusculò terris relictò: at non diu hoc solatio frui mœstos licuit: nam cum paulò seriùs Thomas advenisset, & amissam matrem etiam mœstus in tumulto quæreret, præter lintea, tanti thesauri nuper involucra, reperit nihil, luculentò indiciò: purissimum Mariæ corpus ad beatam animam jam avolâsse.

Festivitatis hujus initia non omnibus certa sunt; ea nonnulli rejiciunt post Concilium Ephesium: at si illustri Theologo Francisco Suarez habenda fides est, originem ab Apostolis trahunt, Marianæ Assumptionis diem singulari celebritate colentibus.

Celebritatem hanc subinde auctiorem reddidit Leo Papa hujus nominis IV. hic jejunium præmitti festo, & continuos octo dies assumptæ Virginis memoriam celebrari jussit circa annum Christi 847.

Peculiaris hic cultus in grati animi testimonium, & memoriam accepti beneficij Deiparæ decretus est; eum siquidem Leo Papa imperaverat, postquam imploratô Virginis patrociniô epidemica lues fuisset ab urbe propulsata.

Do-

Documenta, Cultus.

I. Mariæ anima è virgineo corpufculo egressa est sine dolore, sine timore, plena desiderio, ac fiducia videndi Deum. An ita vivis, ut non sit, cur mori timeas? qualis est vita, talis erit mors tua. Rarò bene moritur, qui male vixit. Stude vivere innocenter, ac piè cum Maria, ut feliciter moriaris sub tutela Mariæ.

II. Mariæ anima occurrentibus, & plaudentibus Angelis cælum ingressa est. An cælum te ingressurum putas, si hoc momento è vita migrares? quid illud? quod te inde excluderet. An non peccandi consuetudo, qua tamdiu es implicatus? æternùm exulabis cælò, nisi hanc tollas?

Mariæ animâ in cælos assumptâ, eò etiam sublatum est virgineum corpus. An corpus etiam tuum
olim

olim resurget ad gloriam? non resurget, si hinc deliciis & voluptatibus indulgeas. Cœrce sensus tuos, & carnem crucifige cum concupiscentiis, secus nec corpus, nec animam cœlo inferes.

Ardentissimè hodie & per octavam Virginem Deiparam orabis, ut felicem ex hac vita transitum ad beatam æternitatem tibi impetret. Prætereà singulis horis elice desiderium patriæ cœlestis, & piò affectu ingemisce: *Trabe me post te O sancta Mater.* Non enim habemus hinc manentem civitatem sed supernam inquirimus, ubi Christus regnat, ubi æternùm vivet, & pro fidelibus suis clientibus intercedit Regina cœlorum. Ama igitur, qui cœlo asseris cupis. Ama Matrem tuam, continua tuum amorem, & qui suspiras æternùm cum illa esse in cœlo, cum eadem frequens sis in Conventu Mariano.

Ora.

Oratio Guarrici Abbatis.

O Mater misericordiæ, saturare gloriâ filij tui, & dimitte reliquias tuas parvulis tuis. Tu jam ad mensam Domini; nos sub mensa catelli. Sicut oculi ancillæ in manibus Dominæ suæ, ita familia hæc famelica de te præstolatur alimoniam vitæ. Per te fructum vitæ communicavimus in mensa præsentium Sacramentorum; per te eundem fructum vitæ communicemus in mensa perennium gaudiorum, **J**Esu benedictum fructum ventris tui.

A M E N.**F I N I S.**

Oratio Guericci Abbatis.

O Mater misericordie, salutaris
gloria filij tui, & dante tota
lapis tua parvula tua. Fusa
id in ista Domini nos sub mensa
eccelle dicit oculi dicit in mensa
tus Domine tue, in familia hac
la elice de te paffolatur alimo
nem vira. Per te dicitur vira
comunicavit in mensa pira
lentum sacramentum & per te
in deo sancti vira communicavit
tus in mensa pira dicitur
dicitur in mensa pira dicitur

A. M. E. N.
F I N I S



